

O LE EKALEZIA A IESU KERISO O LE AU PAIA O ASO E GATA AI • AOKUSO 2013

O Le Liahona

**Tatalaina o Ala o
Faaaliga, i. 24**

**Faiaoga, E Mafai Lava e le Fesili e
Tasi Ona Suia Mea Uma, i. 36**

**O Le Auala Na Suia ai e le
Seminare Lo'u Olaga, i. 54**

Kata Otioi o Mau, i. 65



*“Ua faailoa mai
i mea uma
o loo i ai se
Atua; ioe, e
oo i le lalo-
lagi, ma mea
uma ua i ona
luga, ioe, ma
lona faataa-
milosaga, ioe,
ma paneta
uma foi o
loo i o latou
ala masani ai
ua molimau
mai o loo i
ai se Foafoa
Silisiliese.”*

Alema 30:44

O se potopotoi tele o fetu
ninii, NGC 3603, i le lima
tavi'ovi'o o Carina o le
Aniva.



O SAVALI

- 4 **Savali a le Au Peresitene Sili: la Iloa, Manatua, ma Tuu Atu le Faafetai**
Saunia e Peresitene Henry B. Eyring
- 7 **Savali a Faiaoga Asiasi: Uelefea**

TALA FAAALIA

- 16 **Usiusitai: O Le Elemene Taa o le Faatuatua**
Saunia e Elder F. Michael Watson
E te savali ea i ni aso se ono ia faalogo ai i le talalelei?
- 20 **Mauaina o le Saogalemu i le Talalelei**
Saunia e Matthew D. Flitton
Ua faasoa mai e tagata o le ekalesia i Nairobi, i Kenya, le auuala ua latou maua ai le sulufaiga i le talalelei.

I LE FAAVAA
Luma: Ata na pueina e Frans Lemmens.
Tua: Ata na tusia e Michael Gibbs.
Totonu o le faavaa i luma: Ata na pueina e le NASA, ESA, ma le Hubble Heritage/DOD.

- 24 **I Lana Lava Taimi, i Lana Lava Ala**
Saunia e Elder Dallin H. Oaks
Pe a tatou tuuto atu i le talalelei, e mafai ona tatou faamoemoeina ia faaaliga faifai pea i soo se taimi lava e filifili le Alii atamai ma le agaaloa e tuu mai ai ia i tatou.

- 30 **O Le Ala a le Taitai i Faaliga**
Saunia e Richard M. Romney
O nei mataupu faavae e fa e mafai ona fesoasoani i taitai perisitua ma ausilali e galuhue ai i musumusuga.

- 34 **Suesueina o Tusitusiga Paia mo le Malosi o le Aiga**
Saunia e Lori Fuller
O manatu e tolu ina ia anoa atili ai au suesuega o tusitusiga paia faaletagata lava ia ma faaleaiga.

- 36 **O Fesili Maoae, O Talanoaga Maoae**
Saunia e Jack Lyon
O le sa'o o ituaiga o fesili [e fai] e mafai ona musuia ai se talanoaga lea o le a faamanuiaina ai le malamalama ma le molimau a tagata o lau vasega.

MATAGALUEGA

- 8 **Tusigāmanatu Konafesi Aperila**
- 11 **Aoao Atu Mo Le Malosi o le Aulavou: Gagana Lelei**
- 12 **O Tatou Aiga, O Tatou Auaiga: O Le Taimi o Mea Uma Ia**
Saunia e Joshua J. Perkey
- 14 **Tala Fou o le Ekalesia**
- 40 **O Leo o le Au Paia o Aso e Gata Ai**
- 80 **Seia Tatou Toe Feiloai: Alofa mo Pato Tina ma A'u**
Saunia e Rosie Kaufman



44

44 Agai i Luma i le Faatuatua

O le fautuaga lenei mai perofeta o aso nei e mafai ona taiialaina ai i tatou pe a tatou le iloa le auala e agai ai i luma.



Vaai pe mafai ona e mauaina le Liahona o loo natia i le lomiga lenei. Faaitete: Tausisi i le ala.



62

48 O Upu e Fa e Taiala ai Oe

Saunia e Peresitene
Thomas S. Monson

Aufaatasi ma Peresitene Monson ma naunau e faalogo, aoao, galue, ma alofa.

51 Pepa Lautele o i ai se Savali: Faaloaloa atu se Lima

52 Fesili ma Tali

Pe faapefea ona ou "tu i nofoaga paia" pe afai e matua tele ni mea le paia o loo siomiaina au, e pei o le a'oga?

54 Molimau e ala i le Seminare

Saunia e Karla Brigante

Sa fesoasoani le seminare ia te au ia maua se molimau o le talalelei, ae faapefea ona ou fesoasoani i lou tama ia maua foi sana molimau?

56 Aisea e Faaipoipo ai i le Malumalu?

Aisea e tatau ai ona tatou galuhue malosi mo se faaiipoipoga i le malumalu a o foliga mai ua avea le faaiipoipoga o se manatu ua faavaivaiina?

59 Filifili e Aua le Faitatala

Saunia e Brett Schachterle

E matua faigofie lava le ulagia faatasi ma isi ia tagata faatino.

60 Mo Le Malosi o le Autalavou: Tatou te "Tautatala" i Nei Mea


Saunia e Larry M. Gibson

E mafai ona tatou aoao e faaoga upu ia e faaalua ai le avea o i tatou ma soo.

62 Galue, Auauna Atu, ma le Faalagolago Faaleagaga o le Tagata ia te la Lava

Saunia e Elder Per G. Malm

O le mea na aoao mai ia te au e le folaina o piliki i Suetena e uiga i le galue malosi ma le molimau.



67

64 Molimau Faapitoa: Aisea e taua ai le aua ne'i lotoleaga i isi?

Saunia e Elder Jeffrey R. Holland

65 Kata o Mau

Faaaoga mau nei e faamanatu atu ai le alofa tele o le Tama Faalelagi ia te oe.

67 Ua Sosola Ese Alapaka!

Saunia e Romney P.

Ina ua sosola ese alapaka, sa ou manaomia le fesoasoani faalelagi e tapue uma mai ai.

68 I le Auala: Maimoaina o Navu

Saunia e Jennifer Maddy

70 Aumaia o le Peraimeri i le Fale: E Faafofoga ma Tali mai le Tama Faalelagi i Au Tatalo.

72 Talofa!O au o Uili mai Taiuani

Faafeiloai atu ia Uili ma lona uso, o Aleni, ma aoao atili e uiga ia Taiuani.

74 O La Tatou Itulau

75 O La Tatou Tali

Saunia e Tatiana Agüero

Sa ou tatalo pea mo lo'u tama ina ia maua se molimau. E mafai faapefea ona ou fesoasoani ia te ia ia iloa le upumoni?

76 Mo Tamaiti Laiti

79 Manatu Lelei

81 Atatosi o le Perofeta: Heber J. Grant

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautau: Shayne M. Bowen, Bradley D. Foster, Christoffel Golden Jr., Anthony D. Perkins

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr, LaRene Porter Gaunt

Lagolago o Lomiga: Melissa Zenteno

Au Tusitusi ma Faatonutonu: Susan Barrett, David Dickson, David A. Edwards, Matthew D. Flitton, Mindy Raye Friedman, Lori Fuller, Garrett H. Garff, Jennifer Grace Jones, Hikari Loftus, Michael R. Morris, Richard M. Romney, Paul VanDenBerghe, Julia Woodbury

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrews, C. Kimball Bott, Thomas Child, Nate Gines, Kerry Lynn C. Herrin, Colleen Hincley, Eric P. Johnsen, Susan Lofgren, Scott M. Mooy, Brad Teare

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.lds.org po o le Falelusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausauga Atoa \$6.60 (Samoa).

Auina atu tusitusiga ma faafesili i luga o le

itoneteti i le liahona.lds.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le "tapasa" po o se "faatonuuala") e lomua i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Iglisi, Esitonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Lativia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafaigofieina), Silovenia, Sipaniolo, Suetena, Swahili Tagaloka, Tahiti, Tai, Toga, lukureini, Urutu, ma Viatename. (E eeseese lava gagana.)

© 2013 Puletaofia e le Intellectual Reserve, Inc. Ua taofia aia tatau uma. Lomia i le lunaite Setete o Amerika.

E mafai ona kopi tala ma ata o le *Liahona* mo le toe faaogaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufatuga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

August 2013 Vol. 37 No. 8. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O leni lomiga o loo i ai tusiga ma gaoioiga e mafai ona faaoga mo afiafi faaleaiga. O ni faataitaiga nei se lua.



ATA NA PUEINA E CODY BELL

"Filifili e Aua le Faitatala," itulau 59: Mafaufau e faitau le tusiga leni ma le vaega e uiga i le gagana o loo i le *Mo Le Malosi o le Autalavou* (itulau 20). Talanoaina ni auala e faamasino ai pe taua ona tau atu se mea na e faalogo ai pe leai. E mafai ona avea fesili nei ma se vaega o lena talanoaga: Pe moni le faamatalaga? Pe talafeagai le toe faamatalaina o leni faamatalaga? Pe o se agalelei lou toe faasoaina atu o le mea na e faalogo i ai? Mo se gaoioiga, e mafai ona e faia se fasi pepa mo tagata taitoatasi o le aiga ma tusi ai lona igoa i le pito i luga o le pepa. Ona pasi atu lea o pepa faataamililo ma tuu atu i tagata o le aiga e tusi i lalo ni mea latou te talisapaia ma fiafia ai i le tasi tagata.

"Ua Sosola Ese Alapaka!" itulau 67, **"E Faafofoga ma Tali mai le Tama Faalelagi i A'u Tatalo,"** itulau 70, ma le **"O La Tatou Tali,"** itulau 75: Iloilo nei tala ma talanoaina nisi o mafuaaga tatou te tatalo ai. Pe a uunaia ai, ia faasoa atu se aafiaga sa e mauaina i le tatalo. Pe na e mauaina se fesoasoani e pei ona maua e Romney? Sa e manao ea e iloa le upumoni, e pei o Tatiana? A uma ona faitauina ia tala, e mafai ona e faasoa atu ni mau e uiga i le tatalo, e pei o le 2 Nifae 32:8–9 ma le Mataupu Faavae ma Feagaiga 10:5. Valaaulia tagata taitoatasi o le aiga e fai ni sini e faaleleia ai ana tatalo patino. E mafai ona e faamaeaina i le usuina o le viiga e uiga i le tatalo, e pei o le "Le Itula o Talosaga" (*Viiga*, nu. 77).

I LAU GAGANA

O loo maua le *Liahona* ma isi tusi a le Ekalesia i le tele o gagana i le languages.lds.org.

AUTU I LENEI LOMIGA

E ta'u mai e numera le itulau muamua o le tusiga.

- Agaga Paia**, 4, 24, 30, 48, 75
- Aiga**, 34, 48, 52, 56
- Alofa**, 48
- Aoa o atu**, 36
- Api talaaga**, 4, 6
- Faaliga**, 24, 30, 44
- Faaiipooga**, 12, 56
- Faasoosoga**, 43, 52
- Faatuatu**, 44, 47, 76
- Faiaoga o aiga**, 44
- Faitalia**, 44, 52

- Filemu**, 20
- Gagana**, 59, 60
- Galuega**, 48, 51, 62
- Galuega faafaifeautalai**, 12, 20, 44, 70, 75
- Galuega faalemalumalu**, 12, 56
- Grant, Heber J.**, 81
- Iesu Keriso**, 48, 54, 76
- Loto faafetai**, 4, 6
- Lotoleaga**, 64
- Molimau**, 54, 75

- Seminare**, 52, 54
- Suesue i tusitusiga paia**, 34, 36, 48, 52, 54, 65
- Taimi**, 12, 24
- Talafaasolopito o le Ekalesia**, 68
- Tatalo**, 41, 52, 70, 75
- Tulaga faatonuina**, 20, 52, 59, 60
- Tusi a Mamona**, 54, 75
- Uelefea**, 7
- Valaauga o le Ekalesia**, 30



**Saunia e Peresitene
Henry B. Eyring**

Fesoasoani Muamua
i le Au Peresitene Sili

IA ILOA, MANATUA, MA Tuu Atu le Faafetai

Ua poloai mai le Atua ia tatou tuu atu le faafetai ia te Ia mo soo se faamanuiaga tatou te maua mai ia te Ia. Ua faigofie lava mo i tatou le le lagonaina o le agaga i a tatou tatalo o le faafetai, i le ta'u soo o upu lava e tasi ae ua aunoa ma se faamoemoega e tuu atu la tatou faafetai e avea ma se meaalofo o le loto i le Atua. E ao ia i tatou ona “faafetai atu . . . i le Agaga” (MF&F 46:32) ina ia mafai ona tatou lagonaina le lotofaafetai moni lava mo mea ua foai mai e le Atua ia i tatou.

E mafai faapefea ona tatou manatuaina e oo lava i sina vaega o mea uma ua faia e le Atua mo i tatou? Sa tusia e le Aposetolo o Ioane mea sa aoaoina ai i tatou e le Faaola e uiga i se meaalofo o le manatuaina o mea e maua mai le meaalofo o le Agaga Paia: “A o le Fesoasoani, o le Agaga Paia lea, e auina mai e le Tama i lo'u igoa, o ia lava na te aoao ia te outou i mea uma lava; e faamanatu mai foi o ia ia te outou i mea uma ua ou fai atu ai ia te outou” (Ioane 14:26).

E faamanatu mai e le Agaga Paia mea na aoao mai e le Atua ia i tatou. Ma o se tasi o auala o loo aoao ai i tatou e le Atua o Ana faamanuiaga; ma o lea, afai tatou te filifili e faaoga le faatuatua, o le a aumai e le Agaga Paia le agalelei o le Atua i lo tatou manatuaga.

E mafai ona e faaitaia lenei mea i le tatalo i lenei aso. E mafai ona e mulimuli i le poloaiga “Ia e faafetai atu i le Alii lou Atua i mea uma” (MF&F 59:7).

Na fautua mai Peresitene Ezra Taft Benson (1899–1994) e faapea e fatua'i e le tatalo le taimi e fai ai le mea lenei. Sa ia fai mai: “Sa saunoa mai le Perofeta o Iosefa

Samita i se tasi taimi e faapea o se tasi o agasala aupito sili o le a tausala ai le Au Paia o Aso e Gata Ai, o le agasala lea o le le lotofaafetai. Ou te manatu o le toatele o i tatou e lei mafaufauina o se agasala tele lenei agasala. O loo i ai se amioga tele ia i tatou i a tatou tatalo ma i a tatou aioiga i le Alii e ole atu mo nisi faamanuiaga faaopoopo. Ae o nisi taimi ou te lagona ai ua manaomia ona tatou tuuto atili atu a tatou tatalo i le faailoa atu o le lotofaafetai ma le faamanu mo faamanuiaga ua uma ona maua. Ua tele mea ua tatou olioli ai.”¹

E mafai ona e maua sea aafiaga ma le meaalofo o le Agaga Paia i le asō. E mafai ona e amataina se tatalo patino i le faafetai. E mafai ona e amata i le faitauina o ou faamanuiaga ona e taofi lea mo sina taimi. Afai e te faaogaina le faatuatua, i le meaalofo o le Agaga Paia, o le a e iloaina o le a tafe mai i lou mafaufau le manatuaina o isi faamanuiaga. A amata ona e faailoa atu le lotofaafetai mo ia faamanuiaga taitasi, o le a fai si umi atu o lau tatalo nai lo le mea e masani ai. O le a oo mai le manatu, ma o le a faapena foi le lotofaafetai.

E mafai ona e taumafaia lea mea lava e tasi a o e tusia se mea i lau api talaaga. O loo fesoasoani pea le Agaga Paia i tagata i lenei mea talu mai le amataga o aso. E te manatu fai mai le tusi a Mose, “Ma sa tusia se tusi faamanatu, lea sa tusia ai i le gagana a Atamu, ona sa tuuina mai i le toatele na valaau atu i le Atua e tusitusi e ala i le agaga o musumusuga” (Mose 6:5).

Sa faamatala e Peresitene Spencer W. Kimball (1895–1985) lenei faagasologa o tusitusiga musuia: “O i latou e



tausia se tusi faamanatu e foliga mai e sili atu ona faatumauina le manatua o le Alii i o latou olaga i aso taitasi. O api talaaga o se ala lea o le faitauina o o tatou faamanuiaga ma le tuua o se faaputuga oa o nei faamanuiaga mo a tatou fanau.”²

A o amata ona e tusitusi, e mafai ona e fesili ifo ia te oe lava, ”Na faapefea ona faamanuiaina au e le Atua ma i latou ou te alofa i ai i le asō? A e faia soo lena mea faatasi ma le faatuatua, o le a e manatua ina ia faamanuiaga. Ma o nisi taimi o le a e manatua ni meaalofa na e le matauina i

le gasologa o le aso ae o le a e iloa ai i lena taimi sa pai mai le aao o le Atua i lou olaga.

Ou te tatalo ina ia tatou faia pea se tau-mafaiga i le faatuatua ina ia iloa, manatua, ma tuu atu le faafetai mo mea ua faia e lo tatou Tama Faalelagi ma lo tatou Faaola ma o loo faia pea e tatala ai le ala tatou te toe foi atu ai ia i Laua. ■

FAAMATALAGA

1. Ezra Taft Benson, *God, Family, Country: Our Three Great Loyalties* (1974), 199.
2. Spencer W. Kimball, “Listen to the Prophets,” *Ensign*, May 1978, 77.

AOAO ATU MAI LENEI SAVALI

I lana savali, ua vala-aulia ai e Peresitene Eyring i tatou ia manatua le agalelei o le Tama Faalelagi i a tatou tatalo. Ia talanoaina ma i latou e te aoaoina le auala e mafai ai ona fesoa-soani le tatalo ma le lotofaafetai ia i tatou ia iloa le aao o le Atua i o tatou olaga. Mafau-fau e tootuli e tatalo ma i latou e te aoaoina ma fautua atu i soo se tasi e faia le tatalo ia tau ina faailoa atu o le faafetai.

E mafai foi ona e suesue i le taua o le lotofaafetai e ala i le faitauina o nei fuai-upu e faaopoopo atu i fuaiupu ia na taua e Peresitene Eyring: Salamo 100; Mosaea 2:19–22; Alema 26:8; 34:38; Mataupu Faavae ma Feagaiga 59:21; 78:19; 136:28.

Fai se Faaputuga Oa



Ua sii mai e Peresitene Eyring le saunouaga a Peresitene Spencer W. Kimball (1895–1985) i le faapea mai “o api talaaga o se auala lea o le faitauina o o tatou faamanuiaga ma le tuua o se faaputuga oa o nei faamanuiaga mo a tatou fanau.” I le konafesi aoao ia Oketopa 2012, sa tuu mai ai e Peresitene Thomas S. Monson lana molimau i le tusiaina o api talaaga. Sa ia faasoa maia nisi o aafiaga mai lona soifuaga, i le faaopoopo mai, “O au api

talaaga o aso uma, sa tausia i nei mau tausaga uma, ua fesoasoani e maua mai ai nisi o mea patino ia e foliga mai semanu e le mafai ona ou toe manatuaina.” Sa ia fautua mai, “Fai se faaputuga oa o lou olaga ma tagai patino mo faamanuiaga, tele pe faatauva, ua e mauaina” (“Mafau-fau i Faamanuiaga,” *Liahona*, Nov. 2012, 86). Galue i le mulimulitaia o le fautuaga a nei perofeta ma seti ni sini e tusitusi i lau api talaaga.

TAMAITI

E Tele Auala e Fai Atu ai Faafetai Lava


“A uma le aso atoa,
Tootuli fanau a le Tama,
Faafetai atu i lana gagana.”
(“Tamaiti i le Lalolagi Atoa,” *Tusipese a Tamaiti*, 4.)

Faafetaui auala eseese o le fai atu faafetai i gagana eseese i vaega o le lalolagi ia e o mai ai na gagana. O nisi o nei gagana o loo tautalagia i le silia ma le atunuu e tasi!



1. gracias (Sipaniolo)
2. malo (Toga)
3. thank you (Igilisi)
4. shukriyaa (Hindi)

5. spasiba (Rusia)
6. arigatō (Iapani)
7. asante (Suaili)
8. merci (Farani)



Suesue ma le agaga tatalo i mea nei, ma pe a talafeagai ai, ia talanoaina faatasi ma uso e te asia. Faaaoga fesili e fesoasoani ai ia te oe e faamalosia ai ou uso ma avea ai le Aualofa ma se vaega ola o lou lava olaga. Mo nisi faamatalaga, alu i le reliefsociety.lds.org.

Uelefea

O faamoemoega o le uelefea a le Ekalesia o le fesoasoani atu lea i tagata o le ekalesia ia ola faalagolago ia i latou lava, ia tausia e matitiva ma e le tagolima, ma tuuina atu ia auu-naga. O le uelefea e totonugalemu i le galuega a le Aualofa. Ua aoao mai Peresitene Henry B. Eyring, Fesoasoani Muamua i le Au Peresitene Sili e faapea:

“Sa saunia lava e [le Alii] mai lava i le amataga o aso ia auala mo Ona soo e fesoasoani atu ai. Ua Ia valaauliaina Ana fanau ia faapaiaina o latou taimi, o a latou meatotino, ma i latou lava e afaatasi ai ma Ia i le tautuaina o isi. . . .

“Ua ia valaaulia ma poloaiina i tatou ina ia auai i Lana galuega e sii a’e i latou o loo manaomia le fesoasoani. Ua tatou osia se feagaiga e faia lena mea, i le vai o le papatisoga ma totonu o malumalu paia o le Atua. Tatou te faafouina le feagaiga i Aso Sa pe a tatou aai ma feinu i le faamanatuga.”¹

I lalo o le taitaiga a le epikopo po o le peresitene o le paranesi, e fesoasoani atu ai taitai i le lotoifale



i le uelefea faaleagaga ma faaletino. O avanoa e auauna atu ai e tele lava ina amata i faiaoga asiati o e e saili atu i musumusuga ia iloa le auala e tali atu ai i manaoga o uso taitasi latou te asia.

Mai Tususiga Paia

Luka 10:25–37; Iakopo 1:27; Mosaea 4:26; 18:8–11; Mataupu Faavae ma Feagaiga 104:18

FAAMATALAGA

1. Henry B. Eyring, “O Avanoa e Fai ai Mea Lelei,” *Liahona*, Me 2011, 22.
2. Iosefa Samita, i le *O Afafine i Lo’u Malo: O Le Talafaasolopito ma le Galuega a le Aualofa* (2011), 69.
3. *O Afafine i Lo’u Malo*, 69.



Faatuatu, Aiga, Toomaga

Mai lo Tatou Talafaasolopito

I le aso 9 o Luni, 1842, sa faatonuina ai e le Perofeta o Iosefa Samita ia tuafafine i le Aualofa ia fai se “toomaga mo e matitiva” ma ia “laveai agaga.”² O loo i ai pea nei sini i le loto o le Aualofa ma o loo faailoaina i la latou mautauave, “E Le Uma le Alofa” (1 Korinito 13:8).

O le peresitene aoao lona lima o le Aualofa o Uso Emmeline B Wells, ma ona fesoasoani sa faavaeina lenei mautauave i le 1913 e avea ma se faamanatu o a tatou mataupu faavae autu: “Matou te tautino atu o lo matou faamoemoega o le . . . pipiimau i aoaoga musuia a le Perofeta o Iosefa Samita ina ua ia faaalua mai le fuafuaga lea e faamanaina ai tamaitai e ala i le valaauga o le perisitua, e tuuvaega i faalapopotoga talafeagai mo le faamoemoe e auauna atu ai i e mamai, fesoasoani i e le tagolima, faamafanafana i e ua pulapula lagoto le soifua, lapatai i e ta’umamaina ma fesoasoani atu i e ua matuaoti.”³

O le taimi nei ua aapa atu le Aualofa i le lalolagi atoa a o faalatele atu e tuafafine le alofa mama, le alofa le pona o Keriso, i o latou tuaoi (tagai Moronae 7:46–47).

O Le a se Mea e Mafai Ona Ou Faia?

1. E faapefea ona ou saunia e tausii au lava ia ma lou aiga i le faaleagaga ma le faaletino?
2. E mafai faapefea ona ou mulimuli i le faataitaiga a le Faola a o ou fesoasoani e faafetaia’ia manaoga o uso o loo ou vaavaaia?

TUSIGĀMANATU KONAFESI APERILA 2013

"O le mea ua fai atu ai A'u o le Alii, ua Ou fai atu ai; . . . pe i lo'u lava leo po o i le leo o a'u auauna, ua tutusa lava" (MF&F 1:38).

A o e iloiloina le konafesi aoao ia Aperila 2013, e mafai ona e faaogaina nei itulau (ma Tusigāmanatu o le Konafesi i lomiga i le lumanai) e fesoasoani ai ia te oe e suesue ma faaoga aoaoga talu ai nei a perofeta soifua ma aposetolo ma isi taitai o le Ekalesia.

TALA MAI LE KONAFESI



Aoao E Loto Faamaoni

Saunia e Peresitene

Henry B. Eyring

Fesoasoani Muamua i le Au Peresitene Sili

I le 1955 na avea ai au ma taitai i le Fuavaalele o le Ea Fosi a le Iunaite Setete Na tuu mai e lou epikopo ia te au i le fale se faamanuiaga ae ou te lei tuua mo lau uluai nofoaga e faamautu i ai, lea sa i ai i Albuquerque, Niu Mekisiko.

I lana faamanuiaga na ia faapea mai ai o lo'u taimi i le fuavaalele o le a avea ma taimi o galuega faamisi-ona. Sa ou taunuu i le lotu i lo'u Aso Sa muamua i le Paranesi Muamua a

Albuquerque. Sa savali mai se alii ia te au, faailoa mai o ia o le peresitene o le itu, ma tau mai ia te au o le a ia valaauina au e auauna atu o se faifeautalai o le itu.

Sa ou tau atu ia te ia o le a ou i ai iina mo aoaoga mo na o ni nai vaiaso ona tofia ai lea o au i se isi nofoaga i le lalolagi. Sa ia fai mai, "Ou te le iloa lena mea, ae ua ao ona matou valaauina oe e auauna atu." I le ogatotonu o au aoaoga faamiliteli, lea sa atagia mai o se avanoa, sa filifilia ai au mai le faitau selau o taitai sa aoaoina e suitulaga i se taitai i le nofoaga tutotonu o le na maliu faafuasei.

O lea, mo le lua tausaga sa ou i ai iina, sa ou faigaluega ai i lou ofisa. I le tele o afiafi ma faaiuga o vaiaso uma, sa ou aoao atu ai le talalelei a Iesu Keriso i tagata sa aumai e le au paia ia i matou.

Sa matou iloiloina ma au soa e silia ma le 40 itula i le masina le averesi o a matou auaunaga faamisiona e aunoa ma se tuitui se tasi i faitotoa e sue se tagata e aoao. Sa matua faapisi lava matou e le au paia lea sa tele ai ina matou aoaoina ni aiga se toalua i se afiafi. Sa ou vaaia mo au lava ia le mana ma faamanuiaga i le valaau faifai pea a perofeta mo tagata uma o le ekalesia ia avea ma se faifeautalai.

I le Aso Sa mulimuli ae ou te lei tuua Albuquerque, sa faatulaga ai le uluai siteki i lena aai. Ua i ai nei iina se malumalu paia, o se maota o le Alii, i se aai sa matou feiloai ai i se falesa faatasi ma le Au Paia na aumaia ni uo ia i matou ina ia aoaoina ma lagonaina le molimau a le Agaga. Na lagonaina e na uo se aiga talimalo i le Ekalesia moni a le Alii.

Mai le "E Tasi Lava i Tatou," *Liahona*, Me 2013, 62–63.

O LE TUPE LAUTELE MO FAIFEAUTALAI

I le konafesi aoao ia Aperila 2013 na saunoa ai, Peresitene Thomas S. Monson e uiga i le tali atu ofoofogia ma le musuia a tagata talavou e ave ni misiona. Na ia saunoa mai, "Ina ia fesoasoani e faatumauiina lenei 'au o faifeautalai, ma ona o le toatele o o tatou faifeautalai e o mai i tulaga le mautu lelei, o lea matou te valaaulia ai outou, pe a mafai ai, ia saofaga ma le limafoai i le Tupe Lautele mo Faifeautalai a le Ekalesia."

Peresitene Thomas S. Monson, "Susu Maia i le Konafesi," *Liahona*, Me 2013, 5.

FESILI E MANATUNATU LOLOTO I AI

- O faapefea ona faamanuaina lou olaga e au auaunaga faafaifeautalai po o auaunaga faafaifeautalai a isi?
- Aisea e te manatu ai na talosaga ai e perofeta le aveina atu o le talalelei i le lalolagi atoa?
- E mafai faapefea ona e fesoasoani ia i latou i lau eria o e e le o toe toaaga mai i le Lotu ina ia lagonaina le molimau a le Agaga?

Maufaufau e tusi ou mafauauga i lau api talaaga pe talanoaina foi ma isi.

Punaoa faapoopo i lenei atu: *Mataupu Faavae o le Talalelei* (2009), "Galuega Faafaifeautalai," 207–14; "Missionary Work," i Gospel Topics i le LDS.org; Jeffrey R. Holland, "Ua Tauto i Tatou Uma," *Liahona*, Nov. 2011, 44–46.

UPU A PEROFETA E UIGA I MATAUPU FAVAE O AMIOGA LELEI

"Ua faaali mai e le Atua i Ana perofeta e faapea, o loo i ai mataupu faavae o amioaga lelei. O le agasala o le a avea pea ma agasala. O le le usiusitai i poloaiga a le Alii o le a aveesea ai e le aunoa i tatou mai Ana faamanuiaga. O le lalolagi e fesuisuia soo ma tele ona suiga, ae o le Atua, Ana poloaiga, ma faamanuiaga folafolaina e le sua lava. . . . E le tatau ona tatou ilo ma fili po o le fea poloaiga ua tatou manatu e taua ona tausia, ae ia talia poloaiga uma a le Atua. E tatau ona tatou tutu mausali ma tutumau, ma ia talitonu atoatoa i le tumau o le Alii ma talitonu atoatoa i Ana folafolaga."

Elder L. Tom Perry o le Korama a Aposetolo e Toasefululua, "O Le Usiusitai i le Tulafono o le Saolotoga Lea," *Liahona*, Me 2013, 88.

VALAAULIA FAFAIFEAUTALAI: PU'E LE GALU

- "Outou le tupulaga talavou, opogi la outou mataupu aoaoina fou ma aoao atu e le tasi le isi i mataupu a lesu Keriso. O lo outou taimi lenei e sauniuni ai e aoao atu isi e uiga i le agalelei o le Atua.
- "Alii ma tamaitai talavou, e matua taua tele le a'otauina o outou. . . . Matou te fautuaina oe e tuu i totonu lau talosaga e lesitala ai i le aoga e te filifilia ao *lei* amataina lau misiona.
- "Outou matua, faiaoga, ma isi, pu'e le galu ao outou tapenaina a outou tupulaga faiae ia agavaa mo le galuega faafaifeautalai. O le taimi nei, o o outou soifuaga amiotonu o le a faatosina maia le naunau o a outou uo ma tuaoi.
- "Outou tagata matutua, pu'e le galu e ala i le tapenaina faaleagaga, faaletino, ma mea tautupe mo faifeautalai i le lumanai.
- "Outou ulugalii matutua, ia outou fuafua mo le aso o le a mafai ai ona outou o ia outou misiona.
- "O peresitene o siteki ma epikopo . . . ua umia ki o le tiutetauave mo le galuega faafaifeautalai i a latou iunite.
- "Outou taitai misiona o uarota . . . o le sootaga i le va o tagata o le au paia ma faifeautalai i lenei galuega paia o le laveai mai o fanau a le Atua."

Elder Russell M. Nelson o le Korama a Aposetolo e Toasefululua, "Pu'e le Galu," *Liahona*, Me 2013, 45, 46.



FAATUMU LE AVANOA

1. "O le a le maua lava e le pogisa le manumalo i le _____ o Keriso" (Dieter F. Uchtdorf, "O Le Faamoemoe o le Malamalama o le Atua," *Liahona*, Me 2013, 77).
2. "O le Ekalesia o se _____ lea e mafai ai e soo o Keriso ona maua ai le filemu" (Quentin L. Cook, "Filemu o le Tagata Lava Ia: O Le Taii lea o le Amiotonu," *Liahona*, Me 2013, 34).
3. "O i tatou o e ua i ai tino faaletino ua i ai le _____ i tagata o e e le o i ai [ni tino faaletino]" (Boyd K. Packer, "O Nei Mea Ua Ou Iloa," *Liahona*, Me 2013, 8).
4. "A tatou lafoai le tuuto ma le faamaoni a'ia'i i a tatou _____, ua tatou aveesea le kelu e taofiofia faatasi lo tatou lalolagi" (L. Tom Perry, "Obedience to Law Is Liberty," *Liahona*, Me 2013, 87).
5. "Afai e le o oe o se faifeautalai faamisiona e i ai se pine faifeautalai e faamau i lou pelaue, o le taimi la lenei e vali ai se pine i lou _____" (Neil L. Andersen, "O Se Vavega Lava," *Liahona*, Me 2013, 78).

Tali: 1. malamalama; 4. sulufaiaga; 3. mana; 4. paaga faaipopo; 5. lotu.



ATA NA TUSIA E DENISE RENEE BIRD

FESOASOANI ATU I E MATITIVA MA LĒ TAGOLIMA

"I le faaaogaina o tupe e foai mai e tagata limafoai o le ekalesia, e auina atu ai e Le Ekalesia a Iesu Keriso o le Au Paia o Aso e Gata Ai ia taumafa, lavalava, ma isi mea taua e fesoasoani ai i le mafatia o tagata matutua ma tamaiti i le lalolagi atoa. O nei foai alofa, e faitau fiaselau miliona tala i le sefulu tausaga talu ai, e faia e aunoa ma se mafaufau i ni lotu, lanu, po o atunuu. . . . I le luasefululima tausaga talu ai, ua tatou fesoasoani atu ai i le toeitiiti atoa le 30 miliona tagata i atunuu e 179."

Elder Dallin H. Oaks o le Korama a Aposetolo e Toasefululua, "O Soo o Keriso," *Liahona*, Me 2013, 98.

IA ATAMAI I LE ALA O E OPOGI AI TEKINOLOSI

- "O le faasoaina atu o le talalelei, na amatalia ai e ni talavou i Boston ni nai poloka (blogs). O i latou na auai i le Ekalesia sa amata lo latou aoaoina i luga o le initoneti, na sosoo ai ma talanoaga ma faifeautalai. . . . Sa fai mai se tasi o i latou, 'E le o se galuega faafaifeautalai lenei. O se fiafiaga faafaifeautalai.'"¹
- "Aisea e le filifilia ai se taimi i aso taitasi e aluese ai mai i mea faatekinolosi ae fesootei atu i le tasi ma le isi? Na o le tape lava o mea uma."²
- "Faailoga mau taua i lau masini ma ia toe alu soo i ai e faitau. . . . O le a le umi ae outou taulotoina ni mau se fia selau. O na fuaitau o le a faamaonia le avea ma punavai malosí o musumusuga ma taitaiga a le Agaga Paia i taimi o faafitauli."³

FAAMATALAGA

1. Elder Neil L. Andersen, "O Se Vavega Lava," *Liahona*, Me 2013, 79.
2. Rosemary M. Wixom, "O Upu Tatou Te Tautatala Ai," *Liahona*, Me 2013, 82.
3. Richard G. Scott, "Mo Le Filemu i le Aiga," *Liahona*, Me 2013, 30.

Ina ia faitau, matamata, pe faalologo foi i lauga o le konafesi aoao, asiiasi ane i le conference.lds.org.

GAGANA LELEI

Upu tatou te faaaogaina e mafai ona molimau atu ai ia Keriso, faamafanafana ai i e mafatia, faamalo atu ai i se uo, pe faailoa atu ai se alofa i se tagata o le aiga. E mafai foi ona tatou fai atua ni upu e tupu ai se tiga faalelagona, faasalalau ai le faitatala, fai ai upu masoa, pe taufaifai ai. O lou fesoasoani i lau fanau e faaaoga le gagana lelei o le a aumaia ai le filemu ma le faamalosiauga i lou aiga. I le lomiga o lenei masina i itulau 60–61, o loo talanoaina ai e Larry M. Gibson o le au peresitene aoao o Alii Talavou le taua o le gagana mama:

“O le mea tatou te lagonaina i o tatou loto o le mea lena o loo tatou mafaufau i ai, ma o le mea tatou te mafaufau i ai o le mea lena tatou te tautatala ai. O lea, e moni ai lava o upu tatou te faaaogaina e atagia mai ai lagona o o tatou loto ma o tatou tagata moni lava. . . .

“E mafai e i tatou taitoatasi ona olioli i faamanuiaga o le mauaina *pea* o le Agaga e faatasi ma i tatou, e pei ona folafola mai i taimi tatou te aai ma feinu ai i le faamanatuga i aso Sapati taitasi. O le a faalagolago ia i tatou lava—i le auala tatou te amio ai, o mea tatou te faia, ma, ioe, e oo lava i mea tatou te tautatala ai.”

Fautuaga mo le Aoaina o le Autalavou


- E mafai ona e faitauina ma lou aiga le vaega o le gagana i le

Mo Le Malosi o le Autalavou (itulau 20–21). Talanoaina mea e fai pe a faaaogaina e i latou o siomia oe le gagana leaga.

- Faitau le tusiga a Uso Gibson i le itulau 60–61. Faaaoga lana tusiga e seti ai ni sini e fesoasoani ai i le tasi ma le isi e faa-aoga le gagana lelei.
- Suesue ma talanoaina ia mau ua lisi atu i le itu taumatau.
- Faitau le “Filifili e Aua le Faitatala” i le itulau 59 o le lomiga lenei ma talanoa e uiga i le matautia o le faitatala. Talanoa pe aisea e tupu ai le faitatala ma pe faapefea ona aloese mai ai.
- Maimoa i vitio ma faitau ia tusiga a le autalavou e uiga i le mana o le gagana. Alu i le youth.lds.org ma kiliki i le faamau o le “Mo Le Malosi o le Autalavou”. Kiliki i le “Gagana.” I le itu taumatau o le itulau o loo i ai se vaega “Fesootai” o loo faaalua ai vitio e pei o le “No Cussing Club” ma tusiga a le autalavou e uiga i le le faama-asiasia o isi.

Fautuaga mo le Aoao Atu o Tamaiti

- Mafaufau e faitau le “O Upu Tatou Te Tautatala Ai” (Rosemary M. Wixom, *Liahona*, Me 2013, 81); “O Na Upu” (*Liahona*, Tes. 2011, 60); po o le “O Se Tali Filemu” (*Liahona*,



MAU E UIGA I LE GAGANA

Salamo 34:13–14

Faataoto 10:11

Isaia 50:4

Mataiao 15:11

Efeso 4:29, 31

2 Nifae 32:2–3; 33:1

Mataupu Faavae ma Feagaiga 20:54; 52:16; 100:5–6; 136:23

Iuni 2011, 70). Talanoa pe faape'i o tatou lagona pe a tatou fai atua ni tala lelei i le tasi ma le isi.

- Talanoaina mea e te le tautala ai i totonu o lou aiga. Seti ni sini e fai atu “faamolemole” ma “faafetai” ma fai atili atu upu faamalo.
- Talanoa e uiga i le auala e atili fiafia ai tagata uma pe a tatou fai atu ni mea lelei i le tasi ma le isi. Usu le “O Le Agalelei e Amata ia te Au” (*Tusipese a Tamaiti*, 145) po o se isi pese e uiga i le agalelei. ■

O LE TAIMI, O MEA UMA IA

E maeu le taunuu atu o se tasi o tala maoae i le malumalu—i se ala faateia.

Saunia e Joshua J. Perkey

Mekasini a le Ekalesia

Ao pulatoa atu ma le gauai Vinca Gilman i le togavao Alaska i tua atu o lona fale, sa ia mafaufau loloto i lana tane, lea ua fai si umi talu ona maliu. O Ward Kepler Gilman o se alii malosi ma tinoese, sa tau i le Taua Lona Lua a le Lalolagi, o se fomai, ma o se tane faamaoni. Ae sa manaomia se malaga o le faatuatua ma se avanoa fou i le talalelei mo Vinca ma Ward ina ia faatasia ai e faavavau.

E amata le tala a Vinca Helen Gilman i Tenimaka. Sa fanau mai o ia e latalata i Vordingborg, o se taulaga i luga o le motu lava lea e tasi e i ai Copenhagen. Sa ola ae o ia i se aiga e i ai se fanau e toafitu, e aofia ai ni tama se toatolu na vaetamaina.

Ona oo mai lea o le Taua Lona Lua o le Lalolagi. Na auala mai i le alofa mutimutivale o le Atua, sa faasaoina ai o ia ma ona matua mai le Fasiotiga Tele o Tagata Iutaia atoa ai ma tausaga e tolu o tolauapiga faata-gataotauaina, o se aafiaga ua ia faaga-loina nei.

Ina ua mavae le taua, sa toe atiae e lona aiga o latou olaga. I se tasi aso, a o nonofo ia Vinca ma ona matua i se fale o le taumafanafana i Aarhus i Jutland. O iina sa latou feiloai faafua-sei ai ma se soa o faifeautalai, sa la

sailia se mea e nonofo ai. Sa agalelei ma tauagafau ia alii talavou, ma sa malilie ai matua o Vinca e nonofo i lo latou fale e tali ai a latou malo.

“Sa ou auai atu i le lotu ma i laua mo sina taimi,” sa faamatala ai e Vinca, “ae sa le fiafia tele lou aiga i mea tau lotu. O lou tama e tupuga mai Iutaia, ma o lou tina o se tagata o le lotu Luteru, ae sa matou lei ola ae i se lotu. Ona oo lea ua ou toe foi i le aoga.”

Sa asiasi mulimuli ane ia faifeautalai ia te ia mo sina taimi puupuu i Copenhagen. E ui sa fiafia Vinca i lea asiasiga, ae sa lei saunia o ia e talia le talalelei.

“Sa ou masii atu i le Aai o Sate Leki i se mea o le 1950,” sa fai mai ai Vinca. “Sa avea au ma se tausima’i, ae sa tatau ona faafou lo’u tusi faamaonia ia ou galue ai i le I.S.”

O le masii atu lea na ia maua ai se avanoa e aoao atili ai le Faa-Peretania. Na ia maua ai foi se isi avanoa e aoao ai e uiga i le Ekalesia. Sa ia nofo i le Fale o Ofagapi ma faigaluega i se ofisa o se fomai e faasaga mai i le isi ituauala. Sa ia taina foi le selo i le aufaili a le Utah Symphony ma faia ai ni uo lelei.

“Sa ou auai atu foi i le lotu ma i latou. Ma sa ou savalivali i le Lotoa o le Malumalu i le taimi o au malologa o le aoauli i aso uma. Ae sa ou

manatu pea o le lotu o se mea e mafai ona e filifilia e avea ma se vaega o lou olaga pe a e manao i ai.”

I le mavae ai o tausaga e lua i Sate Leki, sa masii atu ai Vinca i Sacramento, Kalefonia, ISA, ma nofo ai mo sina taimi puupuu faatasi ma se tasi o aiga o faifeautalai na aoaoina o ia i Tenimaka. Ina ua lava ana tupe e tausi ai o ia lava o se tausima’i tipitipi, sa ia alu ese atu ai ma nofo na o ia. Sa tafafao faamasani o ia ma le faifeautalai ma mulimuli ane ai fai le la faamau.

“Sa lei sologa lelei mea uma,” sa fai mai ai Vinca, ma ina ua faamutaina le la faamau, sa ia malaga ese atu, ma sa lei toe fesootai ai ma tagata o le Ekalesia.

E lei leva, ae feiloai Vinca ma Ward, o se fomai nifo ma se fomai faitaotoga o fofoga o le sa fanau ma ola ae i Sacramento. O ia o se alii malosi ma aulelei sa tautua o se alii o le neivi i le taimi o le taua. E ui e 11 tausaga e matua ai ia Vinca, ae sa matua tosina i ai o ia, ma faaipoipo ai loa i laua i le 1954.

Sa la faataua se fale e le mamao mai le mea sa ia faigaluega ai. E ui sa le mafai ona maua se la fanau, ae sa matua matagofie ma fiafia le la ulugalii. Sa la galulue, sa la faimalaga, sa tusiata ia Ward, ae sa faaauau pea ona



taina e Vinca ana musika. Sa lelei le olaga mo le tele o tausaga.

Sa maliu Ward i le 1985. Sa nofo pea Vinca i lo la fale seia oo pe tusa o le 1999, ina ua amata ona ia lagona le naunautai e masii ese atu. Sa telē lona fale, telē atu nai lo le mea sa ia manaomiaina, ma sa ia lagona ai se mana o se suiga. Sa ia mauaina se tamai taulaga na talafeagai mo ia i Haines, Alaska. Sa ia nofo ai iina, ma semanu e muta ai iina mea uma pe ana le toe o atu foi faifeautalai ma tuitui atu i lona faitotoa i le 2006.

Mulimuli ane, i le maea ai o le tele o avanoa, ma le tele o tausaga, ua fetau lelei le taimi.

“Ou te lei iloa tele lava se mea e uiga i mea tau lotu,” sa fai mai ai Vinca, “ae sa ou iloaina ni nai mea sa ala ai ona ou fesili, o mea sa ou le fiafia ai pe sa foliga mai sa ese lava.

“Ina ua ou aoao e uiga i lenei talalelei, sa fetau lelei mea uma i lau faalogo: o le ata o le faaolataga, o mea ua

faamoemoeina mai ia i tatou, o folafolaga ua faia, o le Tusi a Mamona. Ou te fiafia faapitoa lava i le aoaoga faavaa a le Ekalesia e uiga i galuega faalemalumalu mo i latou e maliliu ae lei mauaina le talalelei. Sa ou lagonaina ai le filemu; sa o se mea na mafai ona ou taliaina ona sa manino ma matala mai ia te au, e pei o le foi mai i le aiga.

“Sa iu ina ou faia le mea ua leva ona tatau ona ou faia. Ou te leiloa pe aisea sa umi ai ona ou le faia. Sa ou feiloai i le tele o tagata lelei, ma sa i ai uma so latou uunaiga i lau faaiuga ia auai i le Ekalesia. Sa tele ni tausaga na alu ai, ae o le papatisoina o le mea aupito sili lea ua ou faia.”

Sa papatisoina Vinca i le aso 14 Oketopa, 2006—i le aso fanau o lona toalua. I le tausaga mulimuli ane, sa ulu atu o ia i le malumalu mo le taimi muamua ma faamauina ai ia Ward (e ala i se tagata sui) mo le olaga nei ma le faavavau atoa. Mo Vinca, o le aafiaga o le auai i le malumalu ma le

faamauina i lana manamea pele “sa lematalitonuina le matagofie.”

I le mauaina ai o lenei faamanuiaga faalelagi o le faamauina i lana tane faapelepele, ua mana'o ai nei Vinca e faasoa atu i lona aiga ia faamanuiaga o le malumalu. E ui ua 86 tausaga lona matua ma o loo mafatia i le faaletonu o ona fatugao, ae ua uunaia lava o ia.

“Ou te faamoemoe o le a taliaina e lou toalua ma ona matua faapea ai ma ou matua ma ou tuagane ma uso le talalelei. E matua tele lava au galuega faalemalumalu e ao ona fai.

“O se tasi o galuega faatino autu o le olaga i le taimi nei o le faia lea o le tele o galuega faalemalumalu ou te mafaia, ma le tele o gafa i le tele ou te mafaia. Ou te lagona ua i ai se mafuaaga o le nofo ai iinei. E tusa lava pe ou te ola ia atoa le 100 tausaga, e lelei lava. Ua i ai nei ni mea e fai. E lagona ai le fiafia, i le mafai ona faia.”

A o faliu atu Vinca ma pulatua atu i lona fale ma agai atu i totonu, sa faatumuina o ia i le faamoemoe lea e sau mai le talalelei a Iesu Keriso. O le avea ai ma tagata o lenei Ekalesia “ua avea ma faamanuiaga i le tele o auala le mafaitaulia. E te lagonaina le filemu o le mafafau. E te lagonaina le malosi tele. Pe a matuai matagofie lava mea uma, e i ai ou lagona faapea, ‘Oi sole, o le lagi lava lenei.’ Na te faatupuina le lagona ia te oe o le lotofaafetai mo le ola.”

O loo soifua nei Vinca ma se agaga o le lotofaafetai—ona o le afi o le talalelei ma le faamoemoe o le faavavau faatasi ma lona toalua alofa o loo mumu saesae i totonu ia te ia. ■

Mo nisi faamatalaga e uiga i le faamalosia o lau faaiipoipoga, tagai i le L. Whitney Clayton, “Faaiipoipoga: Matau ma Aoao,” Liahona, Me 2013, 83.

TALA FOU O LE EKALEZIA

Asiasi ane i le news.lds.org mo se faaopoopoga o tala fou ma mea e tutupu i le Ekalesia.

Ua Tofia Taitai Fou o Eria

Ua faasilasila mai e le Au Peresitene Sili ia suiga nei i tofiga faaleautaitai i eria e amata atu i le aso 1 o Aokuso, 2013. O uso uma o Au Peresitene o Eria o ni uso o le Korama Muamua po o le Korama Lua a Fitugafulu. ■

Au Peresitene o Fitugafulu



Ronald A. Rasband
E Lagolago i Eria Uma



L. Whitney Clayton
luta i Matu luta Aai o Sate Leki luta i Saute



Donald L. Hallstrom
Amerika i Matu Matusasae



Tad R. Callister
Amerika i Matu Sautesisifo



Richard J. Maynes
Amerika i Matu Matusisifo Amerika i Matu Sisifo



Craig C. Christensen
Idaho Amerika i Matu Tutotonu



Ulisses Soares
Amerika i Matu Sautesasae

Aferika i Sautesasae



Carl B. Cook
Fesoasoani Muamua



Dale G. Renlund
Peresitene



Kevin S. Hamilton
Fesoasoani Lua

Aferika i Sisifo



Terence M. Vinson
Fesoasoani Muamua



LeGrand R. Curtis Jr.
Peresitene



Edward Dube
Fesoasoani Lua

Asia



Larry Y. Wilson
Fesoasoani Muamua



Gerrit W. Gong
Peresitene



Randy D. Funk
Fesoasoani Lua

Asia i Matu



Koichi Aoyagi
Fesoasoani Muamua



Michael T. Ringwood
Peresitene



Scott D. Whiting
Fesoasoani Lua

Pasila



Jairo Mazzagardi
Fesoasoani Muamua



Claudio R. M. Costa
Peresitene



Eduardo Gavarret
Fesoasoani Lua

Keripiane



J. Devn Cornish
Fesoasoani Muamua



Wilford W. Andersen
Peresitene



Claudio D. Zivic
Fesoasoani Lua

Amerika Tutotonu



Kevin R.
Duncan
**Fesoasoani
Muamua**



Carlos H.
Amado
Peresitene



Adrián
Ochoa
**Fesoasoani
Lua**

Europa



Patrick
Kearon
**Fesoasoani
Muamua**



José A.
Teixeira
Peresitene



Timothy J.
Dyches
**Fesoasoani
Lua**

Europa i Sasae



Randall K.
Bennett
**Fesoasoani
Muamua**



Larry R.
Lawrence
Peresitene



Per G.
Malm
**Fesoasoani
Lua**

Mekisiko



Benjamín
De Hoyos
**Fesoasoani
Muamua**



Daniel L.
Johnson
Peresitene



Arnulfo
Valenzuela
**Fesoasoani
Lua**

Sasae Tutotonu/ Aferika i Matu



Bruce D.
Porter



Bruce A.
Carlson

**Faatautaia mai le
Laumua o le Ekalesia**

Pasefika



Kevin W.
Pearson
**Fesoasoani
Muamua**



James J.
Hamula
Peresitene



O. Vincent
Haleck
**Fesoasoani
Lua**

Filipaina



Ian S.
Ardern
**Fesoasoani
Muamua**



Brent H.
Nielson
Peresitene



Larry J.
Echo Hawk
**Fesoasoani
Lua**

Amerika i Saute Matusisifo



W. Christopher
Waddell
**Fesoasoani
Muamua**



Juan A.
Uceda
Peresitene



C. Scott
Grow
**Fesoasoani
Lua**

Amerika i Saute Saute



Jorge F.
Zeballos
**Fesoasoani
Muamua**



Walter F.
González
Peresitene



Francisco J.
Viñas
**Fesoasoani
Lua**



Saunia e Elder
F. Michael Watson
O Le Fitugafulu

Usiusitai:

○ LE ELEMENE TAUA ○ LE FAATUATUA

Ina tatou taumafai ia e ola i le usiusitai i poloaiga, mulimuli i le taitaiga faalelagi mai auauna filifilia a le Alii ma maua ai faamanuiaga folafolaina mai Lona aao.

O le usiusitai i tulafono ma poloaiga a le Atua e taua ma o le a taua pea mo i latou e saili ia avefa ma ē mauaina faamanuiaga folafolaina a le Faaola.

Ia Me i le 1833, na maua ai e le Perofeta o Iosefa Samita se faaaliga lea na folafola mai ai e le Alii:

“O le upu moni o le iloa lea o mea e pei ona i ai, ma e pei ona sa i ai, ma e pei ona o le a oo mai. . . .

“E leai se tagata na te mauaina le atoatoaga vagana ai ua ia *tausi i poloaiga [a le Atua]*.

“O ia o le e tausia ana poloaiga, e maua e ia le upu-moni ma le malamalama, seia oo ina faamamaluina o ia i le upumoni ma iloa e ia mea uma” (MF&F 93:24, 27–28; ua faaopoopo le faamamafa).

O le suesue ma usiusitai i upumoni o loo maua i tulafono ma sauniga o le talalelei, tatou te aoao i ai ma mauaina faamanuiaga folafolaina o le talalelei. E tusa ai ma le potō o le Tama Faalelagi ma Lana taimi, ua avanoa ai nei upumoni o loo taialaina ai le Au Paia o Aso e Gata Ai mo fanau uma a le Atua. Aua, e pei ona tautino mai o Ia, “O

la’u galuega ma lo’u mamalu lenei—ia aumaia le tino ola pea ma le ola faavavau o le tagata” (Mose 1:39).

Ua fautua mai lo tatou perofeta pele, o Peresitene Thomas S. Monson: “Usitai i tulafono a le Atua. Ua tuuina mai ia i tatou e se Tama Faalelagi alofa. A usitaia, o le a atili faamalieina ai o tatou olaga, ma faaititia ai le lavelave. O le a faigofie atu ona onosaia o tatou luitau ma faaftauli. O le a tatou maua faamanuiaga folafolaina a le Alii. Na Ia saunoa, ‘E manaomia e le Alii le loto ma se mafaufau nau-nautai; ma o le a aai i latou e naunautai ma usiusitai i le tamaoaga o le laueleele o Siona i nei aso e gata ai.’”¹

E talitutusa lava le saunoaga a Peresitene Monson ma ni upu i se taimi na muamua atu, lea na tautino atu e Nifae i lona tama, “O le a ou alu ma fai mea ua poloaiina e le Alii, aua ua ou iloa e le tuuina mai e le Alii ni poloaiga i le fanauga a tagata, vagana o le a saunia e ia se ala mo i latou ina ia mafai ai ona latou faataunuuna o le mea ua ia poloaiina ai i latou” (1 Nifae 3:7).

E i ai se viiga a tamaiti e faamanatu mai ai ia i tatou lo tatou tiute ma le taitaiga:





E tele taimi, o i latou e mananao e faitaulia faatasi ma e talitonu, ua i ai le manao e avea ma e mulimuli ma le usitai i le upumoni. E faapena le 42 o tagata sa auai i se konafesi faaleitu i Kananga, Ripapelika Temokarasi i Congo. O le usiusitai i uunaiga a le Agaga ma faatasi ai ma le faatuatua i laa taitasi, sa latou savavali ai i aso e ono ina ia mafai ai ona latou auai i le konafesi.

Ou te alu; e fai mea ua poloai mai ai le Alii.

Ou te iloa e saunia e le Alii se ala; e manao o ia ou te usitai.²

A tatou manatua le fautuaga a lo tatou perofeta ina ia tausia ma le faamaoni polo-aiga, ma a tatou manatua le tali a Nifae i lona tama, o le a avea i tatou ma tagata faamanuiaina.

O le mulimuli ai i le taitaiga mai le agelu o Moronae, na tau atu ai e le Perofeta o Iosefa i lona tama faalelalolagi mea na faaali atu [ia te ia]. I le iloina ai e le tama o Iosefa Samita o le a tuuina atu i lona atalii ia papatusi auro, sa ia faapea atu ai “ua mai le Atua, ma fai mai ia te au ou te alu ma fai e pei ona poloaiina ai e le avefeau” (Iosefa Smaita—Talafaasolopito 1:50). Soo se mea lava e le usitai ai i le fautuaga na maua e Iosefa mai le lagi atoa ma le lalolagi sa ono suia ai le ala o le talafaasolopito.

O Afea e Mafai ai Ona Matou Papatiso?

E tatalo o tatou faifeautalai ona o lea ma fai, i le faatuatua o le a le tuuina mai e le Alii se poloaiiga ia i latou sei vagana ua Ia saunia se ala e mafai ai ona faamanuiaina i latou e ala i lo latou usiusitai ma le naunautai e auauna atu. Ua latou faatuatua Lana folafolaga: “Ma ai se na te talia outou, o iina o le

a Ou i ai foi, ona o le a Ou alu muamua atu i o outou luma. O le a Ou i ai i lo outou lima taumata ma lo outou agavale, ma o le a i ai lo’u Agaga i o outou loto, ma sio faataamilo outou e a’u agelu, e sapaapapai outou i luga” (MF&F 84:88).

E toatele tagata o e saili ma le naunautai i le upumoni, e mulimuli i aoaoga a a tatou faifeautalai. E tele taimi, o i latou e mananao e faitaulia faatasi ma e talitonu, ua i ai se manao e avea ma e mulimuli ma le usitai i le upumoni. Ua faapena foi ona latou nau-nau e o ma faia.

E faapena le tulaga o tagata e 42 sa auai i se konafesi faaleitu i Kananga, Ripapelika Temokarasi i Congo. Na latou o mai ma le naunautai ona sa latou faitau ma faalogo i upumoni o le Toefuataiga, sa amata ona latou ola i mataupu faavae o le talalelei, ma sa latou mananao e avea ma tagata o Le Ekalesia a Iesu Keriso o le Au Paia o Aso e Gata Ai.³

O le usiusitai i uunaiga a le Agaga ma faatasi ai ma le faatuatua i laa taitasi, sa latou savavali ai i aso e ono ina ia mafai ai ona latou auai i le konafesi. O la latou fesili muamua lava i le na pulefaamalumalu ina ua taunuu o le, “O afea e mafai ai ona matou papatiso?”

Sa latou malamalama o le a iu lava ina faia e le Alii ia mafai ona aoaoina i latou e faifeautalai i o latou fale ma aumaia ia i latou le upumoni ua leva ona latou sailia. Pe tusa ma le 200 isi sa le gafatia le malaga e ono-aso, ae sa latou faatalitali mo se upu faapea e le o toe mamao ae saili atu i latou e faifeautalai.

O Se Tatalo o le Faatuatua

I se nuu lata ane o Angola, sa taufaamata’u le fili ina ia taofia le manao o le Au Paia faatuatua ma le usiusitai ia vaai ua mauaa le talalelei i lo latou laueleele. Na auina atu e le Alii Ana auauna e tatala faitotoa mo le

galuega faafaifeautalai, peitai i le po o le aso na tuu e malaga ai, e lei maua atu lava o latou visa. Ina ua asiati atu sui o le Ekalesia i le ofisa o femalagaaiga pe ua tuai i se a, ae sa lei taliaina i latou.

Faatasi ai ma le faatagaga mai le Au Peresitene Sili e faapaia Angola mo le galuega faafaifeautalai, na faatalitali ai Elder D. Todd Christofferson o le Korama a Aposetolo e Toasefululua ma isi i Johannesburg, Aferika i Saute mo se upu. O le taimi foi lea, sa taumafai ai se tagata lotu o Paulina Lassalete da Cunha Gonçalves e tatala le mea sa foliga mai o se faitotoa na tapunia. Sa faamoemoe o ia e maua mai ni tusi o le valaaulia o le a maua ai se faatagaga mo le aumalaga a le Ekalesia e ulufale atu ai i Angola. O le taimi lava e i ai iina, ona mafai loa lea ona maua o latou visa talafeagai.

Sa na o ni nai minute ona tapunia lea o ofisa o le malo i Angola, sa faapotopoto ai Elder Christofferson ma i latou sa faatalitali i ofisa o le Eria a Aferika Sautesasae. Ona latou tootutuli lea e tatalo, sa ia ole atu ai i le Tama Faalelagi ina ia faasalavei mai. I lena lava itula, ina ua faatoa maea lana tatalo o le faatuatua, sa sainia ai tusi o le valaaulia. Sa saunia e se Tama Faalelagi alofa le ala mo le aso o le faapaiaga. I le talosaga a Elder Christofferson, sa tuuina atu ai se tatalo faamaualalo o le faafetai mo le vavega na toina mai.⁴

Na tatagi mai le manaia ma le le sese o upu o se pese a le Peraimeri:

*Tama Faalelagi, pe o e i ai moni ea iina? Pe e te faafofoga ma tali mai i tatalo?*⁵

Ioe, o loo i ai o Ia iina, ioe foi, Na te tali mai i tatalo a Ana fanau usiusitai.

O le usiusitai o se itu taua lea i perofeta, ma o loo avanoa lenei punavai o le malosiaga faaleagaga mo tagata uma o e mulimuli ma le faatuatua i auauna a le Atua. Na faamamafa mai e Peresitene Monson i le Au Paia le manaomia o le usiusitai i poloaiga, aua “o loo i ai le saogalemu iina; o loo i ai foi le filemu.”⁶

Ina tatou taumafai ia e ola i le usiusitai i poloaiga, mulimuli i le taitaiga faalelagi mai auauna filifilia a le Alii ma maua ai faamanu- iaga folafolaina mai Lona aao. ■

FAAMATALAGA

1. Thomas S. Monson, “Talitonu, Usitai, ma Tumau,” *Liahona*, Me 2012, 128.
2. “Lototele o Nifae,” *Tusipese a Tamaiti*, 121.
3. Sa ou i ai i le konfaesi faaleitu i Kananga lea sa auai ai tagata sailiili e 42.
4. Sa faamanuiaina au i le molimauina muamua o mea na tutupu i Johannesburg ma le faimalaga faatasi ai ma Elder Christofferson i Angola; mo se lipoti o talafou e uiga i lana asiatisa ma Elder Jeffrey R. Holland i Aferika, tagai “Apostles Bless Two African Nations,” *Church News*, Nov. 6, 2010, 8–10.
5. “O Le Tatalo a le Tamaititi,” *Tusipese a Tamaiti*, 6.
6. “Tausi Poloaiga,” *Tusipese a Tamaiti*, 68–69.

O le usiusitai o se itu taua lea i perofeta, ma o loo avanoa lenei punavai o le malosiaga faaleagaga mo tagata uma o e mulimuli ma le faatuatua i auauna a le Atua.



Mauaina o le Saogalemu

I LE TALALELEI

E tulaga ese lava tagata o le Ekalesia i Kenya a o latou ola ai i le talalelei ma fausia ni sulufaiga mai le lalolagi.

Saunia e Matthew D. Flitton

Mekasini a le Ekalesia

I se faitau aofai o tagata e silia ma le miliona, o Nairopi, Kenya, o le aai aupito tumutumu lea i Aferika i Sasae. O se nofoaga pisi e tumu i taavale, loli, ma veni *mutatus*—ia e avea o se tautua a pasi e umia saoloto—e femasauai i totonu o auala. O se aai o ala nofoaafi, tagata tafafao, ma falegaosimea ma o le taulaga lona lua lea le leva o mea tau fefaatauaiga o oloa i le konetineti.

Ae i le itu i saute, e itiiti ifo ma le lima maila (7 km) mai le totonugalemu o le laumua o Kenya, o loo i ai se nuu maotua toafilemu. I le Nairobi National Park o loo puipua le laueleele ma foliga mai na i ai mo le faitau selau o tausaga. I le tafailagi o le aai, o nameri, pafalo vai, manuvao, sepora, solofanuavai, 'aila, povi, ma puaavai e feofeoai solo ma 'aai i le vao. O leona e momoe i lalo o laau mafala. E ofo atu e le paka i nei manu se sulufaiga mai le lofituina o atina'e.

I Kenya atoa o loo i ai lava ni malutaga laiti ifo o isi ituaiga. Ua fatuina e tagata o le Ekalesia ni malutaga mai malosiaga o le lalolagi. E ala i le ola ai i le talalelei, o loo latou fausia ai ni nofoaga paia e tutu ai (tagai MF&F 45:32; 87:8).

Mauaina o le Malosi e ala i Tulaga Faatauaina

Fai mai Opra Ouma o le manatuaina o tulaga faatauaina o Tamaitai Talavou na ia maua ai le malosi e ala ai i le talalelei. “E tusa lava pe ou te le i ai faatasi ma le autalavou nofofua matutua a le Au Paia, ae a ou alu atu i le lalolagi, e mafai lava ona ou faaaogaina ia tulaga faatauaina a Tamaitai Talavou ma saogalemu ai pea,” na ia fai mai ai.

Na muai aoaoina e Opra nei tulaga faatauaina a o lei papatisoina o ia. Ina ua 17 ona tausaga, sa vaai Opra i faifeautalai i luga o le auala i se tasi o aso ma mafaufau ai pe o ai i laua. Sa ia suesue i le talalelei mo se tausaga ma sa papatisoina ai ina ua atoa lona 18 tausaga. Sa faamalosia e le faalapotopotoga a le Au Paia o Aso e Gata Ai o ia faaleagaga.

“Pe a ou i ai i le lotu faatasi ma le autalavou nofofua matutua, ou te lagonaina le saogalemu, ae a ou i ai i fafo atu i o, ou te le lagonaina le saogalemu tele ona o le tele o taimi e na o au ai lava le tagata o le Au Paia o Aso e Gata Ai i le vaega,” sa ia fai mai ai. “O nisi taimi e luitauina ai ona o tulaga faatonuina o le lalolagi ma tulaga faatonuina a le Ekalesia e matua eseese lava.”




Opra Ouma

Pipii i le Ai Uamea

Ua fesoasoani suesuega o tusitusiga paia ia Stephen Odhiambo Mayembe e maua tali ia na te fai mai e le mafai ona tatou maua e i tatou lava. “E ala i le suesueina o tusitusiga paia, e mafai ai ona tatou mauaina tali i nisi o faafitauli tatou te oo i ai i o tatou olaga mai lea aso i lea aso,” sa ia fai mai ai. “Ma e ala foi i le suesueina o tusitusiga paia, tatou te maua ai lena lototele e tumau ai e oo i le iuga ona o tusitusiga paia o le a i ai pea iina e aoao i tatou ma ta’u mai ia i tatou le mea e fai.

O le suesueina o le Tusi a Mamona sa fesoasoani ia Stephen e maua ai se molimau i le Ekalesia. I le taimi o se asiasiga a le uso o lona tina o le sa auai i le ekalesia, na ia valaaulia ai Stephen la te o i le lotu. Ina ua amata ona ia faitauina le Tusi a Mamona, sa ia tatalo ai e fia iloa pe moni ma ia maua ai se tali.





TAUSISI I TULAGA FAATONUINA O LE TALALELEI

“E tatau ona tatou faaeteete i se lalolagi ua mamao ese lava mai mea faaleagaga. E taua lo tatou teenaina o soo se mea e le ogatusa ma o tatou tulaga faatonuina, teenaina i le faagasologa ina ia lafoaia ai le mea e sili ona tatou manaomiaina: le ola e faavavau i le malo o le Atua. O le a i ai pea matagi o faaaitaui i o tatou aiga mai lea taimi i lea taimi, aua o mea ia e le mafai ona tatou sosola ese mai ai i lenei olaga faaletino. Peitai, o le a saunia lelei atili ai i tatou e taulimaina ia mea, ia aoao mai ai, ma faatoilaloina ai pea afai o i ai le talalelei i le faavae o o tatou olaga atoa ai ma le alofa mo le Faola i o tatou loto.”

Peresitene Thomas S. Monson, “Tutu i Nofoga Paia,” *Liahona*, Nov. 2011, 83–84.



Stephen Odhiambo Mayembe

Na ia fai mai o le faitauina soo o tusitusiga paia ua fesoasoani ia te ia e tausia tulaga faatonuina o le Ekalesia e tusa lava pe fesiligia e i latou o siomiaina o ia ona talitonuga. “I le avea ai ma se tagata o le Ekalesia, ua faamalosia ai lou faatuatua, ma e ala i lena mea ua mafai ai ona ou fai atu e faapea e le mafai ona toe maluelue [tagai Iakopo 7:5],” na ia fai mai ai.

Faatalitali i le Alii

Ua iloa e Sharon Poche e faapea o le filifili ina ia ese ua faigofie ai ona ola i le talalelei. Ua tuuto atu o ia i le tausia o poloaiga, ma ua faaaloaloga e ana uo lena filifiliga. Ua ia filifili e taofia o ia mai tulaga ia o le a faafaigata ai ona ola amiotonu.

“Pe a e filifili e taalo i luga o lena laina, lena laina manifinifi moni, ona faasolo fai-gata lea aua e mafai ona e pa’u i lalo i soo

se taimi,” na ia fai mai ai e uiga i le laina i le va o le lelei ma le leaga.

Na maua e Sharon le Ekalesia a o 14 ona tausaga ina ua filifili lona tina e papatiso. O le faitauina o le Tusi a Mamona sa alu ai le tele o taumafaiga ona o Sharon, o se tagata o le itu-aiga Nandi, e tautala i le Kalenjin, o lana gagana muamua lea. E ui i faigata, sa amata lava ona ia susesueina le Tusi a Mamona i le Faa-Peretania. “Sa ia te au lenei lagona e faapea o se mea lelei lenei, ma sa ou maua se lagona mafanafana, o lea sa ou faaauau ai. Sa ou tatalo seia oo ina ou iloa e moni,” o lana tala lea.

Sa manao Sharon e papatiso, ae sa le faa-tagaina e lona tama. O lea mo le fa tausaga,



sa auai ai pea Sharon i le lotu, seminare, ma gaoioiga a le autalavou a o ia faatalitali mo le avanoa e auai ai i le Ekalesia.

Ina ua 18 tausaga o Sharon, sa papatiso loa o ia ma faamauina. Sa ia aoga i le kolisi ma suesue i mataupu tau le mafaufau. Sa ia faaipoipo atu ia Joseph Poche ia Fepuari 2013. E lei pine, ae la malaga atu i le Malumalu o Johannesburg Aferika i Saute ma faamauina ai. Sa ia fai mai o le suesueina o le talalelei ua fesoasoani ia te ia e taulai atu ai i mea taua i se lalolagi lea ua faigofie lava ona faafenumiaia.

“Ou te iloa le uiga atoa o le olaga ma le mafuaaga ua tatou i ai iinei i le lalolagi,” o lana tala lea. “O lena malamalama ua fesoasoani ia te au ia taulai atu ai i mea ua sili ona taua.”

Malosi Faatupulaia

I totonu o le Nairobi National Park o loo i ai se malutaga mo puaasami. O lenei fale o loo tausia ai ma fesuisui ai nofoaga o lenei manu ua tau mou atu i isi paka e fesoasoani ai ia toefuatai le faitau aofai o manu, lea sa



ATA MAI FAALOLOGA A SHARON POCHE

Joseph ma Sharon Poche


tafanaina ma toetoe ai lava a le toe i ai. Ua faamamaluina o se tasi o malutaga sili ona faamanuiaina ma taua i Kenya.

E faapena foi, ua saunia e le talalelei ni malutaga lea e mafai ona o mai i ai tagata o le Ekalesia, e maua ai le malosi, maua ai le lototele e faasalalau atu ai le talalelei, ma atiae ai sootaga malolosi o le faatuatua. ■

Mo nisi faamatalaga e uiga i lenei autu, tagai i le Robert D. Hales, “Tutu Malolosi i Nofoga Paia,” Liahona, Me 2013, 48.

Lalo: O puaasami o loo ai vao i le Nairobi National Park.





**Saunia e Elder
Dallin H. Oaks**
O Le Korama
a Aposetolo e
Toasefululua

I LANA LAVA TAIMI, I Lana Lava Ala

*O faaaliga o se mea moni lava. E oo mai i le ala a le Alii
ma e tusa ai ma le faatulagaga o taimi a le Alii.*

Ou te fia vailiilia nisi o mataupu faavae ia e faatatau i fesootaiga uma mai le Agaga—o fesootaiga i le tagata o loo aoao atu, i le tagata o loo saili e aoaoina, ma i tagata uma o le Ekalesia.

Muamua, e tatau ona tatou iloaina o le a fetalai mai le Alii ia i tatou e ala mai i le Agaga i Lana lava taimi ma i Lana lava ala. E toatele tagata e le o malamalama i lenei mataupu faavae. Latou te talitonu e faapea seiloga lava latou te saunia ma i le taimi e talafeagai ma o latou tulaga, ona mafai lea ona latou valaau atu i le Alii ma o le a Ia vave tali mai, e oo lava i ala patino ua latou malilie i ai. E le oo mai faaaliga i lena ala.

Agavaa mo Faaaliga

O le mea taua i soo se taumafaiga e maua se faaaliga, o se tautinoga lea e faia mea uma tatou te mafaia i a tatou lava taumafaiga ma faaiuga. O lona uiga e manaomia ona tatou auauna atu ma galulue.

O le agaigai i luma i a tatou auaunaga ma galuega o se ala taua lea e agavaa ai mo faaaliga. I au suesuega o tusitusiga paia ua ou matauina ai, o le tele o faaaliga i fanua a le Atua e oo mai i taimi latou te galulue ai, e le o taimi latou te nofonofo ai i o latou apitaga ma faatalitali i le Alii e ta'u atu ia i latou le laasaga muamua e faia.

Mo se faataitaiga, e taua le matauina o le faaaliga lea ua lauiloa nei “o le Afioaga ma le Finagalo o le Alii e faatatau i le tolauapiga a Israelu” (MF&F 136:1) sa lei



tuuina atu i Navu a o fuafuaina e le Korama a le Toasefululua le malaga tele mai Navu i na aso faanoanoa lea na sosoo ma le Faamaturoida o le Perofeta i le 1844; sa lei tuuina atu foi i le auvai i sisifo o le Vaitafe o Misisipi. Sa tuuina atu i Uinita Kuota, Nebraska, ina ua uma ona faaalu e le Au Paia se tausaga faigata na malaga mai ai i le itu sisifo o Navu ma sopo atu i Iowa i tolauapiga le tumau i le Vaitafe o Misuri. O le faaaliga ina ia taiala le malaga a le Au Paia e sopoia laufanua valevalenoa na tuuina mai i le Aso 14 o Ianuari, 1847, ina ua pasia e le Au Paia pe tusa o le tasi vaetolu o le ala i vanu o atumauga.

O le a tatou mauaina uunaiga a le Agaga pe a tatou faia mea uma tatou te mafaia, pe a tatou galulue i fafo i le la nai lo le nofonofa i le paolo ma tatalo mo se taitaiga po o le a le laasaga muamua e fai. E oo mai faaaliga i taimi e galulue ai fanau a le Atua.

O lea la tatou te faia ai mea uma tatou te mafaia. Ona tatou faatalitali lea i le Alii mo Lana faaaliga. Ua i ai lana lava taimi faatulagaina.

Taimi ma le Ituaiga

Pe tusa ma le 35 tausaga talu ai, a o avea au ma peresitene o le Iunivesite o Polika Iaga, sa matou faia ai ni fuafuaga e tauanau ai le peresitene o le Iunaite Setete e saunoa i le iunivesite. Sa i ai o matou taimi patino e talafeagai lelei mo i matou ma ua matou manatu i ni mea matou te mananao e saunoa atu ai o ia ma faia a o i ai o ia iina. Ae sa lava le atamai o i matou uma e iloa ai sa le mafai ona matou faafesootaia le au taitai maualuluga i le Iunaite Setete ma valaaulia o ia e susu mai i le lotoa o le BYU—ma saunoa atu i le 26,000 tagata—ma faia ai ni tuutuuga i lona susu atu.

Sa matou iloa a valaaulia le peresitene, e tatau ona matou faapea atu, “O le a matou talia lau susuga i soo se aso e mafai ona e susu mai ai, ma soo se taimi e te finagalo e te susu mai ai atoa ai ma soo se mea e te finagalo e saunoa ai ma fai a o e i ai iinei. O le a matou fetuunaia a matou fuafuaga ma faatulagaga atoa i lau asiasiga.”

Ia, afai o le ala lena e tatau ona talosagaina ai e se nuu o tagata e 26,000 le pule silisili o se malo, e le o se mea la e ofo ai le faapea e leai se tulaga o se tagata e toatasi—po o le a lava le taua e i ai—e tuu ai ni tuutuuga pe faia ai ni taimi patino mo se asiasiga po o se fesootaiga mai le Pule Silisili i le atulaulau.

O le mea moni, o le mataupu faavae lenei a le Alii ua faaaliga mai i Lana fanau i le faaaliga sili ua lomina i le vaega e 88 o le Mataupu Faavae ma Feagaiga. Na fetalai mai le Alii, “Faalatalata mai ia te au ma o le a Ou faalatalata atu ai ia te outou; saili mai ia te au ma le filiga ma o le a outou maua ai au; ole mai ma o le a outou maua ai; tu’itu’i mai, ma o le a tatala atu ai ia te outou” (fuaiupu e 63).

O le isi, na tautino mai e le Alii afai e tautasi o tatou mata i Lona mamalu, o le a faatumulia o tatou tino atoa i le malamalama ma o le a mafai ona tatou malamalama ai i mea uma. Ona sosoo lea, ma Lana faatonuga lea na faaauau i le folafolaga sili lenei: “O lea, ia outou faapaia outou lava ina ia tau-tasi o outou mafaufau i le Atua, ma e oo mai aso o le a outou vaai ai ia te ia; ona o le a afe ese e ia le veli mai ona fofoga ia te outou, ma o le a faia lena mea i lona lava taimi, ma i lana lava ala, ma e tusa ai ma lona lava finagalo” (fuaiupu 68; faaopoopo le faamamafa).

O le mataupu faavae ua taua i lena faaaliga ua faata-tau lea i fesootaiga uma mai lo tatou Tama Faalelagi. E le mafai ona tatou fai faamalosi ni mea faaleagaga e tutupu.

I le tele lava o tulaga, o le “i lana lava ala” e le o le papa o faititili po o le emo o uila ae o le mea o loo taua e tusitusiga paia o le “leo filemu ma le itiiti” (1 Tupu 19:12; 1 Nifae 17:45; MF&F 85:6). Ua aveseseina e nisi lenei mataupu faavae. O se taunuuga, ua matuai saili atoa ai nisi mo se faaaliga maoae ua faamaumauina i tusitusiga paia ma ua le mafai ai ona iloina le “leo filemu ma le itiiti” lea e tuu atu ia i latou. E tai pei lava lenei mea o le fai o la tatou faaiuga o le a tau o se faiaoga e avaavau tatou te aoao

*E manaomia ona
tatou iloina e sea-
sea fetalai leotele
mai le Alii. O Ana
savali e toetoe lava oo
mai i taimi uma i se
musumususu.*



Mai faaaliga ia Ailama Samita (faaaliga i luga) ma Oliva Kaotui, ua tatou iloa ai e aoao e le Atua i tatou e ala i le mana o Lona Agaga, lea e faapupulaina ai o tatou mafaufau ma tautala mai ai le filemu ia i tatou e uiga i fesili tatou te ole atu ai.

mai ai, ae o le a tatou mumusu e faalogo atu i aoaoga e sili atu ona taua pe a tuuina mai i se musumusu.

E manaomia ona tatou iloa ina e seasea lava fetalai leo-tele mai le Alii. O Ana savali e toetoe lava oo mai i taimi uma i se musumusu.

Faaaliga o se Faamalalamamaga ma le Filemu

O se tasi o faamalalamamaga aupito silisili o le auala e aoao mai ai le Agaga ia i tatou o loo i ai lea i le faaaliga na tuu atu ia Oliva Kaotui i Haremoni, Penisilevania, ia Aperila 1829. I le faaaliga lenei na ta'u atu ai e le Alii ia Oliva:

“Toe, faauta, o le a Ou ta'u atu ia te oe i lou mafaufau ma lou loto, e ala i le Agaga Paia, lea o le a oo atu i ou luga ma lea o le a mau i lou loto.

“O lenei, faauta, o le agaga lenei o faaaliga” (MF&F 8:2–3; faaopoopo le faamamafa).

E faapena foi, ina ua ta'ua e le Perofeta o Iosefa Samita le agaga o faaaliga o le “atamai mama aiai,” lea e “mafai ona e maua ai ni manatu e vave oo atu i lou mafaufau.”¹ I se isi faaaliga, sa faamanatu atu ai ia Oliva na ia ole atu i le Alii ma “o le tele o taimi na e ole mai ai na e maua ai faatonuga mai lo'u Agaga” (MF&F 6:14). Na faapefea ona oo mai lena faatonuga? “Faauta,” na fetalai mai ai le Alii, “ua e iloa na e ole mai ia te a'u ma sa Ou faapupulaina

lou mafaufau” (fuaiupu 15; faaopoopo le faamamafa).

O lena lava aoaoga e tasi sa toe tuu mai i se faaaliga ia Ailama Samita lea na fetalai mai ai le Alii, “E moni, e moni, Ou te fai atu ia te oe, o le a Ou faaali atu ia te oe 'ai lo'u Agaga, lea o le a faapupula ai lou mafaufau, lea o le a faatumulia ai lou agaga i le olioli” (MF&F 11:13; faaopoopo le faamamafa). O faamatalaga sili ia e uiga i le ala e fesootai mai ai le Alii ia i tatou e ala i Lona Agaga.

I se isi faatonuga ia Oliva Kaotui, sa faamanatu atu ai e le Alii ia te ia e uiga i le taimi sa ia tatalo ai ina ia ona iloa ina “le moni o nei mea” (MF&F 6:22). Ma sa faamatala mai e le Alii le auala na Ia taliina ai lena tatalo ma tuu atu se faaaliga ia Oliva: “Ou te lei tautala atu ea le filemu i lou mafaufau e uiga i le mataupu? O le a se molimau sili atu e mafai ona e maua mai lo lena mai le Atua?” (fuaiupu 23; faaopoopo le faamamafa).

Mai nei faaaliga ua tatou iloa ai e aoao mai e le Atua i tatou e ala i le mana o Lona Agaga, lea e faapupulaina o tatou mafaufau ma tautala mai le filemu ia i tatou e uiga i fesili ua tatou ole atu ai.

Faaaliga o Se Lagona

Ua tatou aoao foi mai nei faaaliga e faapea o le aooina e le Agaga e le o se mea e tupu fua. E masani lava o



Sa lei vave fesootai mai le Alii ia Atamu ina ua ia usiusitai i le poloaiga e osi atu se taulaga i uluai manu o ana lafu. Ua faapea mai tusitusiga paia, “Ma ina ua mavae aso e tele sa oo mai se agelu a le Alii ia Atamu” (Mose 5:6).

fesootaiga a le Alii e le oo mai sei vagana ua tatou suesueina mataupu i o tatou lava mafaufau. Ona tatou mauaina lea o se faamautinoaga.

Sa faamalamalama atu lea faagasologa ia Oliva Kaotui i se isi faaaliga na maua i Haremoni, Penisilevania, ia Aperila 1829. Sa faamatala atu e le Alii le mafuaaga na le mafai ai ona faaliliu e Oliva le Tusi a Mamona:

“Faauta, sa e le malamalama; sa e manatu o le a Ou tuu atu ia te oe lena mea, ae e te lei mafaufau i ai ae na o lou ole mai ai ia te a’u.

“Ae, faauta, Ou te fai atu ia te oe, *e ao ina e suesue i ai i lou mafaufau*; ona ao lea ona e ole mai ia te au pe ua sao, ma afai ua sao, o le a Ou faia ia mu lou loto i totonu ia te oe; o lea, *o le a e lagona ai ua sao*” (MF&F 9:7–8; faaopoopo le faamamafa).

Atonu o se tasi lenei o aoaoga aupito sili ona taua ma sili foi ona malamalama sese i ai i le tusi atoa o le Mataupu Faavae ma Feagaiga. O aoaoga a le Agaga e tele lava ina oo mai o ni lagona. O lena mea moni e matua sili ona taua, ae e malamalama sese lava i ai nisi o tagata i lona uiga. Ou te iloa ni tagata e manatu latou te lei mauaina lava se molimau mai le Agaga Paia ona latou te lei lagonaina lava o latou loto “ua mu i totonu” o i latou. O le mu o le loto, ou te fautua atu, e le o se lagona o se vevela o le tino e pei o mu ae o se lagona o le filemu ma le mafanafana ma le toafimalie ma le lelei.

Faaaliga E Le Tumau

O faaaliga e le tumau. O le ala a le Alii e tuu ai faatapu-laa pe faafia ona Ia fetalai mai ia i tatou e ala i Lona Agaga. I le le malamalama ai i lenei mea, ua taitai sese ai nisi i lo latou faamoemoe o le a maua faalausosoo ia faaaliga.

I le faaaliga ai o lona finagalo e uiga i ala e galue ai le Agaga, sa saunoa ai Peresitene Boyd K. Packer, le Peresitene o le Korama a Aposetolo e Toasefululua, “Ua ou aoaoina o aafiaga malolosi, ma le uunaia e le oo mai faalausosoo ia i tatou.”²

Ina ia faaali atu lena manatu, mafaufau i le mea ua tatou aoaoina e uiga i o tatou uluai matua ina ua tuliese mai le Faatoaga o Etena ma tapunia i fafo mai le afoaga o le Alii. Na tuu atu e le Alii ia Atamu se poloaiga e tatau ona ia osi atu taulaga i uluai manu o ana lafu e fai ma taulaga i le Alii. Na ia usiusitai. Pe na fesootai vave le Alii ma ia? O loo tau mai i tusitusiga paia: “*Ma ina ua mavae aso e tele sa oo mai se agelu a le Alii ia Atamu*” (Mose 5:6; faaopoopo le faamamafa).

Sa saunoa mai William E. Berrett, o se tasi o faiaoga lelei tele o le talalelei, o le sa avea o se taitai i le BYU faapea ai ma le Ofisa o Aoga a le Ekalesia, i le mea lenei e uiga i le mataupu o faaaliga tumau ma faifai pea: “O i latou e tatalo ina ia tuu atu vave e le Agaga ia i latou se taitaiga i mea iti uma, ua latou lafoina i latou lava i agaga

leaga ia e foliga mai ua saunia i taimi uma e tali mai i a tatou olega ma tatou le mautonu ai. . . . O tagata ua ou iloa ua sili ona le mautonu i lenei Ekalesia o i latou ia o e saili atu i faaaliga patino i mea uma lava. Latou te mananao i le faamautinoaga patino mai le Agaga mai lava i le taeao e oo i le po i mea uma latou te faia. Ou te faapea atu o i latou o tagata aupito sili ona le mautonu ua ou iloa ona e foliga mai i nisi taimi o le tali e sau mai le punavai sese.”³

Sa saunoa foi le Perofeta o Iosefa Samita i se mea faapea. Pe a “faatoga atu [le Au Paia] i le nofoalii o le alofatu-noa,” sa ia fautua mai ai, e le tatau ona latou faia i ni mataupu e leai se taua ae e tatau ona “tatalo atu ma le naunautai mo meaalofo silisili.”⁴ O se mataupu faavae taua lena. Tatou te tatalo pea lava pea mo le taitaiga, ae e le tatau ona tatou faamoemoe i ni faaaliga *faifai pea*. Tatou te faamoemoeina faaaliga *faifai pea*, o le faamautinoaga faifai pea lena o faaaliga i soo se taimi lava tatou te saili atu ai i le taitaiga ma ia tonu o tatou tulaga ina ia filifili ai le Alii atamai ma agaalofa e tuu mai ia i tatou.

Faaaliga ma le Molimau

E Tutupu Faaaliga. E faalogoina ia siufofoga mai tala atu o le veli. Ua ou iloa lenei mea. Ae o nei aafiaga e tulagaese. Ma a tatou mauaina se aafiaga maoae ma tulagaese, e seasea ona tatou talanoaina faalauaitetele ona ua faatonuina i tatou e aua le faia (tagai MF&F 63:64) ma ona ua tatou malamalama o le a tapunia ala o faaaliga pe afai tatou te faaali atu nei mea i luma o le lalolagi.

O le tele o faaaliga e oo mai i taitai ma tagata o le Ekalesia e oo mai e ala i le “leo filemu ma le itiiti” pe auala mai i se lagona nai lo se faaaliga vaaia po o se leo lea e tautala mai i ni upu patino i o tatou taliga. Ou te molimau atu i le moni a’ia’i o lena ituaiga o faaaliga, lea ua ou iloa ina o se aafiaga masani, e oo lava i aso taitasi, e taiala ai i tatou i le galuega a le Alii.

O le le malamalama ai i nei mataupu faavae o faaaliga, e tolopo ai e nisi tagata le faailoa o a latou molimau po o lo latou alualu i luma faaleagaga sei vagana ua tupu se mea faavavega. Latou te le iloina o le toatele o tagata— aemaise i latou na ola ae i le Ekalesia—o le faaaliga taua e tuuina mai ai ia i tatou se molimau, e le o se mea e tupu aloaia ae o se faagasologa. Na matauina e Elder Bruce R. McConkie (1915–85): “O le toe fanaufouina o se mea e

faasolosolo malie, vagana ai i nai mea tumaoti e matua ofoofogia tele e ala ai ona tusia i tusitusiga paia. Ae tusa ai ma le tulaga lautele o tagata o le Ekalesia, e toefanauina i tatou i sina vaega, e toefanauina i tatou i se malamalama ua faaopoopo ma se naunautai faaopoopo mo le amiotonu a o tatou tausia poloaiga.”⁵

E tatau ona tatou malamalama o le a fetalai mai le Alii ia i tatou i Lana lava taimi ma i Lana lava ala. E masani lava o le uiga lea o le mea ua taua e tusitusiga paia o le “leo filemu ma le itiiti” o le faamalalamalama. E tele lava ina moomia ona tatou faatino i luga o la tatou faautautaga sili, e faalagolago i uunaiga faatonutonu a le Agaga pe afai ua tatou se ese ma tapulaa faatagaina.

O faaaliga o se mea moni lava. E oo mai i le ala a le Alii e tusa ma le taimi faatulagaina a le Alii.

Ou te molimau atu e moni nei mea. Ua i ai ia i tatou le meaalofo o le Agaga Paia, o le aia tatau lea i le mafutaga faifai pea ma le Agaga o le Alii e molimau i le Tama ma le Alo, e taitai atu ai i tatou i le upumoni, e aoao ai i tatou i mea uma, ma ia aumai ai mea uma i lo tatou manatuaga (tagai Ioane 14:26; 16:13). ■

Mai se lauga na tuuina atu i peresitene fou o misiona i le aso 7 o Iuni, 2001.

FAAMATALAGA

1. Aoaoga a Peresitene o le Ekalesia: Iosefa Samita (2007), 139
2. Boyd K. Packer, *That All May Be Edified* (1982), 337.
3. William E. Berrett, i le Joseph Fielding McConkie and Robert L. Millet, *The Holy Ghost* (1989), 29–30.
4. Aoaoga a Peresitene o le Ekalesia: Iosefa Samita (2007), 138.
5. Bruce R. McConkie, “Jesus Christ and Him Crucified,” i le *Brigham Young University 1976 Speeches* (1977), 5.



O LE AUALA A LE TAITAI Faaaliga

Ua faasoa mai e taitai perisitua ma ausilali i le lotoifale ni mataupu faavae se fa ua fesoasoani ia i latou e galuhue ai i musumusuga i o latou valaauga.

Saunia e Richard M. Romney

Mekasini a le Ekalesia

Ina ua faatoa valaauina au, sa ou lagonaina le lofituina,” sa saunoa ai se peresitene o se paranesi lea ua auauna nei mo le tele o tausaga. “Sa ou maua le faatuatua o loo silafia e le Tama Faalelagi le auala e faamanuiaina ai tagata o le au paia ma o latou aiga, ae mafai faapefea ona ou iloaina le mea o Ia finagalo patino ai mo *au* e fai e fesoasoani ai ia i latou?”

Sa silafia e le peresitene ni mataupu faavae se lua na faamalositia ai o ia o se tagata liliu mai i le Ekalesia ma se tamā talavou: suesueina o tusitusiga paia ma le tatalo. O lea na ia faatinoina ai ma se faamoemoega ua faafouina.

“A o ou faia, sa ou lagonaina e tatau ona ou faitauina le mea o tau mai i le Mataupu Faavae ma Feagaiga 9:8, e ‘suesue i ai i lou mafaufau; ona ao lea ona e ole [atu i le Alii] pe ua sao.’ Ina ua ou toe faitauina na upu, sa ou iloaina ua leva lava ona taialaina au e le Alii i luga o le auala i faaaliga.”

O le auala lena e tatau ona malaga ai taitai uma ina ia mataalia ai i o latou valaauga. Ma a o latou saili atu i musumusuga ia latou te agavaa i ai, latou te aoao pea lava pea e i ai mataupu faavae patino o le talalelei ia e faafaigofieina ai le oo mai o le taitaiga faalelagi. O mataupu faavae la nei e fa o ia mataupu faavae.

1. Fefautuagai Faatasi

“Sa ou mauaina e tusa lava pe ou te lagonaina se musumusuga malosi e fai se mea, ou te maua lava se faamautinoaga pe a ou talanoaina faatasi ma ou fesoasoani,” o le tala lea a se tasi tina sa avea muamua ma se peresitene o le Aualofa o se paranesi. “O nisi taimi e na ona la faamautu mai lava ua la lagonaina lea lava lagona e tasi, ona matou agai ai lea i luma i le lotogatasi. Ae o nisi taimi sa la fesoasoani mai ia te au ia ou iloa mea sa ou le iloaina, ma na mafai ona matou fesuiaia se mea sa matou faia po o le manatu mamafa atili i le auala na matou faia ai. Ae matou te agai pea lava i luma i le lotogatasi.”

O loo maua foi fautuaga e ala i le siaki atu i tusitaulima, suesue i savali o konafesi aoao, ma tatalo i le faatuatua.



FAALAGOLAGO I MUSUMUSUGA

“E faalotomauaaloiloina lava au i taimi uma ma le lotofaafetai pe a fesootai mai lou Tama Faalelagi ia te au e ala i Ana musumusuga. Ua ou aoa ia iloaina, ia faalagolago i ai, ma ia mulimuli ai. Mai lea taimi i lea taimi ua avea pea au ma le e taliaina ia musumusuga.”

Peresitene Thomas S. Monson, “Tutu i Nofoga Paia,” *Liahona*, Nov. 2011, 84.

“O nisi o fautuaga aupito silisili ou te mauaina e oo mai pe a ou faitauina ma toe faitauina ia lauga mai le konafesi aoa,” o le tala lea a se peresitene o Tamaitai Talavou a se uarota. “Ma a ou tootuli e tatalo, ou te ole atu i le Tama Faalelagi e uiga i mea sa ou suesue i ai ma le auala e faaoga ai aoaoga a perofeta soifua ma ausilali aoa e fesoasoani ai i tamaitai talavou.”

Sa saunoa se fesoasoani i se au peresitene o le Aoga Sa a se siteki, “Pe a matou fono o se au peresitene, matou te iloiloiloina lava i taimi uma se fuaitau puupuu i le *Tusitaulima 2: Taitaiina o le Ekalesia*. A o matou iloiloiloina soo ia faatonuga ua uma ona matou mauaina, e fesoasoani mai lava le Agaga ia i matou e tumau i se malilie e ogatusa ma taiala.”

“E tele lou mafanafana i le mea moni e faapea o le Ekalesia a le Alii o se ekalesia o fonotaga,” na saunoa ai se peresitene o le siteki. “O se aafiaga tulagaese le pulefaamalumu ai i fonotaga lea e tatalo faatasi ai tagata e tele ni tomiai ma ni poto masani ua tuufaatasia ona talanoaina lea o le auala silisili e faagaioioia ai. O a latou uunaiga e mafai ai ona ou mafaufau i isi auala, faalogo i le Agaga, ona maua ai lea o le talitonuga atoa i le tuuina atu o la’u faaiuga i le Alii.”¹

O nisi taimi o le sailia o se fautuaga o lona uiga o le sailia o se tasi e i ai ni tomiai sili atu. “Sa ou taumafai e fesoasoani i se aiga na i ai ni faafitauli tautupe, ma sa uunaia au e fai atu ia i latou e talanoa atu i se uso i le uarota o ia o se faufautua mo mea tautupe,” o le tala lea a se epikopo e lei leva ona faamalolo. “Sa mafai ona ia fesoasoani atu ia i latou i ala e matua le mafai lava ona ou faia.”

Na faamatalaina mai e se isi epikopo le aafiaga lenei, o lē sa fautua mai e faapea e manaomia ona faatagaina e epikopo isi taitai o le uarota e siitia i luga ma faia o latou tiute: “Sa mana o se tasi o tina ua maliu lana tane ina ia asia o ia e le epikopo ia le itiiti ifo ma le faatasi i le vaiaso. I lona mafaufau, ua lava lava na o se asiasiga mai le epikopo. Sa ou taumafai e asia o ia i le tele e mafai ai, ae sa tele ou tiutetauave, e aofia ai se aiga talavou.

Mulimuli ane, faatasi ai ma se tasi o ou fesoasoani, sa ou toe alu ai e vaai o ia.

“A o ma talanoa, sa ou lagonaina le uunaiga e fai atu, “Tuafafine pele, e te silafia i le avea ai ma ou epikopo ou te alofa ia te oe. Ma ona ou te alofa tele ia te oe, ua ou talosagaina ai ni alii e umia le Perisitua Mekisateko se toalua ma ni o tatou tuafafine lelei tele o le Aualofa e toalua ia asiasi mai ia te oe ia le itiiti ifo ma le faatasi i le masina, pe faatele foi pe a manaomia. O le a latou lipoti mai pe afai e i ai ni ou manaoga po o ni atugaluga. Pe lelei lena? ‘Oi ioe, epikopo,’ sa ia tali mai ai. Sa ou fesili atu pe na te fia iloaina o latou igoa, ma sa ia fai mai ioe. Ina ua ou tau atua ia te ia, sa ia fai mai, ‘O i latou na o ou faiaoga o aiga ma faiaoga asiasi!’ Ma sa ou fai atu, ‘Ua e malamalama nei la i le ala na faavaeina e le Alii mo i tatou e leoleo ai ia te oe.’”

2. Faalogo atu ma le Tootai

Ua saunoa mai foi taitai o le tomiai e faalogo ai ma iloaitino e fesoasoani tele lea i le sailia o musumusuga.

“A o matou fono ai ma uso, ou te taumafai lava e faalogo atili atu nai lo na o upu o loo latou saunoa ai,” o le tala lea a se peresitene o le Aualofa. “O nisi taimi e ala mai i le Agaga e mafai ona ou lagonaina o loo latou manaomia se fesoasoani. Ou te lagona le faamanuaina o le vaai i o latou mata pe lagonaina foi i o latou uiga. O nisi taimi ou te faapea atu lava, ‘O au o lou peresitene o le Aualofa, ma ou te lagonaina o loo e manaomia se mea. E mafai faapefea ona ou auauna atu ia te oe? Ou te lagona e tele lava ina ou maua musumusuga e ala i le fesili, ‘O le a se mea e ono faia e le Faaola?’”

“Ou te talisapaia le ala e faalogo mai ai lo matou epikopo i uso i le aufono a le matou uarota,” o le tala lea a se peresitene o le peraimeri. “E fesili mai lava o ia i taimi uma po o a ni o matou lagona ona ia faalogo lea ma le tootai i mea uma matou te fai atu ai. E tele taimi na te faapea mai ai, ‘E ao ona tatou manatuaina e tele lava malamalamaaga e oo mai i āvā, i tina, ma i tuafafine nofofua.’”



“Pe a ou fia lagonaina le fiafia ma le uunaia,” sa fai mai ai se tasi o epikopo, “Ou te alu ma nonofo faatasi ma tamaiti Peraimeri a o latou pepese. E faagaetia ai lava lou loto i taimi uma.”

“E manaomia foi ona tatou manatua o le faalogo e aofia ai le faalogo atu i le Agaga,” o le tala lea a se taitai vaega o faitaulaga sili. “O le iloiloga aupito sa’o o le faamanuiaina o se taitai atonu o lona mafaia lea ona lagona ma mulimuli i le Agaga. O loo faatinoina e Peresitene Monson lenei mea i le tele o taimi.”²

3. Tutu i Nohoaga Paia

Ua iloa foi e taitai e i ai nohoaga patino e faafaigofie ai ona maua ia faaaliga.

“Mo au lava ia, o le nohoaga silisili e lagona ai musumu-suga o totonu o le malumalu,” o le saunoaga lea a se fesoasoani i se au epikopo. “Pe a ou manao ia lagona le latalata atu i le Alii, ou te alu i Lona maota ina ia mafai ai ona ou lagonaina le saoloto mai popolega ma taulai atu i le faalologolo atu i le Agaga.”

“E i ai so’u potu i lo’u fale ua atofaina e fai ma o’u ofisa,” o le tala lea a se peteriaka a se siteki. “Ua ou ole atu i le Alii e fesoasoani mai ia avea lea potu ma se nohoaga e mafai ona afio ai le Agaga. Pe a ou sauni e tuu atu se faamanuiaga, ou te alu iina ma tatalo ai. O iina foi e fai ai au faatalanoaga ma tuu atu ai faamanuiaga.”

“O o tatou falelotu ua faapaiaina e avea ma ni nohoaga o tapuaiga,” sa fai mai ai se epikopo. “O nisi taimi i se afiafi o se aso aunoa, pe a ou fia lagonaina le filemu, ou te nofonofo ai i totonu o le falesa. Ou te mafaufau i tagata o le uarota ma le tele o le alofa o le Faaola mo i latou. Po o nisi taimi ou te usuina ai se viiga.”

“Mo au o le Peraimeri o se nohoaga paia,” sa fai mai ai se isi epikopo. “Pe a ou fia lagonaina le fiafia ma le uunaia, ou te alu ma nonofo faatasi ma tamaiti o le Peraimeri a o

latou pepese. E faagaetia ai lava lou loto i taimi uma.”

“O le tatalo e mafai ona faia soo se nohoaga ia paia,” sa fai mai ai se peresitene o Alii Talavou o se paranesi. “Maufaufau i faaaliga na oo mai i le Perofeta o Iosefa a o i ai o ia i le Falepuipui o Liperate. Sa mafai ona ia faia o se nohoaga paia e ala i le valaau atu i le Alii.”

4. Galue i le Pule

“O nisi tagata o le matou uarota sa lei mamafa ia i latou ia valaauga,” sa fai mai ai se epikopo. “Sa ou lagonaina e mafai ona ou fesoasoani atu ia i latou e ala i le faamalalama atu i ai o le auala sa matou tatalo ai, o se au epikopo, ia iloaina po o ai e tatau ona valaauina ma faapena ona matou maua ai se tali. Sa ou manao ia latou iloaina na valaauina i latou e le Alii, e auala mai i taitai o i ai le pule. Sa faia ai se eseesega tele lava ina ua latou iloaina na musuia o latou valaauga ma ua faamoemoeina i latou e le Alii ia latou saili atu foi i musumusuga ina ia mafai ai ona faalau-teleina lona valaauga.

Sa malaga o ia ma ona fesoasoani i le auala i faaaliga, o se auala o loo matala atu i tagata uma o le Ekalesia ma taitai. Ma e ala i le faamatalaina o le auala na latou faimalaga ai, na latou uunaia ai foi isi. ■

FAAMATALAGA

1. Tagai M. Russell Ballard, “Fefautuaai ma a Tatou Aufono,” *Liahona*, Iulai 1994, 24–26.
2. Tagai, mo se faataitaiga, Thomas S. Monson, “Maufaufau i Faamanuiaga,” *Liahona*, Nov. 2012, 86–89.

Mo nisi faamatalaga e uiga i le taitaiga, alu i le Potutusi o Aoaoga mo Taitai i le [lds.org/service/leadership](https://www.lds.org/service/leadership).

Suesueina o Tusitusiga Paia MO LE MALOSI O LE AIGA



SUESUE FAATASI MA SE FOLAFOLAGA

“Pe a faatofuina e le aunoa ma le faifai pea e tagata taitoatasi ma aiga i latou lava i tusitusiga paia, . . . o le a otometi lava le oo mai o isi vaega o gaioiga. O le a faateleina ia molimau. O le a faamalolosia tautinoga. O le a faamalolosia aiga. O le a tafe mai faaaliga patino”

Peresitene Ezra Taft Benson (1899–1994), “O Le Mana o le Afioga,” *Liahona*, Iulai 1986, 69.

Fausia se faavae malosi mo oe ma lou aiga e ala i le suesueina tumau atili ma le anoa o tusitusiga paia.

Saunia e Lori Fuller

Mekasini a le Ekalesia

Omanatu nei e mafai ona fesoasoani ia te oe ma lou aiga e selesele ai i tau i o le faaleleia o le suesueina o tusitusiga paia. O nei faataitaiga ua na o ni fautuaga ma e mafai ona fetuunai i o outou lava manaoga taitoatasi ma manaoga faaleaiga.

Suesue ma se Fesili

O le o mai i tusitusiga paia e saili ai ni tali o se ala lelei lea e faaleleia ai au suesuega o tusitusiga paia. E mafai ona e aumai au suesuega i se tatalo, ma ole atu ia maua ni tali i au fesili patino. A o e faitau, ia faailoga ni

mau ua taliina au fesili. Ia tusi ni faamatalaga i laina o au tusitusiga paia pe tusi i totonu o se isi api.

Pe a suesue o se aiga, e mafai ona e amata ia suesuega taitasi o tusitusiga paia i le fai atu lea i lau fanau pe o i ai ni a latou fesili o loo latou taumafai e tali. A o outou faitau, tagai mo ni mau ua taliina ai nei fesili, ona taofi lea ma talanoaina.

Suesue e ala i Autu

Filifili se autu e te fia aoao atili i ai, e pei o le tatalo, ma faitau le faamatalaga o loo i le Bible Dictionary po o le Taiala i Tusitusiga Paia. Ona faitau lea o mau ua lisiina i lalo o



OKUSO



lena mataupu i le Taiala i Tusitusiga Paia, Faasinoupu, po o le Taiala Autu. I totonu o le lisi o mau, faailoga ia fuaiupu e aupito sili ona aoga. A uma ona faailoga au mau e sili ona e fiafia i ai e uiga i le tatalo, o le a i ai sau maufaasino patino e uiga i le autu. E mafai ona e makaina i se lanu faapitoa ia mau uma e te mauaina e uiga i se autu patino. Filifili se isi aoaoga faavae e te suesue i ai pe a maea ma faaoga se lanu fou e maka ai fuaiupu.

Pe a suesue o se aiga, filifili faatasi se autu ma atofa atu i tamaiti taitasi e faitau le leoa ni nai fuaiupu ona faasoa mai lea o sana mau e fiafia i ai. Atonu e alu ai ni nai aso e faamaea ai se autu, o lea ia tuliloa ai mea tou te aoaoina e ala i le talanoaina ma tusi i lalo ni faamatalaga i le faaiuga o vaega suesue taitasi.

Suesue mo le Taitaiga

Sa faamatala mai i se tasi taimi e Peresitene Henry B. Eyring, Fesoasoani Muamua i le Au Peresitene Sili, le auala na ia faaogaina ai suesuega o tusitusiga paia e saili ai le taitaiga faapitoa mo lona olaga ma le valaauga. A uma ona ia tatalo atu i le Tama Faalelagi e uiga i mea e fai, ona tusi lea i lalo e Peresitene Eyring se lisi o tali, e eseese lanu o aitema taitasi i luga o le lisi, ma faapipii se kopi i se seti taugofie o tusitusiga paia. Sa ia faamatala mai, “O le [tali muamua i luga o le lisi] o le ‘E ao ona avea au ma se moli-mau o Keriso o le Alo o le Atua.’ Ona ou faitauina lea o au tusitusiga paia e saili ai mo ni manatu e aoaoina ai au pe

faapefea ona molimau atu o Keriso o le Alo o le Atua. Soo se taimi lava ou te tau ai i se mea, ou te makaina lava i le lanumoana. E lei pine ae ou atiaaina lau lava taiala autu i mea na ou mafaufau na finagalo ai le Alii ia te au e fai.”¹

Pe a suesue o se aiga, filifili ni vaega tou te fia mananao e galulue faatasi ai. Tusi i lalo nei popolega ma tuu i latou i se mea e iloa ai. A o outou faitau, valaaulia tamaiti taitasi e tagai ma faailoga ni mau e faatatau i se popolega patino.

Afai e na o le faitauina o ni nai fuaiupu i se aso e faigata ma foliga mai ua le mafai ona fai ni suesuega loloto atu pe ua tau foi na o le faanonofa faatasi i lalo o lou aiga o se mea faigata, aua le faanoanoa ma aua le fiu. Na fautua mai Elder David A. Bednar o le Korama a Aposetolo e Toasefululua e faapea e ui e leai se vaega se tasi o suesuega o tusitusiga paia faaleaiga e foliga mai e manatuaina faapitoa pe faamanuiaina foi, ae o lo “tatou faia pea e le aunoa o nai mea iti faigofie, e mafai ona tulai mai ai taunuuga faaleagaga maoae.”²

A o tatou saili atu e faitau atili ia tusitusiga paia e le aunoa ma faaleleia lo tatou faitauina o tusitusiga paia i se suesuega anoa, o le a faamanuiaina a tatou taumafaiga e le Alii. O le a Ia taialaina i tatou a o tatou faatulagaina a tatou suesuega o tusitusiga paia ma o le a faia ia tauia atili mo i tatou ma mo o tatou aiga. ■

FAAMATALAGA

1. “O Se Talanoaga i le Suesueina o Tusitusiga Paia,” *Liahona*, Iulai 2005, 8.
2. David A. Bednar, “Ia Matua Maelega ma Mafaufau i le Aiga,” *Liahona*, Nov. 2009, 20.





*E tele atu mea e faatupuina ai talanoaga
i le potuaoga nai lo le fai atu o ni fesili.*

E manaomia ona tatou fai atua le ituaiga sao o fesili.

○ Fesili MAOAE, ○ Talanoaga MAOAE

Saunia e Jack Lyon

E fesili se faiaoga o le Aoga Sa, “O ai tagata muamua lava e toalua na i luga o le lalolagi?” Ua ia tepa atu ma le faamoemoe i lana vasega o talavou, ae leai ma se lima e sii i luga. Ua autilo tagata o le vasega i lalo i o latou vae pe na ona su’e a latou tusitusiga paia e aunoa ma se mafaufau i ai. “O se fesili faigofie,” ua fai atu ai le faiaoga. “E leai se tasi e iloaina le tali?”

I le potu e sosoo ai, i le vasega o Aoaoga Faavae o le Talalelei, ua fesili ai le faiaoga, “O le a le mataupu faavae aupito sili ona taua o le talalelei?”

Ua sii ma le popole e se taufafine lona lima. “Faatuatua?” Ua ia fesili atu ai.

“O se tali lelei tele lena,” ua tali atu ai le faiaoga, “ae e le o le tali tonu lea o loo ou sailia. E i ai se isi?”

Filemu.

E mafai ona fai e faiaoga ni fesili ona latou te mananao e faaafia tagata o le vasega i a latou lesona. Latou te malamalama o tamaiti aoga e aafia ai i talatalanoaga, e tele atu mea latou te aoaoina nai lo i latou e na ona nofonofo ma faalogologo. Ae o fesili e pei o fesili ia e i luga e masani lava ona le aoga.

“O ai tagata muamua lava e toalua na i luga o le lalolagi?” o se fesili lē aoga ona ua iloa lelei lava le tali lea ua leai ai se tasi e fia tali atu—pe vaaia se manaomia e tali atu.

“O le a le mataupu faavae aupito sili ona taua i le talalelei?” o se fesili foi e le aoga. E leai ma se tasi e iloaina le tali o loo saili e le faiaoga vagana ai lava le faiaoga, lea o loo fai atu moni lava, “Mate mai le mea lea ou te mafaufau i ai.”

O fesili nei o mea moni; e tofu ma se tali *patino*. Ae o talanoaga maoae i le potuaoga e sau mai se ituaiga o fesili—e ese lava, mai fesili e *aunoa* ma se tali patino. O le ki lena.

Fai atu Fesili e Tatala ai Talanoaga

Afai o oe o se faiaoga o se vasega a le au matutua, e mafai ona e fesili atu, “O le a se mataupu faavae o le talalelei ua sili ona taua i lou olaga, ma aisea?” Atonu o le a taofi tagata o le vasega ma mafaufau e uiga i o latou aafiaga—ma e lelei lena. Afai e te malolo ma faatalitali mo ni nai sekone, o le a amata ona tasii i luga lima, ma o le a e faalogo atu i ni aafiaga moni mai le loto o loo i ai i tagata e uiga i le talalelei. O le a e matauina foi o ni manatu faaalua o se tasi tagata o le a faaosofia ai manatu faaalua mai isi tagata. E le pine, ae o le a maua e le vasega se talanoaga fiafia ma musuia!

Afai e te manao ia maua e le vasega se talanoaga e uiga i se mea patino e pei o le faatuatua, mafaufau e fai atu se mea faapenei: “O nei o le a tatou talanoa ai e uiga i le faatuatua, o le uluai mataupu faavae o le talalelei.” Ona fai atu lea o se fesili e uiga i le faatuatua lea e le o i ai sona tali patino:

1. “O le a se vaega o fai e le faatuatua i lou olaga?”
2. “Aisea e te manatu ai e finagalo le Alii ia tatou maua le faatuatua?”
3. “O a nisi o auala e mafai ona tatou faateleina ai lo tatou faatuatua?”



E tele naua atu mea i le talanoaga i le potuaoga nai lo le faaosofia o tagata e fai ni manatu faaalii. I le faaiuga, o se mataupu faaleagaga maualuga lea e mafai ona aumaia le vasega ia latalata atili i le Atua.

O le a e mauaina le tele o tali, ma a o e mauaina tali, atonu e te manao e tusi (i se tulaga faapuupuu) i luga o le laupapa. A uma ona e faia, o le a e mauaina se lisi matagofie e mafai ona e faaaogaina e fesoasoani ai e aotele la outou talanoaga.

O loo i ai se tulaga manuia faaopoopo i le fai atu o fesili e tatala ai talanoaga: E oo lava foi i tagata o le vasega e le o saofaga atu i le talanoaga o le a mafaufau e uiga i fesili. O lo latou malamalamaaga ma molimau e mafai ona tuputupu ae e ui latou te le i fai maia se tala.

Talanoaina o Tusitusiga Paia

E mafai ona aoga ia fesili e tatala ai talanoaga i le taimi o talanoaga o tusitusiga paia. E toatele faiaoga e manatu e faapea o le valaau atu i tagata o le vasega e faitau se fuaitau o mau o se ala lelei lea e faaaofia ai i latou. Ae paga lea, atonu e leai. O nisi tagata e le lelei le faitau ma e mafai ona tau memumemu i upu. O isi tagata o le vasega atonu e faigata ona tau faalogo atu i le tagata o loo faitau.

O le tagata aupito sili ona faigofie ona faalogo i totonu o se potuaoga o le faiaoga, lea o loo tu i le pito i luma o le vasega. Ma le isi, e mafai ona taofi i le ogatotonu o se fuaitau e fesili atu i se fesili ma faaosofia le talanoaga. A o e faitauina le faaitaiga lenei, tagai pe mafai ona e mataua le mea e fai e le faiaoga e uunaia ai le talanoaga:

Faiaoga: “O le asō o le a tatou talanoaina ai se tala ua lauiloa, le faataoto i le atalii faamaumau oa. Ae ou te manao ina ia tatou mafaufau e le gata i le atalii faamaumau oa ae faapena foi i isi tagata o lona aiga. Faamolemole

susue a outou Tusi Paia i le Luka 15:11, i le itulau e 1305.” (O le tuuina atu o le numera o le itulau e fesoasoani lea i tamaiti atonu e le o masani i tusitusiga paia.)

A uma ona faatali mo tagata o le vasega sei maua a latou mau, ona amata faitau lea o le faiaoga: “O le tasi tagata e toalua ona atalii:

Ua fai atu le uii i lona tama, Sena e, ia e au mai ia te au lo’u tofi o le oa. Ona vaelua lea e ia o ana mea ia te i laua.’ Ia, o a nisi o mea ua mafai nei ona tatou iloina e uiga i lenei aiga?” (Matau le fesili e tatala ai le talanoaga.)

Tamaitiiti aoga: “E foliga mai ua lotu le tama e tuu atu i le uii mea ua ia manao ai.”

Faiaoga: “Ua ia lotu i ai, a ea? E masani lava e le maua e se atalii lona tofi sei iloga e maliu lona tama. Ae e foliga mai o le tama o se tagata agaalofa ma agalelei. O le a ma se isi mea?”

Tamaitiiti aoga: “E foliga mai ia te au e manatu faapito le uii. E matua tele naua le mea ua ia talosagaina mai i se tama o loo soifua pea.”

Faiaoga: “Ioe, e sa’o. E foliga mai e na o ia lava o loo mafaufau i ai. Ae a le atalii matua?”

Tamaitiiti aoga: “E matua le magagana lava.” Ua toē le vasega.

Faiaoga: “Ioe, ma e mafai ona faamatalaina ai se mea e faatatau i ona uiga. Tatou vaavaai mo lena mea a o faaauau pea ona tatou faitau.”

A o outou faitauina lena faaitaiga, o le a se mea na e matauina sa faia e le faiaoga e uunaia ai le talanoaga? E mafai ona e faia se lisi—o le a avea ma a outou lisi ma faauigaga o lea tulaga, o lona uiga la o le a sao uma a outou

tali. Aisea? Talu ai ona o le fesili muamua i le parakalafa lenei o se fesili e tatala ai talanoaga, ma afai lava e te taliina sea fesili ma le faamaoni, o le a e le tuu maia lava se tali sese. Afai e te fai atu ni fesili tali tutusa faapea i se potuaoga, o le a faapena foi ona moni mo tagata o le vasega, o lona uiga la o le a le pine foi ae latou iloa o le a talia lelei o latou manatu faaalua ma e saogalemu mo i latou ona tali mai.

Ma le isi, atonu sa e matauina na ou faia se mea e faa-
tinoū ai lou mafaufau *ae lei* amata ona e faitau. Sa ou tusia, “A o e faitau, tagai pe mafai ona e iloaina le mea e faia e le faiaoga e uunaia ai le talanoaga.” Sa ou faia lenei mea ona sa ou iloaina o le a fesoasoani ia te oe e mafaufau ai e uiga i mea sa e faitauina ma saunia ai e auai i lenei “talanoaga” pe a uma.

Sa faalua ona faaoga e le faiaoga lenei metotia i le faataitaiga: sa ia fai mai i le tasi taimi, “Ou te manao ia tatou mafaufau e le gata i le atalii faamaumau oa ae faapena foi i isi tagata o lona aiga,” ma na ia fai mai i le isi taimi, “Tatou vaavaai mo lona mea a o faaauau pea ona tatou faitau.” Ua tuu atu e nei fautuaga uma e lua i tagata o le vasega se mea e taulai atu i ai ina ia mafai ai ona latou saunia e tali atu i fesili e tatala ai talanoaga pe a fesili atu le faiaoga.

O le faia o lenei mea e fesoasoani lea i tagata o le vasega e faia ai se fesootaiga ma le fuaitau o loo faitauina. Nai lo le nofonofo faasamasamanoa i o latou nofoa, ae o la latou te faitau faatasi ma mafaufau tonu lava e uiga i mau. Ma pe a maea le faitauga, ua latou saunia e tali atu i fesili. Ona e manaomia lea o le tau na ona e valaau atu ia i latou ma faamaopoopo le talanoaga.

Ia matau foi i lenei ituaiga o talanoaga o loo e aoao moni atu lava *mai tusitusiga paia*, e le na o le tusi lesona. E ui lava e tatau ona faaogaina le tusi lesona e saunia ai le lesona ma o se punavai sili o fesili e tatala ai talanoaga, ae e tatau ona avefa tusitusiga paia ma taulaiga autu o lo tatou aoao atu ma le aoao mai.

Faatumuina le Taulai Atu

O loo i ai se luitau i le faia o le tele o talanoaga i potuaoga: e faigofie lava ona see ese ia talanoaga. E taua le saunia lelei o lau lesona ina ia mafai ona e iloa le mea e te fia manao e agai i ai ma ia e saunia ai, pe a talafeagai ai, ia toe faafoi mai le vasega i le autu moni o le talanoaga. E masani lava e na o le pau le mea e manaomia ona e saunia o sina taiala itiiti: “E mata’ina lona mea, ae ou te manatu ua fai si o tatou see ese ma le mataupu. Tatou toe foi atu nei i le tatou talanoaga o le faatuatua.”

E fesoasoani foi pe afai e te mauaina se folasaga manino ma le mata’ina ina ia iloa e tagata o le vasega le taulaiga o lau lesona. Ona faia lea o se talanoaga, e taialaina ai mea o talanoaina.

Ma le mea mulimuli, tuu atu se aotelega musuia o mea sa aoaoina. O upu o se viiga po o se solo e mafai ona maua ai se aotelega lelei. Na saunua Peresitene Boyd K. Packer, Peresitene o le Korama a Aposetolo e Toasefululua, “Ta’u atu i le au faalogologo ia mea o le a e faamatalaina atu, ona ta’u atu lea i ai mea sa e tauina atu. O se auala aoga lava lona.”¹

Ia mautinoa e faasoa atu lau molimau e uiga i upumoni o loo talanoaina.

Fefaasoai o Lagona ma Aafiaga

Peitai, e tele atu mea o i ai i nei mea uma, nai lo le na ona maua o se talanoaga sili. Pe a talafeagai ai, o le a musuia e le Agaga ia tagata o le vasega i o latou manatu faaalua ina ia mafai ona latou faasoa mai mea ua finagalo le Alii e faalogo i ai le vasega. E pei ona fetalai atu le Alii i Ona soo, “Aua o le mea ua faapotopoto ai se toalua, po o se toatolu i lo’u igoa, ou te i ai faatasi ma i latou” (Mataio 18:20).

Ioe, e manaomia ona tatou faaeteete i le faasoa atu o aafiaga loloto patino pe paia foi. Ae o tala mai tagata o le vasega e mafai ona faaopoopo atu le tele o mea i soo se lesona. E pei ona fautua mai tusi lesona o Aoaoga Faavae o le Talalelei e faapea: “Faasoa atu malamalamaaga, lagona, ma aafiaga e fesootai ma le lesona. Valaaulia tagata o le vasega e fai lea lava mea e tasi.”²

E tele naua atu mea i talanoaga i potuaoga nai lo le faa-
osofia o tagata e fai ni manatu faaalua. I le faaiuga, o se mata-
upu faaleagaga maualuga lea e mafai ona aumaia le vasega
ia latalata atili i le Atua.

A e faaogaina nei metotia, o le a e vaaia le tuputupu ae i le faaleagaga ma le malamalama i le talalelei, e aofia ai ma oe lava ia. I lo le tau mafaufau pe faapefea ona faatumuina le taimi o lau vasega, o le a amata ona le lava sou taimi. O le a mafai foi ona e vaaia le faatoateleina o lau vasega ona o le a iloa e tagata o le vasega o le a avefa i latou ma se vaega o se talanoaga maoae—aoaoina mai tusitusiga paia, mai le tasi ma le isi, ma mai le Agaga o le Alii. ■

E nofo le tusitala i Iuta, ISA

FAAMATALAGA

1. Boyd K. Packer, *Teach Ye Diligently*, rev. ed. (1991), 354–55.

2. *Feagaiga Fou Tusi Lesona a le Faiaoga o Aoaoga Faavae o le Talalelei* (1997), vi.

SA OU ALA A'E I LE TALALELEI

Sa tausia au e ni matua e le talitonu Si le Atua ma a o avea o se alii talavou sa ou lagonaina le sologa lelei o lou olaga e aunoa ma le Atua. Peitai, sa suia lēna mea i le 1989, ina ua ava lo'u alāmeaai, ma ou taoto ai ua le iloa se mea mo le valu aso.

E i ai ni nai mea ou te manatuaina mai le taimi na ou i ai i le falemai, ae e malosi lo'u manatua o lo'u vaai o se tamaloa e laei papae na tu i ou talaane ina ua maea lo'u taotoga ma ta'u mai ia te au ua oo i le taimi e

“toefoi ai ma ia ou ala i luga.” Ina ua ou musu, sa ia faaopoopo mai, “Uso, ua e oti. O lou toe foi, po o lou nofo iinei.” Sa ou faia e pei ona ia fai mai ai ma ala ae ai i le luluti o tiga.

Ina ua ou tuua le falemai, sa ou faia ni miti uiga ese lea sa i ai ni tagata ou te lei feiloai lava i ai. Sa ou maua le lagona e faapea ua folafola mai ia te au e fai se mea, ae sa ou le iloa po o le a. Sa ou saili ma faitau e uiga i tapuaiga eseese. A o ou faitaua le Feagaiga Fou, sa ou iloina

e faapea afai o loo i ai le upumoni i le lalolagi, o le a maua la ia Iesu Keriso.

Sa ou saili mai le 1989 i le 1994. Sa ou le mautonu ma fenumiai a o ou sailia tagata ia sa ou vaai pea i ai i au miti. Sa oo ina faateleina le faigata ma lou le mautonu, ma oo ai ina ou tatalo lava au ia ma le naunautai mo ni tali.

E lei pine ona maea nei tatalo, ae ou feiloai i se tagata fou na ma faigaluega faatasi. Sa ia iloina o loo ou tauivi ma ni faigata, ma sa ou tau atu ia te ia o loo ou saili mo le upumoni. Sa ia aumai ia te au se Tusi a Mamona, lea sa matuai ou musu e talia. Ae sa ia faatauanauna au e ave, ma e tasi lava le po na ou faitauina atoa ai. Sa vave ona ou iloina o lea ua ou mauaina le mea sa ou sailia.

Ina ua matou feiloai ma faifeautalai, sa ou maofa i le vaai o se tasi o i laua lea sa ou vaai ai i au miti. Sa vave ona ou talosagaina ina ia papatisoina au, ae sa ao ona ou aoao muamua i lesona uma.

A o ou suesueina le talalelei ma auai i le lotu, sa ou maua ai tagata uma ia mai i au miti. Sa ou iloa o le talalelei o le mea lea sa ou manao-mia ona maua. O le aso o lou papatisoga o se tasi lea o aso aupito sili ona fiafia o lou olaga. Ono masina mulimuli ane, sa valaauina ai au o le peresitene o le paranesi. O lenei, ua toetiiti 20 tausaga mulimuli ane, o loo ou auauna atu pea ma le fiafia i le Ekalesia. Faatasi ai ma lou aiga, o le talalelei o sa'u meatotino aupito sili lea ona taua. ■

Taofia le igoa,
Farani

E i ai ni nai mea ou te manatuaina mai le taimi na ou i ai i le falemai, ae ou te manatua lou vaai ai i se miti i se tamaloa na laei papae na tau mai ia te au ua oo i le taimi e “toefoi ai ma ia ou ala i luga.”



O LAU TATALO AUPITO SILI ONA FAAMAONI

I na ua ou faatoa ulufale atu i le kolisi, sa i ai sau galuega faavaitaimi i se faleoloa lata ane i se tamai taulaga. Sa ou i ai i le sifi lea e tapunia le faleoloa, lea e manava i le 11 i le po. E ui i le saogalemu o le nuu, ae sa ou popole lava i le tele o taimi pe a ou tapunia le faleoloa na o au.

I se tasi po sa ou lagona patino ai le atuavale. Ina ua maea ona ou faamaina le faleoloa ma ou agai atu loa e tape le masini tupe, sa oo mai i ou luga se lagona o le fefe. Sa lei i ai ia te au se mafuaaga tonu e ala ai ona fefe tele, ae sa le mafai ona ou aveesea lou popole. Sa ou le manao e soona faia se mea i le valaauina o leoleo, ae sa ou manao foi ina ia malupuipua au pe afai o i ai moni lava se tulaga lamatia.

Mulimuli ane, sa ou tootuli ma tatalo. Sa ou tau atu i le Tama Faalelagi lou fefe ma lē iloa po o le a le mea e fai. O le tatalo aupito sili lea ona faamaoni sa ou faia.

Ina ua ou tu ae i luga, sa vave ona ou iloa atua se taavale ua sosolo mai i le pamu penisini e latalata tele mai i le faleoloa. I lou tei ai ma le maua o se toomaga, o ia o se alii leoleo. A o ia to mai i fafo lana kata tupe e faatumu lana taavale tiute i le penisini, sa vave loa ona amata fai ou tiute mo le tapunia o le faleoloa. Sa ou manao e faaoga le avanoa lea o lana puipuga a o i ai ma faia le tele o mea e mafai ona ou faia a o lei alu ese o ia mai le pamu. Ina ua uma ona utu lana penisini, sa fai sana valaau i lana telefoni feaveai ma saofai

ai i lana taavale ma talanoa. Sa i ai pea o ia iina i le taimi na ou lokaina ai le fale ma ou oso i totonu o lau taavale. Sa ma taufai o ese uma mai le faleoloa i le taimi lava e tasi.

A o ou agai atu i le fale, sa ou maofa i le vave ona tali mai o lau tatalo. Sa ou faafetai atu ma le lotomaulalo i le Tama Faalelagi mo le faafofoga mai ia te au. Sa aoaoina lava au e faapea o au o se afafine o le Atua, ae o lena po sa ou lagonaina ai le matuai latalata mai o Lona alofa mo au pe matuai moni foi. E le mafai e upu ona faamatalaina le filemu sa ou lagonaina i lou loto. Ou te iloa o le a faamanuiaina au e le Alii pe afai ou te maua le faatuatua ma ole atu mo Lana fesoasoani. ■

Jaimee Lynn Chidester, Iuta, ISA

A o ou tu ae i luga ina ua maea le tatalo, sa vave ona ou iloina se taavale o sosolo mai i le pamu penisini e latalata tele mai i le faleoloa.



O AU O SE KERISIANO

O au o se faiaoga o le vasega lua i se nuu ua lauiloa ai le Au Paia o Aso e Gata Ai. O lea sa faateia ai au i se tasi aso ina ua tau mai e se uo ia te au se tala a se isi faiaoga e uiga ia te au. Sa fai mai le faiaoga, “E te iloina o Mrs. Craig e le o se Kerisiano?”

Sa mafatia lou loto. O lea e lei leva ona oti atu lou toalua sa ma mafuta mo le 28 tausaga, ma sa ou matua latalata lava i le Faaola ma lou Tama Faalelagi nai lo se isi lava taimi i lou olaga. Sa ou iloa e ao ona tuu atu lau molimau i lenei faiaoga, ae sa ou le maotino pe faapefea ona fai. Sa ou

le manao e faatiga ia te ia, ae sa ou manao foi ia ona silafia o le Au Paia o Aso e Gata Ai o ni Kerisiano.

I le taeao na sosoo ai sa musumusu mai le Agaga Paia ia te au i le mea e tatau ona ou tau atu. A o ou taotooto ai i le moega, sa ou mafaufau i atavali uma sa i ai i lou fale e uiga i le soifuaga o Iesu Keriso. E tofu lava ia atavali taitasi ma se nofoaga faapitoa i lou loto ma sa fesootai i se taimi faapitoa i lou olaga. O le mafaufau ai i na atavali sa aumaia ai le tele o lagona agamalu e uiga i lou alofa mo le Faaola.

Sa musumusu mai le Agaga Paia ia te au i le mea e tatau ona ou tau atu, ma i lenei taeao i le aoga sa ou alu atu ai i le potu o lau uo.

O se tasi o atavali patino o loo faaalia ai le faatoafilemuina e le Faaola o le sami sousou. O loo faamanatu mai ai ia te au e Na te faatoilaloina mea uma ma e auala mai ia te Ia, e mafai ai foi ona ou faatoilaloina mea uma, e aofia ai ma le lotonutimomoia o le oti o lou toalua.

A o faaauau ai ona ou manatunatu i atavali, sa lofituina ai i se lagona o le lotofaafetai mo faamanuiaga ua oo mai ia te au ona ou te auai i le Ekalesia a le Faaola.

I lenei taeao i le aoga sa ou alu atu ai i le potu o lau uo lea ma tau atu ia te ia ou te manao ia ona silafia o au o se Kerisiano. Sa ou fesili atu ia te ia, “E fia ni atavali o le Faaola o i ai i lou fale?” Sa ia tau mai ia te au e leai ni atavali, ae na o ni satauro se lua o i ai i lona fale.

Sa ou faamatatala atu ia te ia e uiga i atavali o le Faaola o i lou fale faapea ai ma le uiga o ata o loo faaalia i atavali nei ia te au. Ona ou tuu atu lea ia te ia o lau molimau e uiga ia Iesu Keriso ma Lana Togiola.

Sa ou tau atu foi i lau uo faigalugega sa na o le pau le auala na mafai ai ona ou onosaia le tausaga ua mavae o lou malamalama lea ia Iesu Keriso. Sa ou tau atu ia te ia le auala na fesoasoani ai Lona alofa mutimutivale agamalu ia te au ma lau fanau e onosaia taimi faigata o le oti o se tamā ma se tane.

Sa ou fusi ia te ia ona ou alu ese ai lea, ma sa ia tuu maia se faatoesega faamaoni. Sa leai ma se masalosalo i lo'u loto sa ia iloina o au, o se tagata o Le Ekalesia a Iesu Keriso o le Au Paia o Aso e Gata Ai, o se Kerisiano. ■
Kathy Fjelstul Craig, Arizona, ISA



E LE O LE MEA LENA SA AOAONA AI AU

I se tasi aso i le falefaigaluega, sa tatau ona ou tuua mo ni nai itula e faataunuu ni feau taua mo lou tina. Sa ou alu atu i le ofisa i le taeao ma tau atu i se uo o le a ou le faigaluega i le aoauli. I le taimi o se malologa sa ia musumusumu mai ia te au, "E mafai ona ou fesoasoani ia te oe e saina lou taimi."

"Leai, faafetai," sa ou fai atu ai.

A o ou tuua le ofisa e pue le pasi, sa tau mulimuli mai lau uo ia te au e agai atu i le uati e saina ai le taimi. Sa

ia fai mai lemu, "Aisea e te le saina ai mo le taimi o le aoauli, ona ou oomiina lea o lau kata o le taimi faigaluega pe a ou alu i le fale?"

A o lei mafai ona ou fai atua se upu, sa ia toe faapea mai, "Vaai, o o tatou totogi e maualalo ifo ma le totogi amata, o lea e le afaina ai le fai o lena mea. Ua na o sina tamai tupe lava. Ma le isi, e le na o i ta'ua tagata o loo faia."

Sa amata ona ou mafaufau i le mea sa ia fai mai ai. Sa lelei nisi o ona

manatu, ma sa ou iloa sa lelei foi ona faamoemoega. Ae e le o le mea lena sa aoaona ai au i le Ekalesia.

I le tuufaatasia o lo'u malosi atoa ma le naunautaiga, sa ou faapea lemu atu ai ia te ia, "Lau uo e, e lelei le Alii, ma afai Na te faamanuiaina i tatou, e mafai ona tatou mauaina mai ia te Ia ni mea e sili atu i lena aofaiga."

Sa ia alu ese atu ma sa fai si ona le fiafia ia te au mo le teenaina o lana ofo. A o ou savali atu i le fale faatali pasi, sa ou popole i le laitiiti o lou totogi o le a i ai. Sa ou iloa o le a i ai nisi meaai o le a le mafai ona faatauina i le masina o le a sosoo ai.

A o ou savali pea, sa ou manatuaina upu o se tasi o viiga: "Ma e faamaoni pea; E te maua ai manuia, Mai le Atua le Tama."¹ Sa oo mai foi se fasi-fuaitau mai se isi viiga i lou mafaufau: "Filifili tau o mea tonu! E te manuia ai e faavavau."²

O nei laina na faamalosia ai lau faaiuga ia le lolo atu i faaososoga ae ia faalagolago i folafolaga a le Alii.

Ua tolu tausaga talu ona mavae atu lena faafitauli, ma o lea ua i ai nei sa'u galuega fou. Ua mautinoa lava le faamanuiaina o au e le Alii. Sa alu ai le taimi, ae o folafolaga o viiga sa faataunuuina moni lava, ma ua mafai ona ou lagonaina o le a faaauau pea ona oo mai faamanuiaga e tele ia te au pe a ou faaauau pea ona ou filifili le mea tonu. Ou te faafetai mo ia viiga, ia na aumaia ia te au le lototele e tumau ai i lena mea tonu i le silafaga a le Atua. ■

Irene Taniegra, Filipaina

FAAMATALAGA

1. "Faaoga Taimi Uma," *Viiga*, nu. 139.

2. "Filifili Tau o Mea Tonu," *Viiga*, nu. 149.

I na ua ou tau atu i se uo i le falefaigaluega o le a ou le faigaluega i le aoauli, sa ia fai mai ia te au, "E mafai ona ou fesoasoani ia te oe e saina lou taimi."



Agai i Luma

I LE FAATUATUA

O le a se mea e tatau ona e faia pe afai e ao ia te oe ona faia se faaiuga ma ua e tatalo mo au filifiliga, ae e te le o mautinoa lava le mea e fai?

Sa ta'ua e Elder Jeffrey R. Holland o le Korama a Aposetolo e Toasefululua e faapea, “O le upumoni paia lea a o le i oo mai [ma le maea] o taimi maoae, e mautinoa lava . . . o taimi maoae faaleagaga, o iina e mafai ona oo mai ai taimi faigata, feteenaiga, ma le pogisa” (“Cast Not Away Therefore Your Confidence,” *Liahona*, Iuni 2000, 34).

Ae o feteenaiga e le faapea ua tuulafoaiina ai oe e le Tama Faalelagi. O loo i ai o Ia iina, ma o le a Ia taialaina oe. O nisi taimi e tatau ona tatou agai i luma i le faatuatua seia oo ina faamalamalamaina lo tatou ala. O nisi nei o malama-lamaaga mai perofeta o ona po nei e uiga i le faatalitali ma le onosai mo ni tali ma le taitaiga.

Savali atu i le Tausiusiuga o le Malamalama



“E lei leva ona uma le valaauina o au e avea ma se Pulega Aoa, ae ou alu ia Elder Harold B. Lee mo se fautuaga. Sa ia faalogo mai ma le totoa tele i lo’u faafitauli ma fautua mai ou te alu e vaai ia Peresitene Tavita O. MaKei. Sa fautuaina au e Peresitene MaKei i le itu e tatau ona ou alu ai. Sa ou matuai naunau lava e usiusitai ae sa le mavaaia se ala e mafai ai ona ou faia e pei ona sa ia fautuaina ai au e fai.

“Sa ou toe foi atu ia Elder Lee ma tau atu ia te ia ou te le o vaaia se ala e agai ai i le itu sa fautuaina ai au ou te alu i ai. Sa ia fai mai, ‘O le faalavelave

o oe, o lena e te manao ia e iloa atu le taunuuga mai le amataga.’ Sa ou tali atu ou te fia iloa tau lava o se laasaga se tasi pe lua i luma atu. Ona oo mai lea o le lesona o le olaga atoa: ‘E tatau ona e aoa ia savali atu i le tausiusiuga o le malamalama, ona sosoo ai lea ma ni nai laa i le pogisa; ona mafai lea ona susulu mai le malamalama ma faaali mai le ala i ou luma atu.’ Ona ia sii maia lea o upu nei e 24 mai le Tusi a Mamona:

‘Aua tou te masalosalo ona ua outou le vaaia, aua tou te le maua se molimau seia uma ona tofotofoina o lo outou faatuatua’” (Eteru 12:6).

Peresitene Boyd K. Packer, Peresitene o le Korama a Aposetolo e Toasefululua, “The Edge of the Light,” BYU Magazine, Mar. 1991, magazine.byu.edu.

Faaauau i Luma i le Faatuatua



“O le a lau mea e fai pe a uma ona e saunia ma le faaeteete, ua tatalo faatauana, faatalitali mo se taimi umi mo se tali, ae e te le o lagonaina lava se tali? Atonu e te manao e faaali atu le faafetai pe a tupu mai lena mea, aua o se faamaoniga lena o [le faatuatua o le Tama Faalelagi]. Afai e te ola agavaa ma o loo ogatusa lau filifiliga ma aoaoga a le Faaola ma e manaomia ona e [faatinoaina], ia faia loa ma le faatuatua. A o e mataalia i uunaiga a le Agaga, e tasi lava pe lua ni mea o le a tulai moni mai i le taimi talafeagai: a le o le oo mai o le pogisa o le mafaufau, e tau mai ai o se filifiliga e le lelei, po o le toafilemu po o le mu o le loto o le a lagonaina, e faamautu ai e sao lau filifiliga. Pe a e ola amiotonu ma o loo e faatinoina ma le faatuatua, o le a le tuuina oe e le Atua e agai ese mamao atu e aunoa ma se uunaiga o le lapataiga pe a fai na e faia se faaiuga sese.”

Elder Richard G. Scott o le Korama a Aposetolo e Toasefululua, “Faaagaina o le Meaalofa Faalelagi o le Tatalo,” Liahona, May 2007, 10.

AGAI I LUMA

Ao lumanai ai le faauuina o au mai le kolisi, sa ma mafaufau loloto ai ma lo'u toalua i ni fesili se lua: o afea e tatau ona amata ai ona fai se fanau ma o fea ma te o i ai pe a uma le faauuga. E tele itula sa ma faaaluina e talanoa ai e uiga i nei faafitauli taufaamatau ae ma te lei maua lava ni faaiuga.

I se tasi Aso Sa patino, sa faasolosolo malie ai lava ona oo le ma talanoaga

i se finauga, lea na faateteleina i se feeseeseaiga. I lena taimi, na tatagi ai le logo o le faitotoa. Sa faateia i maua i le tutu mai o ma faiaoga o aiga i le faitotoa.

Sa ma valaaulia i laua e susu mai i totonu ma faalogologo atu i le la savali. Sa amata ona talanoa le tasi o ma faiaoga o aiga e uiga ia Mose ma le fanauga a Isaraelu i la latou solaaga mai Aikupito. Ina ua taunuu le fanauga

a Isaraelu i le matafaga o le Sami Ula-ula, sa le mafai ona latou o, ma ua vave foi ona latalata atu Aikupito. O loo tau mai i tusitusiga paia e faapea sa "matua matatau lava" le fanauga a Isaraelu (Esoto 14:10). Ina ua tatalo Mose mo se taitaiga, na tali mai le Alii, "Se a le mea ua e alaga mai ai ia te au? fai atu i le fanauga a Isaraelu, ia latou o atu pea" (Esoto 14:15).

I le taimi lava na faitauina ai e le ma faiaoga o aiga lena mau, sa mou ese atu lagona o le le fiafia ma le fefe. Sa ma iloaina ma lou toalua o lea sa ma saofafai i auvai o le Sami Ulaula ma tau mafaufau le mea e fai ae ina ia mafai ona "vaaia le faolataga a le Alii" (Esoto 14:13), e ao ona ma o atu i luma.

I lo ma tulaga, o le o atu i luma o lona uiga o le faia lea o se faaiuga atamai, galulue ma le filiga, ma faalagolago i le Alii. Sa ao ona tuu lo ma fefinauai ma amata ona faatino i le faatuatua. Ina ua ma mulimuli i le taitaiga a le Alii, sa vaeluaina le sami o filifiliga lea sa i o ma luma, ma sa mafai ai ona ma savavali atu ma le saogalemu. Ma te faafetai lava mo faamanuiaga na ma mauaina mai le agai atu i luma i le faatuatua atoa ai ma faiaoga o aiga ia na musuia i ma'ua ia faia le laasaga muamua.

Steven Scott Stokes,
North Carolina, ISA



Aua Nei Faaagaina se Fautuaga ona o Lo Outou Fefefe



“Aua nei tatou faaaogaina se fautuaga ona o lo tatou fefefe. Tau ina ia tatou manatuaina pea ina ia tatou olioli, tuu atu lo tatou faatuatua i le Atua, ma ola agavaa mo Ia e taitai i tatou. Ua agavaa i tatou uma e maua musumusuga patino e taiala ai i tatou i lo tatou olaga faaletino faataitai. Tau ina ia tatou ola ia tatala atu o tatou loto i taimi uma i musumusuga ma le faafanafanaga a le Agaga.”

Peresitene James E. Faust (1920–2007), Fesoasoani Lua i le Au Peresitene Sili, “Aua Le Fefefe,” Liahona, Oke. 2002, 6.

Faatalitali ma le Onosai mo Faaaliga



“O le faateleina faifai malie o le susulu o le malamalama mai le oso a’e o le la, e pei lava o le mauaina o se savali mai le Atua i lea “fuitau i luga o lea fuitau, ma lea mataupu i luga o lea mataupu’ (2 Nifae 28:30). O le tele lava o taimi, e oo mai faaaliga i nai faapoopoga laiti mo sina taimi, ma e tuuina mai e tusa ai ma o tatou manaoga, agavaa, ma sauniuniga. O na fesootaiga mai le Tama Faalelagi e faasolosolo malie mai ma le malū ma “toto ifo i o [tatou agaga] e pei o le sau mai le lagi” (MF&F 121:45).

Elder David A. Bednar o le Korama a Aposetolo e Toasefululua, “O Le Agaga o Faaaliga,” Liahona, May 2011, 88.

Ia Iloa O Le A Saunia e le Atua




“I [se] vaitaimi pisi lava o lo’u olaga, sa tuu mai ai e Elder Joseph B. Wirthlin se valaauga ia te au e avea o se peresitene o le siteki.

“I le taimi o le ma faatalanoaga ma ia, sa tele ni manatu na fetuleni mai i lo’u mafaufau, ae le gata i lea o le popole ma le atuatuvaale ina nei le maua so’u taimi e pei ona manaomia ai e lenei valaauga. E ui sa ou lagona le faamaulalo ma le faamamaluina e le valaauga, ae sa tau mafaufau pe mafai ona ou taliaina. Ae sa na o sina mafaufauga puupuu aua sa ou iloa na valaauina e le Atua ia Elder Wirthlin ma o loo ia faia le galuega a le Alii. O le a se mea e mafai ona ou faia nai lo le taliaina?

“E i ai taimi e ao ona tatou faia ai ni mea i le faatuatua e aunoa ma le iloa ina o taunuuga, ma le talitonuga o le a tuu mai e le Atua ni tali ma taitaiga pe a tatou faia i le faatuatua. Ma o lea sa ou taliaina ai ma le fiafia, i le iloa ina o le a saunia mea uma e le Atua.”

President Dieter F. Uchtdorf, Fesoasoani Lua i le Au Peresitene Sili, “O Le Aisea o le Auaunaga Faale-Perisitua,” Liahona, May 2012, 59.



O LE FAATUATUA E TUPU AI VAVEGA

Sa ou mana lava e avea ma se faifeautalai talu mai lou laitiiti. Sa amata i se mana faigofie ma sa faaauau ai pea ona tuputupu ae. Ae o le olaga i Filipaina sa faigata. Sa leai ni galuega a lou tama ma lou tuagane, o lea sa na o au ai na mafai ona fesoasoani i lou tina e tausi lo matou aiga. Ona sa ou fesoasoani i lou aiga i mea tautupe, o lea sa telegese ai le faaputuina o au tupe mo lau misiona.

Sa ou le mautinoa pe o le a faapefea ona lelei ia mea. I se tasi po sa ou faitau ai i le Eteru 12:12: “Aua afai e leai se faatuatua i totonu o le fanauga a tagata e le mafai e le Atua ona faia se vavega i totonu o i latou; o le mea lea, na te le faali mai o ia lava seia mavae ona latou faatuatua muamua.” Ona ou faitau lea i se savali mai ia Peresitene Spencer W. Kimball (1895–1985) e faatatau i le faatuatua: “E faaoga ai le faatuatua—le faatuatua le mavaaia—mo tagata talavou e faatino ai o latou tiutetauave faaleaiga pe a fetai ai ma tulaga le mautonu o mea tautupe. . . . E faaoga le faatuatua e faatumu ai misiona faamamaluina. Ae ia iloa le mea lenei—o nei mea uma o le totoina lea, ae o aiga tuuto ma le faamaoni, o le saogalemu faaleagaga, filemu, ma le ola e faavavau o le seleselega lea.”¹

O nei aoaoga sa fesoasoani lea ia te au ou te malamalama ai na ou manaomia tele le faatuatua e auina atu ai au pepa o le misiona ma le avea ai ma se faifeautalai faamisiona. Sa ou iloa e ui lava sa faigata, ae o le a fesoasoani mai lava le Atua.

Sa faatalanoaina au e lou peresitene o le paranesi ma tau mai ia te au

mulimuli ane o le mea mulimuli lava ou te manaomia e fai o le faia lea o le uluai tupe totogi ona faatalanoaina ai lea e le peresitene o le misiona. Sa ou matua fiafia ma faagaetia. O le a maua lo’u totogi o lona vaiaso, ma o le a mafai ai ona totogi atu le aofaiga manaomia. Peitai, ina ua ou taunuu atu i le fale, sa ou iloa ai ua ave lou tama i le falemai. Sa ou lagonaina le lofituina ina ua ou iloa e ao ona matou totogia le falemai i le aofaiga tonu lava lea ou te manaomia mo lau tupe totogi o le misiona.

Ae sa saunia e le Tama Faalelagi se auala. Sa matou maua se fesoasoani mai aiga ma tagata o le Ekalesia, e aofia ai lo’u peresitene o le paranesi. O se vavega lava le toe te’a i tua o lou tama mai le falemai ina ua mavae le vaiaso e tasi, ma sa mafai ai ona ou totogi atua le tupe. I le lua vaiaso talu ona atoa lou 22, sa ou mauaina ai lou valaauga o le misiona i le Misiona a Filipaina Olongapo.

Ou te iloa sa faafaigofie e le Tama Faalelagi mo au ona auina atu au pepa o le misiona. Ou te iloa afai e faaauau pea ona ou faalagolago atu ia te la ma galue i le faatuatua, o le a la faia mea faigata e avea ma mea faigofie. O le a la tali mai i a tatou tatalo uma, ma o le a la faaauau pea ona taiala i tatou pe afai tatou te faaauau pea ona usiutai ia te la. ■

Cheene Lagunzad,
Bulacan, Filipaina


FAAMATALAGA

1. Spencer W. Kimball, *Faith Precedes the Miracle* (1972), 11; tagai foi *Aoaoga a Peresitene o le Ekalesia: Spencer W. Kimball* (2006), 143.



*O le a tialaina oe e le Atua i lou naunautaiga
e auauna atu ia te la ma tausī Ana poloaiga ao e
faalogo, ao e **aoao**, ao e **galue**, ma ao e **alofa** atu.*

O UPU E FA E
**TAIALA
AI OE**



Saunia e Peresitene
Thomas S. Monson

Sa ou faia ni nai tali mautu ou te fia faasoaina atu ia te outou, ma le faamoemoe o le a outou auai foi i le faia o ia lava filifiliga e tasi. Muamua, *O le a ou faalogo*. Lona lua, *O le a ou aoao*. Lona tolu, *O le a ou galue*. Ma le lona fa, *O le a ou alofa*. O nei upu e fa e mafai ona fuafua lelei ai lo tatou taunuuga.

Faalogo

Ou te faamoemoe o le a outou faalogo i o outou tina ma faalogo i o outou tama, o i laua taitoatasi e tootuli lava i ona tuli i taeao uma ma afaifi taitasi, ma tatalo mo outou, ma ole atu i lo tatou Tama Faalelagi ia leoleo ia te outou ma ia taiala outou i a outou filifiliga, ma ina ia outou faaeteete foi i a outou amioga. Ou te talitonu pe a tatou faamamaluina o tatou matua ma le mea moni o loo latou popole mo outou ma au, ona tatou ava lea ia i latou, ma maua ai se uiga patino o upu na fetalai i le Mauga o Sinai: “Ia e ava i lou tama ma lou tina” (Esoto 20:12).

Ou te talitonu o le a tatou faalogo atu i upu a perofeta. Ou te faamoemoe foi o le a tatou faalogo i musumusuga a le Agaga Paia. Ou te folafola atu ia te outou afai tatou te maua se taliga e faalogo i le Agaga Paia, afai o loo i ai se manao mo le amiotonu i totonu o o tatou loto, ma ua atagia mai i a tatou amioga lena manao, o le a taialaina i tatou e lena Agaga Paia.

Ou te faamoemoe o le a tatou faalogo pea mo musumusuga a lena Agaga Paia, lea o le a mafai ai e oe ma au ona maua le avanoa i aso taitasi o le tausaga e tali atu ai i nei uunaiga ma le aafiaga taialaina a lo tatou Tama Faalelagi. O le mea lea, ou te folafola atu ai e *faalogo*.

Aoao

Lona lua, *O le a ou aoao*. E le lava le tau ina faalogo pe afai tatou te le aoao. Ua ou faia se tautoga o le a ou aoao atili mai tusitusiga paia ma, faamoemoe, o le a outou maua foi lena avanoa. Pe le ofoofogia ea pe afai tatou te molioo i o tatou loto lena fautuaga mai le Alii, “Ia outou saili mai totonu o tusi sili ona lelei upu o le potu; saili i le aoaoina, e ala lava lea i le suesue ma le faatuatua foi” (MF&F 88:118). Ia tatou aoao mai tusi faavae, ae ia tatou aoao foi mai olaga o taitai o le Ekalesia ma olaga o i latou e sili ona latalata mai ia i tatou.

Mo se faataitaiga, ou te talitonu e mafai ona ou aoaoina le onosai e ala i le suesueina atili o le soifuaga o lo tatou Alii ma le Faaoa. E mafai ona e vaai faalemafaufau i le le fiafia atonu na Ia lagonaina, i le silafiaina na ia te Ia ki i le ola e faavavau, i le silafiaina na ia te Ia le ala mo oe ma au e mafai ona ulufale atu ai i le malo selesitila o le Atua, a o Ia avatua Lana talalelei i na tagata i le taulotoaiga o taimi ma vaaia lo latou teenaina o Ia ma le teenaina o Lana savali? Ae sa ia faaalua

lava le onosai. Sa Ia taliaina Lona tiutetauave i le olaga, e oo lava i le satauro, ma le Faatoaga o Ketesemane lea na muamua ai. Ou te faamoemoe e aoao le onosai mai le Alii.

Ou te uunaia outou e afaatasi ma au i se tautoga, *O le a ou aoao*.

Galue

Ona sosoo lea ma le lona tolu, *O le a ou galue*. E le lava le tau ina moomoo, e le lava le tau ina moemiti, e le lava le tau ina folafola. E tatau ona tatou faia. Sa fetalai mai le Alii, “O ia o le e sasau atu lana selesaito *ma lona malosi* . . . ua na faaputu ma teu ina ia le fano o ia” (MF&F 4:4; faapoopoo le faamamafa). Ma na tautino mai e Nifae, “O le a ou alu ma fai mea ua poloaiina e le Alii” (1 Nifae 3:7). O Iakopo na aoteleina le lesona lena: “Ia fai outou ma e anaana i le upu, ae aua le na ona faalogologo i ai, o faaseseina ai outou e outou” (Iakopo 1:22).

I se tasi o taumafanafana i ni tausaga ua mavae, mo se faataitaiga, sa leai ni au mea na faia i le faaiuga o se vaiaso. Ae sa uunaia au e le Agaga e faataunuu se tiutetauave. Sa ou malaga i se vaalele mo Kalefonia. A o ou nofo i lalo, sa avanoa le nofoa na i ou talaane. Peitai, sa mulimuli ane nofo ai i le nofoa se tamaitai talavou sili ona lalelei. Sa ou matauina sa ia faitauina se tusi. E pei lava ona faia e tagata, sa ou autilo atu i le autu. O se tusi a se uso o le Korama a Aposetolo

e Toasefululua. Sa ou fai atu ia te ia, “Oi, ai o oe o se Mamona.”

Sa ia tali mai, “Oi, e leai. Aisea ua e fesili ai?”

Sa ou tali atu: “Ia, o loo e faitauina se tusi na tusia e se tagata lauiloa o Le Ekalesia a Iesu Keriso o le Au Paia o Aso e Gata Ai.”

Sa ia fai mai, “Oi, e sa’o? Sa aumai e se uo ia te au, ae e le tele so’u iloa i ai. Peitai, ua faaosofia ai lou fia iloa.”

Ona ou tau mafaufau lea. Pe tataua ona ou tuusao atu ma tau atu nisi mea e uiga i le Ekalesia? Ma na oo

mai upu a Peteru: “Ia saunia pea” (1 Peteru 3:15). Ma na tonu loa ia te au o le taimi lea e tataua ona tuu atu ai lau molimau. O lou avanoa lea e tali ai ana fesili e faatatau i le Ekalesia —o fesili atamai ia na o mai i se loto sa sailia le upumoni. Sa ou fesili i ai pe mafai ona ou maua le avanoa e tuu atu ai i faifeautalai e valaau atu ia te ia. Sa ou fesili i ai pe fia auai o ia i le tatou paranesi a le au matutua nofofua i San Francisco. Sa maua ana tali. Ina ua ou foi atu i le fale, sa ou tusi atu i le peresitene o le siteki ma pasi atu ia te ia lea faamatalaga. E mafai ona e mafaufauina lo’u fiafia tele ina ua ou maua mulimuli ane se valaau mai le peresitene o le siteki, lea na ia fai mai ai ua avea nei lea tamaitai ma tagata aupito fou o le Ekalesia. Sa tumu au i le fiafia.

Sa ou iloaia e i ai so’u tiutetauave e *galue*.

Alofa

Ia ma lena tautoga mulimuli: *O le a ou alofa*. E te manatuaina le tali lea na tuu atu e le Faaola i le loia na fesili,

“Matai e, o le fea poloaiga e sili i le tulafono?”

Ma na ia tali atu, “E te alofa atu i le Alii lou Atua ma lou loto atoa, ma lou agaga atoa, ma lou manatu atoa.

O le poloaiga mua-mua lena ma le sili. E faapena foi lona lua, E te alofa atu i lē lua te tuaoi, ia pei o oe lava ia te oe” (Mataio 22:36–39).

Sa tusia e le tusitala Peretania o William Shakespeare faapea, “O i latou e le faaalua lo latou alolofa, e le alolofa moni lava.”¹ E mafai faapefea e oe ma au ona faaalua lo tatou alolofa mo le Atua ma le alofa mo o tatou uso a tagata? E ala i le usiusitai i poloaiga a le Atua ma fautuaga a Ana auauna. Ua tatou maua le avanoa e usiusitai ai i le tulafono o le sefuluai, e usiusitai ai i le tulafono o le ola mama, e usiusitai ai i vaega taitasi o o tatou olaga i le afioga a lo tatou Tama Faalelagi.

E mafai ona talisapaia e lo tatou Tama Faalelagi lo tatou alolofa mo Ia e ala i le lelei o lo tatou auauna atu ia te Ia ma le lelei o lo tatou auauna atu i o tatou uso a tagata.

O Le Filifiliga E Æ Oe


Tautoga e fa: *O le a ou faalogo, o le a ou aoao, o le a ou galue, o le a ou alofa*. A tatou faataunuaina nei tautoga, e mafai ona tatou mauaina le taitaiga a lo tatou Tama Faalelagi ma lagonaina ai le olioli moni i o tatou lava olaga.

O le filifiliga e a oe, ma o le filifiliga foi e a au lea, ia manatua o a tatou filifiliga, o a tatou faaiuga, e iloa ai lo tatou taunuuga. O le a taialaina oe e le Atua i lou naunautaga e auauna atu ia te Ia ma tausii Ana poloaiga *ao e faalogo, ao e aoao, ao e galue, ma ao e alofa*. ■

Mai le saunoaga i se faigalotu a le Iunivesite o Polika Iaga i le aso 16 o Ianuari, 1973.

FAAMATALAGA

1. William Shakespeare, *The Two Gentlemen of Verona*, ed. William George Clarke and William Aldis Wright, *The Great Books of the Western World* (1952), act 1, scene 2, line 31.



E faapefea ona ou “tu i nofoaga paia” pe afai e matua tele ni mea le paia o loo siomiaina au, e pei o le a’oga?

na ia saunia i tatou mo taimi faigata, ua poloai mai le Alii ia i tatou ia “tutu i nofoaga paia” (MF&F 45:32; tagai foi MF&F 87:8). Ina ia faia lena mea, e manaomia ona tatou ola agavaa ma maua le Agaga Paia e faatasi ma i tatou. O le a fesoasoani le Agaga ia i tatou e faatoilalo faaososoga ma uunaiga le lelei. O nisi nei o auala e valaaulia ai le Agaga i lou olaga:

- Tatalo. Amata lou aso i le tatalo, ma ia tatalo faapitoa i le taimi o le aso lea e te i ai ai i faatosinaga lē paia i le aoga po o se isi lava nofoaga.
- Auai i le seminare ma suesue i tusitusiga paia i aso taitasi. O le suesueina o aoaoga faavae o loo aoao mai i totonu o tusitusiga paia o le a fesoasoani lea ia te oe ia faatumuina i le malamalama ma le upumoni—“malamalama ma le upumoni e lafoai i le toatasi leaga lena” (MF&F 93:37).
- Taumafa i le faamanatuga i vaiaso taitasi. A e faafouina ma le anoa au feagaiga e ola i le talalelei, e te mauaina le folafolaga a le Alii ia maua Lona Agaga e faatasi ma oe.
- Ola i tulaga faatonuina o loo taua i le tusi *Mo Le Malosi o le Autalavou*. O le a fesoasoani nei tulaga faatonuina ia te oe e tu atu ai mo le paia.
- Ia e latalata i ou matua. O le autalavou e lelei o latou sootaga ma o latou matua e sili atu ona malolosi i tulaga faigata.

O nei fesili o le a faamalositia ai oe faaleagaga. O le a fesoasoani ia te oe pe a e iloaina ua e i ai i se tulaga le paia lea e lemalofiaina, e pei o le aoga. Ae e sili lava pe afai e mafai ona e aloese mai tulaga le paia i soo se taimi e mafai ai.

Faatumauina se Uiga o le Migao



Ua ou aoao e mafai ona e faia ia nofoaga o siomia ai oe ia paia, ona o *tagata* e i ai i tatou e sili atu ona taua nai lo *nofoaga* tatou te i ai. O loo i ai le tele o faaososoga i le aoga, ae o le mea e taua moni lava o le maua lea o se uiga o le migao i le

Tama Faalelagi ma le tauivi e tauave i ou luga le suafa o Keriso. I lea ala, o le a mafai ai ona e faia lau aoga o se nofoaga paia mo oe ona o le a e manatua ai le Tama Faalelagi ma lo tatou Faaola.

Elder Ojeda, 21 tausaga, Misiona a Colombia Bogotá North

Filifili le Lelei, Aloese mai le Leaga

Ou te taumafai e aloese mai nofoaga i lau aoga lea ou te iloa e masani lava ona faia ai e isi tagata ni mea sese. Ou te filifili foi ma le faaeteete po o ai ma te nonofo faatasi i le vasega po o le taimi o le malologa ona e i ai lava so latou aafiaga i le auala ou te mafaufau ai ma faatino. Ae pe o le a lava lo tatou faaeteete e i ai, tatou te vaaiava lava pe faalogoina foi mai lea taimi i lea taimi ni mea le paia. Pe a tupu lea mea ia te au, e vave lava ona ou tepa ese ma usu se viiga i lou mafaufau e faamama ai lou mafaufau. Ma le isi, o le faitauina o tusitusiga paia ma le talanoa atu i uo faagaetia ua fesoasoani foi ia te au. E le mafai ona tatou filifilia i taimi uma ni o tatou siosiomaga, ae e mafai ona tatou filifili i le auala e tali atu ai ia i latou.

Eliza A., 14 tausaga, Iuta, ISA

Tu Atu mo Lou Faatuatuaga



Fai le nofoaga o siomia oe ia paia. Siomia oe lava i uo e tausisia fautuaga o loo i totonu o le *Mo le Malosi o le Autalavou*.

Faailoa atu i isi ou tulaga faatonuina ma talosagaina i latou e tuu ia talanoaga le talafeagai pe tape ni musika leaga pe a e i ai. Aua nei e fefe e tu atu mo lou faatuatuaga.

Thomas S., 15 tausaga, Georgia, ISA

Ia Malosi ma Lototoa



E tatau ona tatou malolosi ma lototoa. E tatau ona tatou filifili le mea sao. O nisi taimi e faigata tele, ae afai o le a tatou faia lena mea, o le a

tatou fiafia. Pe a talosagaina i tatou e tagata ia inupia pe ulaula ma i latou,

e manaomia ona tatou lotototoa ma fai atu leai. E mafai ona tatou faamalamalama atu ia i latou tatou te mana-nao e filifili le mea sao, o lea tatou te le faia ai na mea.

Anastasia N., 20 tausaga, Ivano-Frankivsk, Iukureini

Saili atu i le Agaga



Tatou te fetai ai ma tagata i le aoga e le tutusa o tatou tulaga faatonuina. Ae, faatasi ai ma le Agaga Paia o loo taialaina lo tatou ala, o

le a mafai ona tatou faia ni filifiliga sao ma seti se faataitaiga lelei mo i latou. E taua mo i tatou le “tutu i nofoaga paia” i taimi uma ina ia mafai ai ona lagonaina le alofa o le Tama Faalelagi. O le tasi ala e faia ai lena mea o le saili atu lea i le mafutaga ma le Agaga Paia. Pe a tatou filifili ia i ai i le siosiomaga o le alofa o le Atua, o le a i ai le olioli tele i o tatou loto, i le iloaina o loo fiafia le Tama Faalelagi i a tatou amioga.

Genzen N., 18 tausaga, Zamboanga, Filipaina

Aua Lava Nei Fetuunaia



I ni nai tausaga talu ai, o au o se tasi o ni nai tagata o le Ekalesia i lau vasega. Sa manatu tagata sa ese lava au ona sa ou tuuto atu i le ola ai i

tulaga faatonuina uma a le Ekalesia. O le tasi la aso sa tonu ai ia te au e mafai ona ou fetuunaia teisi ou tulaga faatonuina. Ina ua ou faia, sa ou matauina ua gauai tele mai isi ia te au. Ae ina ua mavae ni nai vaiaso, sa ou lagona le tausala ma liliu atu ai i le Alii mo le

salamo. Sa Ia fesoasoani mai ia te au, ma sa tele ni osigataulaga sa ao ona ou faia, ae sa aoga! Sa ou vaaia moni lava faamanuiaga o le ola ai i le talalelei i le aoga. Sa ou le toe maua nisi o uo ma le toe gauai mai isi, ae sa ou maua le faaaloalo ma le fiafia.

Sutton K., 15 tausaga, Texas, ISA

Mafaufau i le Malumalu

O le nofoaga aupito sili ona paia o loo i ai i le lalolagi o le malumalu. O le mafaufau i ai o le a fesoasoani lea ia te oe e fai le mea sao, e tusa lava po o a tulaga atonu e te oo i ai. E mafai foi ona e tuuina i luga se ata o le malumalu i le mea e mafai ona e vaai atu i ai; o le a fesoasoani lena mea ia te oe ia lagonaina le toamalie ma maua ai le malosi e aua ai nei faalogo atu i mea le paia o loo tutupu i le aoga.

Angel T., 18 tausaga, Ecuador

Mo nisi fautuaga i le auala e tutu ai i nofoaga paia, e mafai ona e iloiloaina nei lauga mai le konafesi aoao o Aperila 2013: Dallin H. Oaks, “Soo o Keriso” ma Robert D. Hales, “Tutu Malolosi i Nofoga Paia,” o loo maua i le conference.lds.org.



O LAU LAVA FILIFILIGA

“Tatou te filifilia le mea o le a tatou i ai. Ua tuuina mai e le Atua ia te i tatou le

faitalia. O le a la le aveesea lava mai ia te i tatou, ma afai ou te faia le mea sese ma ou alu ai i le itu a le tiapolo, ou te faia aua ua ia te au le naunautaga ma le malosi e fai ai. E le mafai ona ou tuua’ia se isi, ma afai foi ou te filifili e tausi poloaiga a le Atua ma ola e pei ona tatau ona ou ola ai ma tumau i le itu a le Alii, ou te faia aua e tatau ona ou faia, ma o le a ou mauaina o’u faamanuiaga i le faia. O le a le o se taunuuga o mea atonu o fai e se isi tagata.”

Peresitene Siao Si Alapati Samita (1870–1951), Aoaoga a Peresitene o le Ekalesia: Siao Si Alapati Samita (2011), 203.

FESILI O LE A SOSOO MAI

“E faigaluega lou tina i le aso atoa. E mafai faapefea ona ou faaleleia le ma sootaga?”

Auina mai lau tali ma se atapue sili ona manino, pe a manaomia, a o lei oo i le aso 15 Setema i le liahona.lds.org, po o le imeli i le liahona@ldschurch.org, po o le meli (tagai i le tuatusi i le itulau e 3).

E ono faapupuuna tali mo le uumi po o le manino.

O le faamatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e itiiti ifo i le 18 ou tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou ata.



MOLIMAU E AUALA I LE SEMINARE

Saunia e Karla Brigante

Sa aoao au e lou tina i le talalelei sa o ou laitiiti, ae talu ai sa lei avea lou tama ma se tagata o le Ekalesia, sa ou tuufesilisili ai lava i taimi uma pe o ou i ai i le ala sao. Sa ou le malamalama lava pe aisea na le auai ai lou tama i le Ekalesia pe afai e moni. Ae, sa ou fialia pea e alu i le Peraimeria ma usu ia viiga. Sa ou olioli foi i taimi na faitau mai ai e lou tina ia tusitusiga paia ia te au, ma i sina mea itiiti ma sina mea itiiti sa ou amata ai ona atiae lau lava ia molimau.

Ina ua ou auai i Tamaitai Talavou, o se tasi o sini na ou faia o le faasoaa atu lea o lau molimau i Aso Sa anapogi uma. O le tuuina atu o lau molimau sa avea o se mausa mo au ma na faamalosia ai lou manao e faateleina lou malamalama ina ua mafai ona ou lesitala i le seminare.

O lau vasega muamua lava o le seminare sa aoaoina ai le Feagaiga Tuai. I lena tausaga na le gata ina sa ou ola ae e talisapaia ma faataua ina le Feagaiga Tuai, ae sa ou aoao foi i le taua o malumalu ma mea tau gafa.

Sa ou auai faatasi ma isi tamaiti mai lau uarota ma auai i le faia o galuega o talafaasolopito o aiga. Sa matou faavasegaina le faitau fiaselau o igoa ma atiae se alofa tele mo tagata sa toetoe lava a matou le iloaina—na o o latou igoa ma isi faamaumauga tapulaa. E ui na ou iloa sa taua le galuega sa matou faia, ae na ou lagonaina le lotovaivai ma le le fialia i nisi taimi. Sa ou galue ina ia mafai ona faia sauniga mo tagata sa ou le iloaina, ae sa le mafai ona ou aapa atu i lou lava ia tama. Sa lei malamalama o ia i le taua o le mea sa ou faia. Sa faaauau



pea ona ou tatalo ma anapogi ina ia pai atu ia te ia.

O le tausaga na sosoo ai i le seminare na matou susesueina ai le Feagaiga Fou. I se tasi taeao ina ua ou ala ae, sa amata ona ou faitau e uiga i le Faaola i Ketesemane. Sa tafe mai loimata i ou mata a o ou iloina o le toto na Ia faamaligiina sa mo a'u. Sa ou moomoo maimau pe ana ou le agasala! Sa oo mai upu a Isaia lea na matou susesue i ai i le tausaga ua mavae i lou mafau-fau: "Ua manua o ia ona o a tatou solitulafono, ua momomo o ia ona o a tatou amio leaga: o le aoaiga e filemu ai tatou sa i ona luga lea" (Isaia 53:5). A o ou faitau e uiga i le Faasatauroga ma le Toetu, sa sau lou tina i totonu o le potu. Sa ou faasoa atu ia te ia ou lagona, o lau molimau, ma lou manao mo lou tama ia iloa le mea ua ou aoaoina i le seminare.

Sa faaauau pea ona tuputupu ae lau molimau i le tausaga na sosoo ai a o matou faitauina le Mataupu Faavae

ma Feagaiga. Sa ou maua se molimau o Iosefa Samita o se perofeta. Sa tonu foi ia te au e mulimuli i lana fataitaiga ma ole atu i le Atua pe moni le Ekalesia. E ui ua uma ona ou maua se talitonuga i lou loto, ae i se tasi aoauli sa tuua ai na o au ma sa ou tatalo ai ma le faamaoni. A o ou tatalo, na ou iloina ai o loo atiaeina le molimau lea sa ou ole atu ai a o ou susesue i tusitusiga paia ma auai i le seminare.

Na tatala e le Alii lou mafau-fau ma lou loto i lena tausaga, ma ou malamalama ai i le Mataupu Faavae ma Feagaiga ou te lei malamalama mua-mua i ai. Sa ou aoao foi i le taua tele o agaga (tagai MF&F 18:10–16) ma sa amata ai ona faasoa atu lau molimau faatupulaia ia i latou sa leiloaina le talalelei, e aofia ai ma lou tama.

Sa ou iloina o le susesueina o le Tusi a Mamona i lou tausaga faaii i le seminare o le a faamalosia ai foi lau molimau. A o ou susesue moni lava, sa ou lagonaina le alofa o le Tama

Faalelagi ia te au. Sa musuia au i tala ma oo ai i le tulaga lea sa na o le pau lava le mea na ou manao e fai o le faitauina lea o le Tusi a Mamona. Sa amata ona ou aveina le Tusi a Mamona i le aoga ma faitau i ou taimi avanoa. Sa ou amata foi ona talanoaina mea sa ou faitauina i lou tama.


I se tasi aso ina ua maea se talanoaga umi ma lou tama e uiga i le talalelei, sa ou luita o ia e faitau atoa le Tusi a Mamona. Na ou molimau i ai, e pei foi o au, e mafai foi ona ia maua se molimau.

Ou te fiafia e faapea atu sa faitau e lou tama le Tusi a Mamona. Ina ua ia faia, sa ia iloa e moni le Ekalesia ma mulimuli ane ai papatisoina! Ua sauniuni nei lou aiga ina ia faamauina i le malumalu. Ou te iloa o le auai ai i le seminare ma le faitauina o tusitusiga paia na fesoasoani ia te au e atiae lau lava molimau, ma ou te iloa e faamanuiaina e tusitusiga paia ia aiga. ■
O le tusitala e nofo i São Paulo, Pasila.

AISEA E FAAIPOIPO AI I LE MALUMALU?

Tatou te talanoa soo e uiga i le faaiipoipoga faalemalumalu i le Ekalesia. Pe ua e mafafau ea pe aisea?

O loo i ai le tele o se talanoa talu ai nei e uiga i le faaiipoipoga—o le a lona uiga, aisea tatou te faia ai, le matafaioi na te faia i le sosaiete. I le lotu tatou te talanoa soo e uiga i le faaiipoipoga faalemalumalu. E te iloaina e taua ona ua e faalogo i ai i lenei mea talu ona aooina oe i lau lesona muamua e uiga i le talalelei, pe o oe o se Aveolela po o se tagata liliu mai i lou talavou.



Ae o nisi o outou atonu o loo outou tau mafafau, “Pe Aisea?” Ia te outou atonu e sili atu nai lo na o se fesili po o le a le uiga atoa o le faaiipoipoga faalemalumalu. E te fia iloaina—i lou loto, e le na o lou mafafau—pe aisea e tatau ai ona e soona galue malosi ina ia e faaiipoipo i le malumalu, aemaise lava i se taimi ua avea ai le faaiipoipoga ma se manatu po o se faatulagaga ua foliga mai ua faavaivaia i malo i le lalolagi atoa.

Ia, e amata i le aoaoga faavae o le aiga.

O Le Aoaoga Faavae o le Aiga

Tatou te faaaogaina le upu *aoaoga faavae* e fesoasoani ai e faamatalaina le tele o mea i le Ekalesia. Mo se faataitaiga, o le Taiala i Tusitusiga Paia ua faamatalaina le *mataupu a Keriso* o “mataupu faavae ma aoaoga o le talalelei a Iesu Keriso.”¹ O le a la le uiga ia i tatou pe a tatou talanoa e uiga i le aoaoga faavae o le aiga po o le aoaoga faavae o le faaiipoipoga e faavavau?

“O Le Aiga: O Se Folafolaga i le Lalolagi” o loo ta’ua ai, “O le faaiipoipoga i le va o se alii ma se tamaitai ua faauuina e le Atua ma o le aiga o le totonugalemu lea o le fuafuaga a Lē Fofoa mo le taunuuga e faavavau o Lana fanau.”² I se isi faaupuga, pe a tatou talanoa pe aisea ua tatou i ai iinei i le lalolagi ma po o le a le mea e ao ona tatou faataunuaina ma avea ai i tatou, o loo noatia uma lava ia mea i le manatu o i tatou o le vaega o se aiga ma e mafai ona faaiipoipo ma faavae ni aiga fou.

O loo taua foi i le folafolaga i le aiga e faapea: “O le fuafuaga paia o le fiafia ua mafai ai ona faaaauu fe-galegaleaiga faaleaiga i tala atu o le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatasi i le afioaga o le Atua ma toe faatasia ai aiga e faavavau.”³

Ae o le a le mea e tupu i o tatou aiga pe a tatou feoti? Afai o loo e faaiipoipo i le tulafono a le tou setete po o le atunuu, pe o le a i ai ea i lena tulafono se pule ia te oe pe a e oti? E leai, aua o na tulafono ua faia e tagata ma e na o le pau le taimi e i ai le pule, o le umi e te ola ai i lalo o lena pule. Ina ia faaaauu mafutaga o faaiipoipoga pe a e oti, e tatau ona faamauina faatasi na faaiipoipoga i le nofoaga sao o i ai le pule lea e tumau i le faavavau atoa. O lena nofoaga o le malumalu, ma o lena pule o le perisitua lea (tagai MF&F 132:7, 15–19). E ala i le filifilia o se faaiipoipoga faalemalumalu ma le tausia o na feagaiga, ua e filifili ai ia mafai ona ola e faavavau faatasi ma lou toalua.



AUAI I LE TALANOAGA



O Le Mafuaaga Tatou te Popole ai

Atonu ua e iloaina lava lena aoaoga faavae, ae o loo e tuufesili pea, “Ae aisea ea e ala ai ona taua tele?” Atonu e le o se mataupu o le malamalama i le aoaoga faavae. Atonu e sili atu i lo se fesili faigofie e faatatau i le uiga o le faaipoipoga ma le aiga i lou loto. O le tali faigofie lava e faapea, o le fiafiaga ma le olioli aupito sili ua avanoa mai ia i tatou e oo mai e ala i le ola ai i le talalelei ma le mauaina ma le faatumauiina o se faaipoipoga faalemalumalu.

I le konafesi aoao o Aperila 2013, sa faamalalama mai ai e Elder L. Whitney Clayton o le Au Peresitene

o Fitugafulu i le ala lenei: “E leai lava se isi sootaga o soo se ituaiiga e mafai ona maua ai le fiafiaga tele, e fua mai ai mea lelei e tele, pe aumaia ai le faaleleia tele faaletagata.”⁴

Ua tatou iloa foi e faapea o le “fiafia i le olaga faaleaiga e mautinoa lava e ausiaina pe a faavae i luga o aoaoga a le Alii o Iesu Keriso.”⁵

A e mafaufau i ai, o le a e faaluina se vaega tele o lou olaga e saunia ai mo suiga tetele e oo mai i le ala. O loo i ai le papatisoga, faauuina mai le Peraimeri ma agai atu i Alii Talavou po o Tamaitai Talavou, auai i le malumalu, ma le auai i sailiga o talafaasolopito o aiga ma sauniga o

Ia Aokuso atoa, o le a outou suesueina le faaipoipoga ma le aiga i a outou korama faaleperisitua ma vasega a Tamaitai Talavou ma le Aoga Sa. O se tasi o aoaoga faavae taua o le aiga e faapea e ala i le faaipoipoga faalemalumalu, e mafai ai ona faamau faatasi se aiga ma aveva pea o se aiga pe a mavae le toetu.

A uma ona faitau lenei tusiga, ia mafaufau i le auala e ese ai lou olaga ona e mafai ona faamauina oe i se toalua i le malumalu. Ma le isi, ia mafaufau pe faapefea ona aafia au filifiliga i le aso i lenei mea ma po o a mea o loo e faia e saunia ai mo se faaipoipoga faalemalumalu. Tusi i lalo ou lagona ma mafaufau e faasoa atu i isi e ala i le molimau atu i le fale i lou aiga, i le lotu i le Aso Sa, po o luga o ala o faasalalauga faaagafesootai.

le malumalu mo ou tuua. Mo alii talavou, o loo i ai le mauaina o le perisitua ma le siitia i tofi o le perisitua. Mo tamaitai talavou, o loo i ai le siitia atu i vasega a Tamaitai Talavou. O loo i ai le faauuga i le aoga maua luga po o se faauuga talitutusa. Ma le auala ua mafai ona faamisona ai i le 18 po o le 19 tausaga. O loo tele mea e saunia ai ma tulimatai atu i ai.


Ae o le feagaiga aupito sili ona taua tatou te saunia ai o le faamauina lea i le malumalu. Pe a ola ma soifua tagata taitoatasi o aiga e tusa ma le fuafuaga o le fiafia ma tausia a latou feagaiga o le malumalu, latou te lagonaina le olioli moni.

O le talalelei o le ute atoa lava lea o le olaga. O le mafuaaga atoa lea ua tatou i ai iinei. A tatou mulimuli i le ala o le talalelei, o le a tau atu i le olioli. Ma o lena ala e tau atu i se faaiipoipoga faalemalumalu, a le o le olaga nei po o le olaga a sau. E leai ni faamanuiaga o le a taofia mai fanau faamaoni a le Tama.

Sa fautua mai Elder Bruce R. McConkie (1915–85) o le Korama a Aposetolo e Toasefululua e faapea, “O le mea aupito sili ona taua e tasi e faia e soo se tagata o le Au Paia o Aso e Gata Ai i lenei lalolagi o le faaiipoipo lea i le tagata sao, i le nofoaga sao, e ala i le pule sao.”⁶ ■

FAAMATALAGA

1. Taiala i Tusitusiga Paia, “Mataupu a Keriso,” scriptures.lds.org.
2. “O Le Aiga: O Se Folafolaga i le Lalolagi,” *Liahona*, Nov. 2010, 129.
3. “O Le Aiga,” *Liahona*, Nov. 2010, 129.
4. L. Whitney Clayton, “Faaiipoipoga: Mataupu ma Aoa,” *Liahona*, Me 2013, 83.
5. “O Le Aiga,” *Liahona*, Nov. 2010, 129.
6. Bruce R. McConkie, “Agency or Inspiration?” *New Era*, Jan. 1975, 38; tagai foi Thomas S. Monson, “Whom Shall I Marry?” *New Era*, Oct. 2004, 6.



FIAFIAGA O LE FAAIPOIPOGA

O nisi o fiafiaga o le faaiipoipoga e aofia ai:

Talitonuga ma le Lago-lago. A e faaiipoipo, ua e maua se tasi o le a faafiafiaina oe ma faamalosia ia te oe i le faia o le mea sao, o lē o le a siitia oe i aso taitasi, o lē o le a tausoa faatasi ma oe ou fiafiaga ma faanoanoaga uma.

Fanau. E aumaia le olioli tele i le faatuatua ina i le tausiga ma le faafai-leleina o fanau a le Tama Faalelagi.

Fefaasoai. O se faamanuiaga tele le fefaasoai i le olaga o se isi tagata ma faapena foi i se aso i le olaga o fanau. O le manuia o oe ma le manuia o lou toalua e avea foi ma manuia mo le aiga. O le faia faatasi o mea e manatua e faapoopo lea i le uiga loloto atu o le olaga.

Fefautuaai. E mafai e se toalua ona tuu atu ia te oe se fautuaga lelei ma le faamaoni, ma e mafai ona e faatuatua ina lena fautuaga ona e te iloa o loo sau mai se tasi e popole moni mo lou tulaga manuia.

Malosiaga. O le lua e malosi atu i lo le tasi. E mafai ona oulua faamalosi ma fesoasoani i le tasi ma le isi e ola atoatoa atili i le talalelei.

Ataata. A e iloa ina lelei se tasi ma a oulua faatuatua ina moni le tasi

ma le isi, o le a oulua olioli i le olaga faatasi ma le ataata ma le fai mea malie.

Alofa. O le ta’u atu i aso taitasi e alofaina oe, o se lagona faafouina ofoofogia lea.

Auauna Atu. O loo i ai se olioli tele i le auaua atu i le tasi ma le isi ma e sili atu foi pe a e faia mo se tasi e te alofa i ai.

Faigauo. O le a e maua se tasi e i ai iina ma oe i taimi lelei ma taimi leaga.

Faatuatua ina. E toafimalie le iloaina o loo e i ai ma se tasi e manao lava i taimi uma i le mea silisili mo oe ma e mafai ona e talanoa atu ia te ia i soo se mea e aunoa ma le fefe.

Vavalalata Faaletino ma Faalelagona. O le faaiipoipoga o se sootaga tulaga ese lea e fusia ai e le Alii ni tagata se toalua i se sootaga e faavavau lea o ana sini e aofia ai le lotogatasi, autasi, ma le olioli.



Filifili e Aua le FAITATALA

Saunia e Brett Schachterle

I lousaga lona lua i le aoga maualuga, sa ou volenitia ai e avea o se tasi o le vaega faatekinolosi e tuu faatasia le polokalama faamusika faaletausaga a la matou aoga maualuga. O lea aafiaga sa avea ma se tasi o mea ou te manatuaina e sili ona ou fiafia i ai o le tausaga, ona sa faafiafiaina ma na ou aoao ai le tele o mea a o faatinoina. Sa ou fiafia foi e galulue faatasi ma tagata na ou feiloai i ai.

Ae o le mea aupito sili ona taua na ou aoaoina sa le o se mea na ou faamoemoeina.

Ina ia mafai ona fesootai ma le filemu le vaega faatekinolosi i le tasi ma le isi, matou te faaogaina mea faalogo faauaealesi. Sa matou faaogaina foi e faamatala ai tala malie, fai ai talanoaga, pe pese atu ai le tasi i le isi e faafiafia ai i matou lava i le taimi umi o faataitaiga.

Ae o le taimi muamua lava na matou faaogaina ai mea faalogo sa lei lelei tele mo au. I le taimi muamua sa matuai ou fiafia lava i ai. Ona amata lea e nisi tagata ona faitatala e uiga i tagata autu o loo faia faataitaiga i luga o le tulaga. Sa ou taumafai ia le amanaiaina ia faamatalaga faatiga ma tala le migao, ae a o faateteleina ia talanoaga, sa faasolo ina leaga tele le faitatala ma sili atu ona faatiga.

Sa ou lagona le inoino i le faalogo atu i nisi o faamatalaga, ae sa ou fefe e tu atu faasaga i au uo fou. Sa ou momoo maimau pe ana ou fai atu se tala, ona a o ou faalogo i a latou tala malie, sa faaososoina lava au e ata

ma fai atu foi ni au faamatalaga. Sa amata ona ou feetuuna'ia le mafuaaga o le a lelei ai. E leai se tasi ae na o le vaega faatekinolosi e ono lagonaina mai au, ma sa ou manao ia au faatasi ma tagata o loo siomia au.

I lona faigata sa i ai, sa ou iloina o le fai o tala lē lelei o i latou i luga o le tulaga sa le sa'o, ma na ou filifili ia le faitala.

Ina ua uma le faataitaiga na matou iloa ai o tala uma na matou tautatala ai i luga o mea faalogo na faasalalauina i tua atu o le tulaga. Sa faalogo uma lava le 60 pe a o tagata o le tala ia i matou o talanoa. Sa faitai nisi, le fiafia, pe maasiasi foi. E leai ma se tasi na fiafia.

Mulimuli ane, a o ma talanoa ma se tasi o au uo i le mea na tupu, sa ia fai mai, "Ua iloa uma e tagata e te lei tautala lava i se mea faapena." Sa faateia au i lana faamatalaga, ma ou iloa ai le taua o le filifiliga na ou faia. Ana faapea ou te filifili e auai i le au faitatala, o le a se mea o le a faamatalaina ai au e lona mea? O le a se mea o le a faamatalaina ai le Ekalesia e lona mea?

Ou te faafetai mo le filifiliga na ou faia i lona tamai fale faafiafia pogisa, e oo lava i taimi sa ou mafaufau ai e le iloina e isi, ona ua tatalaina ai faamanuiaga o faigauo, filemu, ma le talitonuga semanu ou te maimaua pe ana ou filifili e faitala. ■

O le tusitala e nofo i Uosigitone, ISA.



Matou te “TAUTATALA” i Nei Mea

O upu tatou te faaaogaina e atagia atu ai lagona o o tatou loto ma o tatou tagata moni.



A o avea ai o se epikopo, sa sau ai se alii talavou lelei lava i lou ofisa mo se faatalanoaga. A o ma talatalanoa, na ia ta’ua e na o le pau lava lona faafitauli tele o le palauvale. Sa faalogo pea o ia i gagana masoa i ona talaane, ma sa amata ai foi ona ia laulauvavale. Sa ia fai mai na ia taumafai lava e tuu ae sa le faamanuiaina, ma sa ia manao i ni fautuaga i le auala e mafai ai ona ia tuu le faaaogaina o le gagana masoa.

Sa vave ona ou mafaufau i ni fautuaga tali tutusa ia o loo maua nei i le *Mo Le Malosi o le Autalavou*: “Afai ua e atiaeina se mausa o le faaaogaina o le gagana e le o tusa ai ma le tausia o nei tulaga faatonuina—e pei o le palauvale, faatauemu, faitatala, po o le tautala atu ma le ita i isi—e mafai ona e sui. Tatalo mo se fesoasoani. Fai atu i lou aiga ma au uo e lagolago mai ia te oe.”¹ Ou te momoo maimau pe ana faapea sa i ai lenei fautuaga i le *Mo Le Malosi o le Autalavou* i lenei taimi.

O Se Aafiaga mai Lo’u Talavou

Sa ou faamatala atu i lenei alii talavou se aafiaga sa ou oo i ai a o ou talavou i se siosiomaga sa tele lava na faaaoga ai gagana le talafeagai. Sa foliga mai o soo se taimi lava na ou faalogo ai i soo se ituaga o upu masoa, o na upu o le a faigofie atu ona mau i lou mafaufau nai lo mafaufauga



**Saunia e
Larry M. Gibson**

Fesoasoani Muamua
i le Au Peresitene
Aoao o Alii Talavou

lelei sa ou manao ia maua. Sa tau mai ia te au e se taitai perisitua lelei lava e faapea o le mafaufau e pei o se tamai masini teu faamaumauga ofoofogia lea e mafai ona tatou aveesea ni mafaua-fauga le talafeagai e ala i le vave tape-eseina i mea e tauleleia.

Sa tonu ia i maua ma se uo o le a ma faia faapea. Sa ma taulotoina ni viiga se lua, “Ua Naunau ia te Oe” (*Viiga*, nu. 57) ma le “Faapaia Mai Au” (*Viiga*, nu. 70), faapea ai ma le mataupu faavae o le faatuatua lona sefulutolu. Sa ma malilie faatasi po o ai lava o i maua e tautala i se mea le talafeagai, o le a ma usuina vave lava se tasi o ia viiga pe sii mai le mataupu faavae o le faatuatua.

Na vave lava ona ma iloina ma te le fia mananao e usu leotele ia viiga i ni nofoaga patino. Sa ma matamumu lava! O lea na ma sii maia ai le mataupu faavae o le faatuatua lona sefulutolu, ma faamamafaina le vaega, “Afai o i ai nisi mea e mama, matagofie, pe logoleleia, pe tauleleia, matou te saili atu i nei mea.” Sa aoga! Na ma iloina a ma toe faia, o le a mou ese atu mafaua-fauga le talafeagai. E ala i le suia o se upu se tasi, na ma fatuina ai se mautauave faigofie: “Matou te tautatala i nei mea!” Pe a faia e se tasi o i maua leni fasifuaifua, e ma te mafaua-fau, “Pe ua amiotonu ea au upu, nofomama, agalelei, amiomama,

matagofie, pe logoleleia pe tauleleia?” (tagai Mataupu Faavae o le Faatuatua 1:13). Afai e leai, sa ma iloina e i ai se ma galuega e fai.

O Le Mea e Mafai ona Tatou Faia

Ua tatou ola i se taimi o loo i ai le tele o [amioga] masoa, tufanua, ma le mafaua-fau. E foliga mai e toetoe lava a le mafai ona puipuia atoatoa i tatou lava mai le faalogo atu pe vaai atu i mea o loo tatou mananao e aloese mai ai. O le ki e mo tatou ia mautinoa ia le avea i tatou ma e tauaveina ia mea masoa, tufanua, po o le le mafaua-fau. Atonu sa lagonaina e Paulo leni mea ina ua ia fai mai, “Aua nei alu atu se upu leaga ai o outou gutu” (Efeso 4:29).

Ua ou vaaia nisi o le autalavou o faa-aogaina gagana le talafeagai ona latou te manatu e fesoasoani lea ia latou au faatasi ai ma isi ae o isi e faa-aogaina ona o se manao ia tumatilatila atu ai. O le mea moni, o mea nei ua foliga mai o mafuaaga tetele ia ua mafua ai ona see atu le autalavou i leni mausa.

E aupito sili ona ou fiafia i na talavou o e “Lototetele ina ia ese mai,”² e pei o se tasi o alii talavou sa i ai sana uo le lotu e fai upu masoa lava i le tele o taimi. O taimi uma lava e palauvave ai lana uo, na te talosaga faalelei lava o ia e tuu. Mulimuli ane sa tuu e lana uo. Sa matua fiafia lava lana uo ia te ia ma le auala na ia ola ai i lona

olaga lea na ia manao ai e aoao atili e uiga i le Ekalesia. E lei leva lena, ae papatiso loa o ia.

O mea tatou te lagonaina i o tatou loto o mea ia tatou te mafaua-fau i ai, ma o mea tatou te mafaua-fau i ai o mea lava ia tatou te tautatala ai. O lea, e moni lava o upu tatou te faa-aogaina e atagia atu ai lagona o o tatou loto ma o tatou tagata moni.

E pei lava foi ona faamatala lelei mai i le *Mo Le Malosi o le Autalavou*: “O se gagana mama ma atamai o se faama-oniga lea o se mafaua-fau atamai ma le lelei. O le gagana lelei e faagaetia loto, faamalosiua, ma faamalo atu i isi e vala-aulia ai le Agaga ia faatasi ma oe.”³

E mafai e i tatou taitoatasi ona olioli i faamanuiaga o le mauaina *pea* o le Agaga e faatasi ma i tatou, e pei ona folafola mai pe a tatou aai ma feinu i le faamanatuga i aso Sapatitaitasi. O le a faalagolago lava ia i tatou—i le auala tatou te amio ai, o mea tatou te faia, ma, ioe, e oo lava i mea tatou te tautatala ai. Ou te faamoemoe o le a tatou le faa-aogaina a tatou upu e laulauvavale ai pe faitatala ae ia faaali atu ai o i tatou o soo o lo tatou Faaola, o Iesu Keriso. ■

FAAMATALAGA

1. *Mo Le Malosi o le Autalavou* (tamaitusi, 2011), 21.
2. L. Tom Perry, “O Tu ma Agaifanua o se Olaga Paleni ma le Amiotonu,” *Liahona*, Aok. 2011, 33.
3. *Mo Le Malosi o le Autalavou*, 20.



GALUE

AUAUNA ATU

MA LE FAALAGOLAGO FAALEAGAGA O LE TAGATA IA TE IA LAVA



**Saunia e Elder
Per G. Malm**
O Le Fitugafulu

O faamanuiaga o le galue malosi ma le auauna atu e sili atu i le na o se fesoasoaniga faaletino.

Folapiliki i le 16 [tausaga]

O le aoao i le auala e galue malosi ai e taua ao e talavou. O le galue malosi faaletino o se vaega o le olaga. Sa ou vave aoaoina lena lesona ina ua valaauina au i se misiona faapitoa o auaunaga faale-Ekalesia e fesoasoani i le fausiaina o falelotu. Sa na o le 16 ou tausaga ma faatoa faauu mai lava i lau aoga. Sa tofia au i le vaega a le au folapiliki. Sa o se galuega faigata, ae sa ou fiafia i ai.

Sa tuu i matou i vaega ma sa ou faimala-laga mai Suetena, i le mea sa ou nofo ai, i isi atunuu lata ane. I nofoaga taitasi sa matou faia ni fetuunaiga e nonofo ma se tagata mai le uarota i le lotoifale. Sa taia au i le naunau-taiga o tagata lelei ma mausali o le Ekalesia e tatala mai o latou fale ma saofaga i soo se

mea na latou mafaia. E oo lava i a latou mea tautupe sa le tele, ae na latou mananao lava e auauna.

O le toatele o alii talavou na valaauina i nei misiona o auaunaga faale-Ekalesia na matutua, ae o a'u sa 16. Sa mulimuli ane ou auauna i se misiona tala'i ina ua 19 ou tausaga. Ina ua ma maua ma lou uso ia valaauga, sa sau lo ma tama ia i maua ma faapea mai, "E ui lava o le a faasalaveia ai i se taimi le tumau a oulua aoaoga faifai pea, ae ou te manao ia i ai ni ou atalii e aoao vave e auauna atu i le Ekalesia. O le mauaina o lena aafiaga o le a avea ma faavae mo le ala e mafai ona oulua taulimaina ai le olaga." O aso nei, o le tali atu i le valaau e auauna atu i se misiona tala'i o se mea faamuamua lea mo alii talavou.



Ina ua maua lou valaauga e auauna atu i lenei misiona, sa fai si ou popole, ae sa ou lei faatuai lava e taliaina. Sa aoaoina lava au mai lou talavou e fai atu ioe pe a talosagaina e auauna atu i soo se vaega o le galuega a le Alii. O lea, i le sili ai nai lo le popole, sa ou lagonaina le fiafia. Sa o se aafiaga maoae le fesoasoani ai i le fausiaina o falelotu mo le Ekalesia.

Mauaina o le Molimau ma le Ola Faalagolago o le Tagata ia te la Lava

Ou te iloa e ala i le auauna atu i isi e mafai ai ona tatou mauaina se alofa ma se molimau i le talalelei. I le taimi sa ou malaga ese ai mai lou aiga o se alii talavou, sa ou aoaoina ai e manaomia ona ou tauaveina tiutetauave mo lou olaga—e le gata i le faaletino ae faapena foi i le faaleagaga. Sa ou aoaoina foi le auala e faalogo moni ai lava ma mulimuli i uunaiga a le Agaga.

Ae o na lagona ma tomai sa le na o le taimi o lau misiona o auaunaga faale-Ekalesia na oo mai ai. Sa amata lau molimau ma lou manao e auauna atu i se taimi na muamua atu i lena. A o ou talavou, sa ou matamuli lava, ma sa i ai foi ou luitau e tautala atu ona o lou le mautonu. Ae sa faasolosolo lava ona faamalosia au—i lea laasaga ma lea laasaga a o ou faaafia au i auaunaga. Sa tuu mai ia te au ni avanoa e aoao ai, auauna atu ai, ma tuputupu ae ai e ala i valaauga ma tofiga i le matou paranesi. Sa oo ina ou auai ma le

naunautai (tagai MF&F 58:27). Sa ou aoao e faapea i le olaga, o le mea e te amata ai e le o le mea lea e te tini ai; o le mea e amata ai o le amataga lea o se olaga o suiga.

O Se Folafolaga e Fesoasoani ia i Tatou

O le ki o le faia o lena suiga o le manatua pea lea pe o ai i tatou. O i tatou o atalii ma afafine o le Tama Faalelagi. Sa fananau mai i tatou taitoatasi ma se folafolaga: pe a tatou osia ma tumau ma le faamaoni i feagaiga ma fai mea sili tatou te mafaia i o tatou tulaga, taleni, ma tomai, ona mafai lea ona tatou toe foi atu i lo tatou Tama Faalelagi ma le mamalu. O le vaega lena o la tatou vaaiga e faavavau, ma e manaomia ona tatou manatuaina e le o tuua na o i tatou. O le a aumai e le Tama Faalelagi ia i tatou le mana ma le tomai e fetiaia ai ma o tatou luitau.

Sa auala mai i aafiaga na ou oo i ai a o auauna atu i le popofou o lou olaga lea na amata ai ona faamautu lou lava lototele i le Alii. Ua faamalosia mai le Mataupu Faavae ma Feagaiga 121:45 ia i tatou ia “solo malosi [lo tatou] lototele i luma o le Atua.” A e aofia ai i le auaunaga a le Alii, o le a e lagonaina Lona Agaga, o le a e lagonaina Lona alofa, ma o le a e malamalama e faapea, e ui lava o lenei olaga o se suega, ae e le o tuua na o oe. Pe a e ola amiotonu ma e auauna atu, o le a tuu atu ia te oe fesoasoaniga ma mana e sili atu nai lo lou lava mana. ■

ATA NA TUSIA E BRYAN BEACH



Saunia e Elder Jeffrey R. Holland

O Le Korama a Aposetolo e Toasefululua
O sui o le Korama a Aposetolo e Toasefululua o ni molimau faapitua a Iesu Keriso.

Aisea e taua ai le **AUA** nei **LOTOLEAGA** i isi?

Tatou te le o i ai i se tū'uga e faasaga le tasi i le isi e iloa ai pe o ai ua sili ona mauoa pe sili ona talenia pe sili ona aulelei pe sili foi ona faamanuiaina.

O le tuuga lea tatou te i ai *moni* lava, o le tuuga e faasaga i le agasala.

O le manaolasi, faasiaia, po o le taufaaleaga i isi e *le* avea ai oe ma se tagata sili atu.

O lea ia agalelei ai, ma ia loto faafetai aua e agalelei le Atua. O le ala fiala lena e ola ai.

Kata o Mau

E mafai ona fesoasoani tusinga paia ia i tatou i taimi fiafia ma taimi faigata. Oti ese kata nei ma tuu i totonu o au tusinga paia. E mafai foi ona e tusia au lava fuaiupu o mau e te fiafia i ai i luga o kata taitasi!




Pe a ou lagonaina le fefe . . .



Pe a ou lagonaina le fiafia . . .



Pe a ou lagona le tuatoatasi . . .



Pe a ou manaomia le lototele . . .

**E MAFAI ONA OU
FAITAUINA LE . . .**

• Salamo 118:24

• Ioane 13:17

• Alema 26:35

- _____

**E MAFAI ONA OU
FAITAUINA LE . . .**

• Iosua 1:9

• 2 Tupu 6:14–17

• Mataupu Faavae ma Feagaiga
50:41–43

- _____

**E MAFAI ONA OU
FAITAUINA LE . . .**

• Tanielu 6

• 1 Nifae 3:7

• Alema 56:44–48

- _____

**E MAFAI ONA OU
FAITAUINA LE . . .**

• Isaia 41:10

• 3 Nifae 17:18–25

• Mataupu Faavae ma Feagaiga
84:88

- _____

Ua Sosola Ese Alapaka!

Sa lei minoi lava le alapaka mulimuli. O le a se mea na tatau ona ou faia?

Saunia e Romney P.
12 tausaga, Kalefonia, ISA

“Le Tama Faalelagi, ua ou tatalo atu nei, taitai ma puipui mai au i aso uma” (“Heavenly Father, Now I Pray,” Children’s Songbook, 19).

O le taumafanafana na tea atu nei sa ou faigaluega ai mo lo matou tuaoi. Sa i ai sana lafu alapaka tele e sosoo ma lana togā lama. O alapaka e tai foliga lava i le manu o le lama, ae e laiti ifo.

O lau galuega o le faamama lea o o latou fale i aso uma. Sa ou fiafia

i le galuega, e tusa lava pe sa le faigofie.

I se tasi aoauli vevela o le taumafanafana sa ou alu atu ai ae e le o i ai lou tuaoi. E ui i lea, sa le o se faafitauli lena mea. Sa ia tau mai lava ia te au e mafai ona ou faamamaina ia fale o manu i soo se taimi ou te manao ai, e tusa lava pe le o i ai o ia.

A o ou faamamaina, sa taia i lalo e se tasi o alapaka le faitotoa o le pa. I ni nai sekone sa sosola ese uma ai alapaka e 14 ma o atu i le fanua ma le togalaau ‘aina! Sa ou le talitonu


i ai! Sa ou matua le fiafia lava. O le a faapefea nei la ona ou toe faafio maia i latou na o au?

Sa amata ona ou tamoe atu i le saosaoa ou te mafaia, e tasi’o mai i latou taitasi pe tailua i le taimi. I le sefululima minute mulimuli ane sa matuai tatavale lou fatu mai le tamoe solo, ae sa iu lava ina foi atu i totonu le manu mulimuli i le pa. Oka!

Ona ou faliu atu lea ma vaaia se alapaka e to, o loo taoto mai i lalo o se laau aina e 30 futu le mamao. Oi aue. E toe tasi lea e totoe. Sa ou taumafai e faafefe ina ia alu ai i totonu o le pa, ae sa le minoi. Ona ou taumafai lea e toso mai o ia i se matasele ma se maea na ou mauaina i le faletaavale. E le lelei. Sa ia taoto iina e pei o se faaputuga tele o piliki. Sa ou mapuea i le le fiafia. O le a se isi mea e mafai ona ou faia?

Ona ou manatua lea o loo i ai lava se ala i taimi uma e fesili ai mo se fesoa-soani, e tusa lava po o fea o ou i ai. Sa ou tootuli i lalo ma tatalo. I le taimi lava na uma ai lau tatalo, sa ou pupula atu ma na tau le mafai ona talitoinuina le mea sa ou vaaia. O loo savali atu le alapaka lava ia e agai atu i le pa manu. Sa ou tatalaina le faitotoa, ma sa ia savali sao i totonu.

Sa ou ataata a o ou tietie atu i lau uila i le fale. Sa ou iloaina na tali mai le Tama Faalelagi i lau tatalo. ■





Maimoaina o NAVU

*Susu mai e maimoa
i se nofoaga taua i
le talafaasolopito
o le Ekalesia!*

Saunia e Jennifer Maddy

E alu ae malie le pefu i luga a o e savali atu i lalo i le auala. E mafai ona e maimoa i le feilafi o ave o le la i luga o le Vaitafe o Misisipi. Ona pasia lea o oe e se solofanua a o tosoina se taavale toso. Pe ua e oo mamao atu i tua i le [talaga]? Leai, o loo e tu i Parley Street i Navu, Ilinoi.

I le 1839 na nofoia ai e le Perofeta o Iosefa Samita ma uluai tagata o le Ekalesia ia Navu ma sa fausia se aai matagofie ma le malumalu. Sa latou nonofo ai iinei seia oo i le ogatotonu o le vaitau 1840, ina ua amata la latou malaga i sisifo.

*Sa oo lava ina
faia e le Au Paia
a latou lava faa-
mau mananaia.*



*O le upu Navu e mai se
upu Eperu o lona uiga o
le "nofoaga matagofie."
Sa i ai i Navu ni togalaau
matagofie, fale piliki, ma
laufanua lanulauava.*






E tele fale tuai i Navu ua toe faafouina. E laei faifeautalai i laei o le vaiata 1840 ma faamatala atu i tagata asiasi tala e uiga i uluai Au Paia. E mafai ona e tofo i se kuki e fai i le fiu i le Scovil Bakery pe maimoa foi i le gaosiina o seevae i le fale seevae.



Sa taugata pepa ma le lafoina o meli, o lea na faaoga ai e tagata ia "tusiga felavasa'i" i a latou tusi. Latou te tusitusi i le itu e tasi, ona liliu lea o le pepa ma tusi faalava ai i luga. Faataitai i ai ma vaai pe mafai ona e faitaua lau tusitusi!



E manaomia tagata e toatolu e faia le maea i le ala na faia ai e paionia!



I le aoga, e tusitusi ai tamaiti i sioka i luga o maatusi.




O loo tu le Malumalu o Navu i luga o se maupuepue e faasaga i le aai ma le vaiata. Faitau atili e uiga i le malumalu i le lomiga o le masina fou!



O moliga'o sa faia e ala i le nonoaina o se manoa faataamilo i se maa ona lolō lea i totonu o le ga'o e maua mai manu, e fai pea [seia to'a le ga'o i le manoa].

O le malamalama mai lenei molitū e maua ai ni mamananu mananaia i luga o puipui ma le fa'alo.



E Faafofoga ma Tali Mai le Tama Faalelagi i Au Tatalo.

E mafai ona e faaaogaina le lesona ma le gaoioiga lenei e aoao atili ai e uiga i le autu o le Peraimeri i le masina lenei.



Pe sa i ai ea ia te oe se faa-fitauli na e lagonaina ai le popole tele? Sa i ai ia Alema ma ana soa faifeautalai. Sa latou tau-mafai e aoao atu tagata sa Sorama e uiga ia Iesu Keriso, ae sa le talitonu sa Sorama ia i latou. Na manatu sa Sorama e sili atu i latou nai lo isi tagata. A latou tatalo i le lotu, sa latou o atu i se tulaga maualuga na taua o le Rameutoma ma fai lava le tatalo e tasi i taimi uma.

Sa tonu ia Alema e tatalo atu mo se fesoasoani. Sa ia tau atu i le Tama Faalelagi lona faanoanoa ona o le faamaualuga ma le le talitonu o sa Sorama. Sa ia ole atu i le

Tama Faalelagi e faamafanafana o ia ma ana soa ma tuu mai ia i latou le malosi i la latou galuega faigata faafaifeautalai.

Sa tali mai le Tama Faalelagi i le tatalo a Alema. Sa ia faamafanafana ia Alema ma ana soa ma fesoasoani ia i latou ia lagonaina le malosi. (Tagai Alema 31.)

E faafofogaina e le Tama Faalelagi a tatou tatalo i taimi uma, ma e tali mai o Ia ia i tatou i auala eseese. O Ana tali atonu e le vave oo mai po o le auala foi o loo tatou faamoemoe i ai, ae e tali mai lava o Ia i taimi uma ia i tatou ona e alofa o Ia ia i tatou. ■

TATOU TALANOA

O a nisi o tala i tusitusiga paia e te iloaina sa tatalo ai tagata ma mauaina se tali? E mafai ona e faitauina se tasi o nei tala o se aiga ma talanoa e uiga i nisi o auala e tali mai ai le Tama Faalelagi i a tatou tatalo.

Sa faapefea ona tali mai le Tama Faalelagi i au tatalo, ma na faapefea ona e iloaina Lana tali? O a ni ou faa-fitauli o i ai nei ia e mafai ona e tatalo atu ai?

PESE MA LE MAU

- “O Le Tatalo a le Tamaitiiti,” *Tusipese a Tamaiti*, 12–13
- Mataupu Faavae ma Feagaiga 112:10

O TATALO O I TOTONU O TUSITUSIGA PAIA

O lalo ifo o loo i ai nisi o faaitaiga o tagata mai tusitusiga paia na tatalo mo se fesoasoani i ni faafitauli eseese ma maua ai ni tali. Sue ia pusa e tutusa ma koluma taitasi. Faaagao mau faasino i talaane o ata taitasi e fesoasoani ai ia te oe.

O AI NA TATALO



Masiofo Eseta
(Eseta 4–7)

AISEA NA IA TATALO AI

Sa latou fefefe ina nei suia
la latou gagana ona le mafai
ai lea ona latou malamalama
i le tasi ma le isi.

O LE A LE MEA NA TUPU

Sa fetalai atu le Tama Faalelagi
ia te ia e fai ni mea faigaluega
ma fau ai se vaa.

Nifae

(1 Nifae 17:7–17;
18:1–4)



Sa ia fia iloaina po o le fea
o lotu e tatau ona ia auai.

Sa faasao lona ola e le tupu,
ma sa ia faatauanau ia te
ia e laveai lona nuu.

Iosefa Samita

(Iosefa Samita—
Talafaasolopito
1:10–19)



Sa manaomia ona ia
faatauanauina le tupu e puipui
lona nuu mai le faaumatiaina,
ae sa ono fasiotia ai o ia i
lona alu atu i le tupu e aunoa
ma le valaauliaina.

Sa alofa mutimutivale le
Alii ia i latou ma sa lei suia
ai la latou gagana.

O le uso o lareto ma lona aiga

(Eteru 1:33–37)



Sa ia manaomia ona fauina se
vaa e ave ai lona aiga i se nuu
fou, ae sa ia le iloaina le auala
e fausia ai se vaa ma sa lei ni
meafaigaluega na ia moomia.

Sa faaali atu le Tama Faalelagi
ma lesu Keriso ia te ia ma
tau atu ia te ia e aua nei
auai i soo se lotu.

Talofa!

O au o Uili mai Taiuani



E i ai ni gaoioiga faaleaiga e te fiafia lava i ai?
O Uili ma lona uso o Aleni, e fiafia e faaalu
ia Aso Toonai faatasi ma le latou aiga e maimoa
ai i nofoaga fou i le motu o Taiuani, i le mea
o loo latou nonofo ai.

Mai se faatalanoaga ma Amie Jane Leavitt

*Ae matou te lei momoe,
matou te faitauina tusi-
tusiga paia o se aiga. E
fiafia lava Aleni i le tala
e uiga ia Mose ma le
gata apamemea. O le
tala ou te fiafia lava
i ai o le taimi lea na
lapataia ai e le Alii ia
Liae e tuua Ieruselema
ma tau atu ia Nifae
e fau se vaa e o ai i
le nuu folafolaina.*



O ATAPUE MAI FAALOLOGA A LE AIGA O UILI, SEIVAGANA AI LIA
FAALOA ATU: ATAPUE O LE TARAKO MA LE KEKE MASINA SAUNIA E
ISTOCKPHOTO; ATAPUE O LE TAALOGA SOKA SAUNIA E JOHN LUKE;
ATAPUE O LE MALUMALU O TAPEI TAIUANI MA PUE E WILLIAM
FLOYD HOLDMAN



O A LUA MEA E FAI I TAIMI AVANOA?

Uili: taalo i taaloga komepiuta, faalele mea faatifa, ma le soka

Aleni: Faitau tusi, tusiata, ma o e savalivali ma lou tamamatua

O A LANU E TE LUA FIAFIA I AI?

Uili: lanu moli

Aleni: o lanu uma o le nuanua

O A MANU E TE LUA FIAFIA I AI?

Uili: tainasoa

Aleni: o manuki ma nameri ia ou te vaai ai i le pamanu



TATOU MATAMATA!

- O Taiuani o se motu teropika e i le talafatai o Saina.
- O le toatele o tagata e nonofo i aai tetele ma tautatala i le Faa-Saina Meniterini. E silia ma le 90 pasene o tagata, o tagata Puta po o Tao.
- E tasi le malumalu o le Ekalesia i Taiuani, i le laumua o Taipei.



E tele aso malolo fiafia ma faafiafiaga i Taiuani. Ia Setema, matou te faamanatuina ai le Aso Fiafia o le Masina. E faatasitasi le matou aiga atoa, ma matou aai i keke masina suamalie, o meaai ia e faatumu i le kulimi o pi mumu po o kulimi o fatu o le lilivai.



I Taiuani, e tele lava ina maua o matou avanoa e faia ai galuega faafaifeautalai. I le aoga, e ao lava ona ou ao-aoina lau vasega i se mea ou te iloaina e uiga i le faamaoni. Sa ou aoaoina i latou i le auala e usuina ai le pese a le Peraimeri "Tu Atu mo le Mea Sao."

A tuua le aoga, ma te savavali ma lou uso i le fale faatasi ma tamamatua. E fai a ma meaoga ma aai faatasi ma tina ma tama i le aiga o le afiafi. O le meaai ou te fiafia lava i ai o le povi e ave i ai le saimini, ae o Aleni o le falai alaisa. E ma te fiafia uma foi i meaai suamalie.




O LA TATOU ITULAU




O loo aoao tamaiti o le Uarota a Castellón i Sepania e tatalo i totonu o le Peraimeri, ia faitau ma malamalama i tusitusiga paia, ma auauna atu i o latou tuaoi.



Francisco P., 4 tausaga, mai Chile, e fiafia lava e asiasi atu i togalaau o le Malumalu o Santiago Chile. O loo ia aoao e lauga atu i le Peraimeri ma fai i taimi uma ana tatalo. E fiafia lava e fesoasoani atu i taimi o afiafi faaleaiga.



Giordano V., 5 tausaga, Peru



Daniel, saunia e Dali M., 10 tausaga, Mekisiko



Kayque M., 5 tausaga, mai Pasila, o se tamaitiiti e atamai tele ma magafagafa lelei, e ui lava e le mafai ona savali o ia ona o le mai pipili. E fiafia o ia e alu i le lotu. E fiafia o ia i viiga ma pese i taimi uma i le lotu faamanatuga. O le pese muamua lava na ia aoaoina o le "O Au o se Atalii o le Atua." O Kayque e agaalofo, e fiafia e tuu atu upu faamalo, ma o se faamanuiaga tele lea i lona aiga.



Ou te fia faasoa atu lau molimau: Ou te iloa o loo soifua le Atua, e faafofoga o la ma tali mai ia tatou tatalo pe afai tatou te faatuatua. Ou te iloa e alofa lesu Keriso ia i tatou, ma ou te iloa e moni le Tusi a Mamona.

Elisa F., 11 tausaga, Pasila



Ou te fia faasoa atu le mea na ou lagonaina i le aso o lou papatisoga. A o ou savali atu i lalo o le faasitepu e agai atu i totonu o le vai papatiso, sa ou lagonaina se leo i totonu o lou loto o fai mai, "Paula, o loo e faia le mea sao." Sa ou matua fiafia lava ina ua ou papatiso!

Paula G., 9 tausaga, Atenitina

O La Tatou Tali

Saunia e Tatiana Agüero

E faavae i se tala moni

“O le a ia faaali mai le moni o ia mea ia te outou, i le mana o le Agaga Paia” (Moronae 10:4).

Ou te manatua pea le taimi muamua na ou vaaia ai ni alii se toalua o tutu mai i lo matou faitotoa i Peru. Sa la ofuina ni ofutino papae ma ni fusiua, ma sa uumi tele i laua! Sa ou manatu e manaia lo la matafiafia mai.

“Masalo e lelei i laua,” sa ou manatu ai. Masalo sa faapena foi manatu o ou matua ona e lei pine ae o mai soo faifeautalai i le matou fale.

Sa ou fiafia lava e faalogologo atu i faifeautalai ma lagona i taimi uma sa laua tau maia le upumoni.

“E te le fia papatiso, Mamá?” Sa ou fesili atu ai ia tina i le tasi aso.

Sa ataata o ia. “Ioe. Ae ou te fia papatiso faatasi ma lou tama.”

Sa lue atu lou ulu. Sa iva ou tausaga—ua lava le matua e papatiso ai. Ae sa ou manao foi ina ia papatiso faatasi ma lou tama, ae sa le mautonu o ia pe o ia talitonu i mea sa aoao atu e faifeautalai.

“Toaga e tatalo, ma o le a oo mai lava le taimi,” sa fai mai ai Mamá, e peiseai o mafai ona ia faitauina ou mafaufauga.

Sa ou iloa na tuu atu e faifeautalai se lui i lou tama e mulimuli i le valaaulia o i le faaiuga o le Tusi a

Mamona ia ole atu i le Atua ma se loto faamaoni pe moni le talalelei. I se tasi la o afiafi sa tonu ai ia te au e fesoasoani atu i lou tama i lena lui. Sa ou fai i ai pe mafai ona ma tatalo faatasi i le auala lea na talosagaina ai e faifeautalai. Sa ma o atu i totonu o lou potu ma tootutuli ai. Sa ia fesili mai po o ai o le a faia le tatalo.

“Fai e oe, faamolemole,” sa ou fai atu ai.

Na amata ona tatalo lou tama i le Tama Faalelagi. Ina ua ia ole atu pe tatau ona matou papatiso, sa siomiaina i maua i se lagona o le alofa ma le filemu. Sa matuai malosi lava ma sa le tautala lo’u tama mo sina taimi. Sa ma iloaina ai e manaomia ona papatisoina i matou.

O le a le galo lava ia te au le vaaiga i foliga o lou tama ina ua ia faamaeaina lena tatalo.

“Ua maua le tatou tali,” na ia musumusumu mai ai, ma fusi atu au.

Sa ou ataata a o lago atu lou ulu i ona tauau. Sa faafai-gofeina e le Agaga Paia mo i matou ona iloaina le upumoni (tagai Moronae 10:5). ■


O se tatalo faigofie lava na suia ai lou aiga e faavavau.



Ua Faamaloloina e Iesu se Tagata Mai


Saunia e Margo Mae

Mai le Luka 5:17-25




I se tasi aso, sa aoao ai e Iesu tagata i totonu o se fale.


I fafo o le fale sa i ai se tagata na le mafai ona savali. Sa aumai o ia e ana uo i le fale ina ia mafai ona faamaloloina o ia e Iesu. Ae sa matua faatumulia le fale lea sa le mafai ai e ana uo ona aumai o ia i totonu.



Sa sii atu e uo a lea tagata o ia i luga o le tumutumu o le fale. Ona latou vaneina lea o se pu i le tualuga. Sa latou tuu ifo le tagata lea ma lona moega i totonu o le fale ina ia mafai ona silasila i ai Iesu.



Sa vaaia e Iesu le faatuatua tele o lea tagata ma ana uo. Sa Ia fai atu i le tagata, ia tulai ma savali. Sa tu i luga le tagata. Sa mafai ona ia savali! Piki i luga lona moega, ma alu ma le fiafia i le fale.



I lena aso, sa faaali atu ai e Iesu Keriso Lona mana maoae e ala i le faamaloloina o le tagata. Sa Ia finagalo ia iloa e tagata sa ia te Ia le mana e faia ai le tele o mea ofoofogia. ■



E le manaomia
ona sailia le upu-
moni i sami **e le**
i folau muamua
ai lava. Ua uma ona
tosi e se Tama Faalelagi
alofa se taiala faatuatua-
ina—o le **USIUSITAI LEA.**

Peresitene Thomas S. Monson

ALOFA TUNOA MO PATO TINA MA AU

Saunia e Rosie Kaufman

I se tasi aoauli o le tautotogo sa ou utaina ai lau taavale e amata ona fela'ua'i lau fanau laiti e toalima i a latou aoga ma toleniga. A o ou utaina seevae lakapi ma ato siva, sa ou matauina se pato tina ma ana tamai pato o savavali i lalo i le alasavali o le matou nuu.

A o ou matamata atu i ai, sa amata ona ia sopoia le aualatele. Ae paga lea, sa ia filifili e sopo atu i luga o se mea valavala i luga o le alavai, ma a o ia pasia, sa mulimuli atu lana fanau. Sa see i lalo i va o uamea o le mea valavala lea ni tamai pato se fa e aunoa ma se laveai.

Ina ua taunuu le tina i le isi itu, sa ia iloaina o loo misi nisi o lana fanau ma sa mafai ona lagona atu lo latou fetagisi e tau le lagona. I lona le iloaina atoa o lana mea sese, sa ia toe foi atu ai i luga o le mea valavala lea, e saili mai lana fanau ua misi ma toe leiloloa atu ai ma le isi lua. Faatasi ai ma le faateia ma sina le fiafia i le lelei o lana faaiuga, sa ou alu atu ai i le mea valavala uamea lea e vaai pe mafai ona ou siiina i luga. E ui sa ou faaogaina lou malosi atoa, ae sa na o sina minoi lava o le uamea valavala, ma ua ou tuai foi e piki se tasi o lau fanau.

I le manatu ai o le a ou foia le faafitauli i se taimi mulimuli ane pe a le tele se pisi, sa ou oso ai loa i totonu o le taavale a o memumemu ma le faafiaamiotonu, "E le agavaa o ia e aveva ma se tina."

I le isi itula ma le afa na sosoo ai, sa ou faia ai le tele o mea sese faamatua ia e fai soo. O



E pei lava foi o le pato tina, o nisi taimi ou te le atoatoa ai. Ma o iina la e oo mai ai le Faaola.

mea sese nei na ou augani ai mo se faamagaloga mo le tele o taimi mai lau fanau ma lou Tama i le Lagi. O taimi taitasi e naunau ai e faia ia lelei atili ma aua nei toe pa'u atu i le mailei o nei vaivaiga. Pe a ou avaa atu i se tasi o lau fanau mo le taufa'alili i se isi, e tatagi leotele mai pea a'u upu i ou taliga, "E le agavaa o ia e aveva ma se tina."


Sa faafuasei ona ou lagoina se agaalofa faagaetiaina mo lena pato tina. Sa taumafai o ia e taulima le lalolagi i ona lagona na ia maua, e pei lava foi o au. Ae o nisi taimi o na uiga e le lava, ma e mafatia ai lava le ma fanau.

Sa ou naunau e aveese le uamea valavala lea ma sii ese mai i fafo tamai pato. A o ou taamilo mai le tulimanu o le matou auala, sa ou vaaia se tamai vaega o potopoto ai. Sa sii ese e lo matou tuaoi le uamea valavala, oso i totonu o le alavai, ma sii mai ma le faateete ia tamai pato i fafo ma le saogalemu. Sa taufetuli solo nai tamai meaola ma le fefefe e sue lo latou tina, o loo savalivali ma le popole i totonu o se vaovao lata ane. Sa lei fesili le pato tina mo se fesoasoani, ae sa alu atu i ai lou tuaoi ina ua le 'a'u lana puipuiga. Sa lofituina au i lagona a o ou mafaufau i le Faaola i le faia o lea mea e tasi mo au ma lau fanau.

O nisi taimi tatou te le atoatoa ai, e oo lava i taimi e i ai lo tatou naunautaiga silisili ma taumafai i le mea sili tatou te mafaia. Peitai, "ua lava [le] alofa tunoa [o le Faaola] mo tagata uma o e e latou te faalotomauualaloina i latou lava i [Ona] luma" (Eteru 12:27). E faamafanafanaina au i le iloaina o le a le faaleagaina e o'u le atoatoa la'u fanau ma o le a aveva i latou ma e mauaina le alofa, filemu, malamalama, ma le alofa tunoa mai lo tatou Faaola. Na te "aapa mai a o ou aapa atu ia te Ia"¹ ma finagalo ia manuia au ma lou aiga. O le a le manumalo lava o tatou le atoatoa pe a tatou faalotomauualaloina i tatou lava ma tutu faatasi ma le Alii i la tatou itu. ■
O le tusitala e nofo i Iuta, ISA.

FAAMATALAGA

1. "O Fea le Filemu?" *Viiga*, nu. 68.



ATA NA TUSIA E ROBERT T. BARRETT


HEBER J. GRANT

O **Heber J. Grant** sa faatulagaina ma pulefaamalumu i le uluai misiona i **Iapani**. Sa avea o ia ma Peresitene o le Ekalesia ina ua amata faaaoga e le Ekalesia le **leitio** e faasalalau ai lauga. Ina ua manaomia e tagata o le Ekalesia fesoasoaniga i le taimi o le Pau Tele o le Tamaoaiga, sa faatulagaina e Peresitene Grant le polokalama o le uelefea a le Ekalesia, e aofia ai le **Deseret Industries**. O loo aoina pea e lenei faalapotopotoga aitema ma faatau atu pe foai atu i tagata o loo manaomia le fesoasoani.



“E tatau ona tatou iloaina o le a fetalai mai le Alii ia i tatou e ala mai i le Agaga i Lana lava taimi ma i Lana lava ala,” na tusia ai e Elder Dallin H. Oaks o le Korama a Aposetolo e Toasefululua. “E toatele tagata e le malamalama i lenei mataupu faavae. Latou te talitonu e faapea seiloga lava latou te saunia ma i le taimi e talafeagai ma o latou tulaga, ona mafai lea ona latou valaau atu i le Alii ma o le a Ia vave tali mai, e oo lava i ala patino latou te malilie i ai. E le oo mai se faaaliga i lenei ala.” Ina ia faitau atili i le auāala e oo mai ai faaaliga ia i tatou, tagai i le “I Lana Lava Taimi, i Lana Lava Ala,” itulau 24.

O LE EKALĒSIA A
IESU KERISO
O LE AU PAIA O ASO
E GATA AI



SAMOAN

4
02107 88890
9